

Ratüpurî

Hoafi Sowandümo Homo-rundeimbi-yomondi Ratüpurî

Sisasindi hoafi sowandümo homo-rundeimbi ai Ahandi hoafi Serusarem ngoafihü bokamarihoemo

1 ¹⁻²Tiofirus, Sisas ai piyu haya ratüpurîyu asu nindou yamundera humbo God ai ahambo sünambe serümündi mahafu ranahamboyo weangurühi bukambe sürü papimarihândi. Sünambe hafokoate-yuambe, Sisas ai ahândi hoafi semindi horambo kafaore hiningimareapuri ahamumbo-so tüküfi Yifiafi Aboedindi nginindinambo ratüpurî ai süngunambo refembo ra hoafimayupuri. Refehayamboyowane, asu süngunambo God ai serümündü mahafu. ³Ai yifîyu mbura ahândi hoafi sowandümo homo-rundeimbi-so tüküfi Ai yifihündi botimefiyu ra nafuimbohünda afindi moatükuni ramareandi. Raniyo 40 si ranambe Sisasindi hoafi sowandümo homo-rundeimbi ai hoeimariwuri. Raniyo ai God nginindi hifandarandi ranahambo wataporimbo-marapuri. ⁴Raniyo ai ahândi hoafi sowandümo homo-rundeimbi-babidimbo sowasümondühi nimarimombo ahamumboya, “Se yowani Serusarem hiningifepoani. Nga Ape ai saimbo hoafimayua asu ro hoafimayahi ranahambo se himbondimondühi ningomo. ⁵Son ai nindoumbo hoenambo hundürandüri marandi, nga asu yahunümbi si süngunambo Yifiafi Aboedinambo hundürindeimboyei,” mehu.

Sisas ai sünambe mahafu

⁶Sisasindi hoafi sowandümo homo-rundeimbi ai guguriyafu nimarimombo düdu-rüwurühi yahomoya, “Adükari hapondani ndani-simboani se Israerimbo nginindi dabupura ahamundihoari hifandi-mandundiyo, wanimandiyo?” mehomondamboyu. ⁷Asu Ai simbori hoafiyupurühi yahuya, “Ranana se fifirifembo moatükuniyopoani.

Ŋga Ape yanggir-ani nini-simboaniyo rani-moatükuni refembo ra fifireamboayu. ⁸Ŋga süngunambo Yifiafi Aboedi ai sihamumbo sowana akoso ana, se ŋginindi ndowandümboemo. Asu rananimbo wandi hoafi Serusarem, Sudia, Samaria asu muŋgu hifi ra wataporimbo-ndümboemo,” mehu.

⁹Sisas ai rani hoafi ra wataporimbora mbura ahandi hoafi sowandümo homo-rundeimbi ai niŋgomo himboapo-yomondane, nimoamo mahafu. Raniyo mburiŋgainambo gabuderühi asu ahambo hoeifikoate-memo.

¹⁰Sisas ai hafuwane, ahandi hoafi sowandümo homo-rundeimbi ai sünambe himboapo-yomondühi niŋgomondane, nimehünou nindou yimbu ranai kifohi hoeari güdine hena ahamundi fikimi manimbafani.

¹¹Nindou yimbu ranai safaniya, “Garirihündi nindou, nimboe se niŋgomombo himboapoayomoa? Sisas se hoeirüwuri marundi ranana God ai sünambe serümündü mahafu. Se hoeirüwura mahafu yahurai animbo asukai hihirindüfi kudümbui,” masafani.

Sudasindi ratūpuri fondi semindimbo kamafoarüwuri

¹²Raniyo asu Sisasindi hoafi sowandümo homo-rundeimbi ranai Orif Wafu ra hiniŋgiru hou Serusareminambo mahomo. Orif Wafu ranana Serusarem ŋgoafihündi aŋguni hamindiyopoani, ŋga mami kiromitane. ¹³Ai adükari ŋgoafi ranihü tüküyafu mburu wori nimoamo yibadi ahamundi niŋgomo-rundeimbi ranambo mahafomo. Ranana Pita, Son, Sems, Andru, Firip, Tomas, Bartoromyu, Matyu, Sems Arfiusindi nimori, Saimon Serot-yomondi hohoanimo süngure randeimbi asu Sudas Semsindi nimori raniyomo.^a ¹⁴Nindou ranai muŋgu mamühi gugureafu nimarimombo Godimbo didibafi-memo. Bidifiri nimorehi asu Maria Sisasindi hondiyo ahandi akohoandi-yomo ai-amboani muŋgu gugureahi nimareimbo didibafimayei.

¹⁵Rani-simboani Sisasimbo anihondümbo-rihindeimbi ranana 120-yei. Pita ai ahei mbusümo botifi nüŋgumbo Godindi hoafi wataporimbo-randühi yahuya, ¹⁶⁻¹⁷“Amoŋgo-mami asu rehi-mami Godindi bukambe Yifiafi Aboedi ai Defitindi yasimondi süngure hoafimayo Sudas ai Sisasimbo hürütümbi nindou-yomondi warihüfimbo ra asu hapondani anihondü tüküfemboane. Ai-amboani ro-ambeahindi mami ratūpuriyefi-rihundeimb-ani,” mehu.

¹⁸Sudas ai Sisasimbo hürütümbi nindou-yomondi warihürirühi rani-takini kaki masemündu raninambo hifi pemimayu. Asu süngunambo hifi ranihü yifi piyuhumbo bodo bureandühi furi ranai bokarimefoendi.

¹⁹Raniyo süngunambo nindou Serusaremihi amarei ranai fifirihahi hehi

^a 1:13 Serot ranana Rom-yomondi hoarehi niŋgombo moei yahomo rundeimb-anemo. Asu ai Israer ahei hohoanimo yanggiri süngufembo hohoanimo-yomo rundeimb-anemo.

hifi ra ahei hoafinambo Akerdama sei marihūndi. Ahei hoafinambo Akerdama ranana hori kefoendeimbi hif-ane. ²⁰Pita ai yare hoafiyuhū yahuya, “Herū bukambe hoafi sūrū papīmarundi ranana ndahurai-ane,

‘Hifi ra nindou ŋgorū ai ndemūdūmbui,

ŋga moani yare mbinīŋgo-wamboane.’

Buk Song 69:25

Asu ŋgorū bidifirani buk ranambe yare hoafiyowohū yahoya,

‘Ahandi ratūpuri ra nindou ŋgorū ai mbisemūndu-amboane,’ meho.

Buk Song 109:8

²¹⁻²²Ranimoane nindou mami ahei mbusūmonindi hiniŋgi-ndihurimboane sihiri-babidi Sisas ai yifihūndi botimefiyu hoafi semindi horambo. Sapo nindou ranana sibir-ambeahindi Sisas ai sihiri-babidimbo huranda Son ai nindou hundūrūrandūrī ra humbo asu Sisas ai hiniŋgireamuni haya sūnambe mahafu rananimbo wataporimbo-mbirundamboane,” mehu.

²³Ai nindou yimbu ndūrī pamarupiri: Sosep Barsabas, ahandi ŋgorū ndūrī Sastus yahomondo-rundeimbi, asu ŋgorū Matias. ²⁴⁻²⁵Sisasindi hoafi sowandūmo homo-rundeimbi ranai yaru didibafiyafundūhi yahomoya, “Adūkari, se muŋguambo nindou-yei hohoanimo fifirowamboanafi. Se yihoefimbo nafuindafi nindou yimbu nda daboe se kamafoariwori ndani ratūpurimbohūnda. Yihoefimbo nindou didai sihafi hoafi semindi horambo tūkūmandifi Sudasindi fondambe. Sudas ai yihoefimbo hiniŋgireamuni haya ai niŋgomboayu raninambo mahu,” mehomo. ²⁶Ai nimarimombo nindou didai Sudasindi fondūhi ratūpuri ra mandemūdū ranimbo nimoei pūtimemo. Raniyo nimoei ranai Matiasindi tūkūmefeyoa asu Sisasindi hoafi sowandūmo homo-rundeimbi 11 rani-babidimbo hoafi sowandūmo homo-rundeimbi nindoumbo-mefundi.

Yifiafi Aboedi makoso

2 ¹Nūmbūr-ambeahind sesi yimuŋgu-remindimbo hihifi-hihifi si Pendikos sei arihūndi ranai tūkūfeyoambe Sisasimbo anihondūmbo-rihindeimbi nindou ranai mami worambe gugurimehindi. ²Raniyo nimehūnou ŋginindi hamindi weri nahurai sūnambeahindi kosi wori ai guguriyahi nimateimbi ranahambo simoŋgoramindi haya meŋgoro. ³Asu ranihū hai imami teifi didiŋariyohū ahoro nahurai tūkūfe haya muŋguambo mamami aheiwami ninouyo wakimareandi. ⁴Raniyo Yifiafi Aboedi ranai ahei fiambe farifehū ahandi ŋginindinambo ŋgorū-poanimbo ŋgorū-poanimbo hoafinambo wataporimaye.

⁵Asu Serusarem ŋgoafihū muŋguambo hifi adaburo ranihūndi Suda bidifiri Godimbo hohoanimoyei-rihūndeimbi ai tūkūyahi mamarei.

⁶Weri nahurai tūkūmefeyo ra himboriyei hehi nindou afindi ranai gugurimehindi. Raniyo asu himboriyeiani Sisasimbo anihondūmbo-

rihindeimbi nindou ranai wataporimaye ra ahei hoafinambo wataporimayeia himboriyei hehi mahepūnehindi. ⁷Asu Sudahūndi-maye ranai hoafi wataporimbo-marihūndi ranahambo hepūnehi hehimbo hoafiyeihi seiya, “Awi nindou ranana muṅguambo Garirihūndi-mbayeiyo? ⁸Sihiri ana mami ŋgoafihūndi-yefiṗoani, ŋga nūṅgurihi hehimboyo asu muṅguambo mamami sihefi hoafinambo wataporimayeia ahei hoafi ra himborayefa? ⁹⁻¹⁰Sihiri ana Partia, Midia, Eram, Mesopotemia, Sudia, Kapadosia, Pondus, Esia, Frigia, Pamfira, Isip asu Sairini ŋgoafikimi Ribia distrik ranambe ŋgoafi adaburo asu Rom, hifi ranihūndambo nindou-anehi nda fandihu animboefi. ¹¹Suda sihir-anehi asu nindou amuri sihefi Godimbo hohoanimo sūṅgurihi arihūndi anei, Kritihūndi asu Arebiahūndi muṅguambo himboriyefani God ai ŋginindi-moatūkuni ramareandi ranahambo sihefi hoafinambo wataporimbo-arihūndi,” masei. ¹²Asu nindou muṅguambo ranai hepūnahi afindi hohoanimoyeihi aheihoari simbori hoafūriyeihi seiya, “Nine-moatūkuniyo hapondani nda yahurai tūkefeyoa?” masei. ¹³Ŋga asu bidifiri ai tirifoefe hoafiyahūndūrūhi seiya, “Awi aiana wain hoe afindi hamindi simindei hehi mamikari hohoanimo-yehimbaye,” masahūndūri.

Pita ai hoafi bokamarihendi

¹⁴Asu Pita ai Sisasindi hoafi sowandūmo homo-rundeimbi 11 rani babidimbo niṅgomombo pukūna hoafiyuhū yahuya, “Wandi wandafi mami, Suda anei asu nindou bidifiri haponda Serusaremihū amarei, se ro ndani-moatūkuni tūkefeyo ranahambo hoafayahi nda himboyaṅgiri kūndihi nimandimbo himborindei. ¹⁵Se hohoanimoyeihiya, nindou nda wain hoe simindei hehi mamikari hohoanimoyei hanei asei, ŋga awi hapondani ana 9 kirok siambeahanefi. ¹⁶Ŋga ndani-moatūkuni tūkefeyo ranana Godindi hoafi hoafiyu-randeimbi Soer hoafimayu sūṅgu-ane tūkefeyo.

¹⁷God ai hoafiyuhū yahuya, ‘Bidifiranambo si ranai akimi tūkūfemboyoambe
ro wandi Yifiafi muṅguambo nindou-yeiwami
koandihe-heamboya.

Sihei nindowenihi nimori asu nimorehi nimori ai Godindi hoafi hoafiyomo-rundeimbi nahurai wataporimbo-ndūhūmboyei.
Sihei nindowenihi nimori hoarifambori ai rani-poanimbo moatūkuni yafogoadinambo nahurai hoeindumboemo asu boagiri nindou ai yafogoadi-ndimboemo.

¹⁸Asu rani-simboani ana ro wandi ratūpuriyei-rihūndeimbi, nimorehi nindowenihi yiboboambo, aheiwami Yifiafi koandi-heheanda

Godindi hoafi hoafiyomo-rundeimbi nahurai hoafindeimboyei.

19 Bidifiranambo si ra nafuimbohūnda
ro hepūnifeimbi moatūkuni sūnambe asu hifihū nafuindamboyahī.
Hori, hai asu hasiheimi afindi tūkūndifemboe.

20 Adūkari ai ahandi adūkari himboa-mupuimbo-randeimbi si ra
tūkūfekoate-yoambe animbo
hūfihamindi ai nimbindiri-mindowohū
asu amoamo ai hori nahurai hamburi tūkūndifimbui.

21 Rani-simboani animbo muṅguambo nindou ai aheimbo
fehēfendūrimbo hūnda
Adūkarimbo didibafehindi ranaheimbo aboedambo-
ndeandūrūmbui,’ mehu.”

Joel 2:28-32

22 Pita yahuya, “Israerihūndi nindou se wandi hoafi nda himborindei.
Sisas Nasareti hūndi aiana ranipoanimbo nindouyu. God ai sihei
mbusūmo ahandi warisūngu hepūnifeimbi moatūkuni ramareandi ra se
fifirihindi. 23 God ai horombo hondū hoafi firamūndū sihai mburamboyu
Sisasimbo sihei warihūmariri, ṅga hūrūtūmbi nindou ai nimi keimbi
karihendeimbi fihī tikorūndūmo pamarūwura yifimayu. 24 ṅga God
ai ahambo yifindi asūbusi ṅginindikoate-yoweimbi ranambeahindi
botimariri. Nimboe sapo yifi ai ṅgiri ahambo bobohindirimindo.

25 Horombo Defit amboani ahambo yare hoafiyuhū yahuya,
‘Ro hoeirihinani Adūkari ai muṅguambo si wandi-fikimi anūngu.
Ai wandi fikimi nūṅgumbo wambo ṅgiri nini-moatūkuni amboani
asūbusi ndendiri.

26 Ranimboane ro ṅgusūfoambe aboedi hihifi-hihifiyahūhi
God ai wambo aboedi moatūkuni refemboayu ranahambo
himboayahī.

27 Asu se ṅgiri wambo yifi ambe-ambe rando hiniṅṅindowandiri.
Sapo se ṅgiri sūrūhoeimbi nindou kafaro hiniṅṅimariwori ra
hiniṅṅi-ndowora yifi ambe-ambe sūmburindu.

28 Rananimbo se yangiri aboedi niṅgombo nafi ra
yamundo-wandirimboayafi.

Asu se yini mbisafani ro se-dibo nimboambo afindi hihifi-hihifi-
ndamboyahī,’

Buk Song 16:8-11

mehu. 29 “Amoṅgo mam-anemo asu rehi mam-anei, ro siheimbo
anihondūmboanahi hoafehandūri, sihefi amoao Defit ai yifimayuwambo
masamboarihuri. Asu ahandi yifi ambe ranai haponda sihefimbo sowahi
aniṅgo ho. 30 Defit ai-ana Godindi hoafi hoafiyu-randeimbi wambo fifireandi
God ai ahambo hoafiyundowohūya, ‘Sūṅgunambo sihafi sirambeahindi
mami sihafi fondi semindimbohūnda ahambo bogorimbondihini hiniṅṅi-
ndihiniamboyahī,’ mehu. 31 Defit ai nini-moatūkuni tūkūndifembo ra
fifireandūhi wataporimbo-randūhiya, ‘God ai ṅgiri ahambo yifiyeimbiyei
ṅgoafihū hiniṅṅindiri, asu ṅgiri yifi ambe-ambe sūmburindu,’ mehu. God

ai ahandi nendambo aboedambo-fendūrimbo Kraiſ yifihūndi botimariri ranahamboyu wataporimbo-marandi. ³²Sisasimboyo God ai yifihūndi botimariri. Muŋguambo ro hoeirihu hohu ranahamboane wataporimbo-arihūndi. ³³Sisasimbo God ai sūnambe serūmūndū hafu hiniŋgirirani ahandi warihondū warani mbamarū. God ai horombo hoafimayu sūngu Sisasimbo Yifiafi Aboedi masagado, raniyo asu Sisas ai sihefiwami koamafoareandi, ran-ane haponda se hoafi himboriyei asu hoeirihū arihūndi. ³⁴⁻³⁵Defit ai moai sūnambe hafu Sisas ramefiyu nou, ŋga ai hoafiyuhū yahuya, ‘Adūkari ai wandi Adūkarimbo hoafiyundowohū yahuya,

“Se wandi wari hondūni nimandifi ŋgafimbo

asu sihafi hūrūtūmbi ra sihafi hoarehi hiniŋgi-ndiheapurani se hidadapuri-mbofafi,” ’ mehu.

Buk Song 110:1

³⁶Ranimboane Israer nindou muŋguambo se nda ndondihū fifirindihūndi. God ai Sisas se nimi keimbi karihe-ndeimbifihi tikorihomondei pamarihori ranahambo Adūkarimboriri asu ahandi nendambo aboedambofembo nindoumboriri kafaoriri hiniŋgimariri,” mehu. ³⁷Pita ai rani hoafi ra wataporimbo-maranda nindou afīndi ranaheimbo ŋgusūfoambe horimareandūra bidifiri amuri Kraiſindi hoafi sowandūmo homorundeimbi-babidimbo ahamumbo dūdurihipurūhi seiya, “Asu nini nūnūngu-mandihūnda?” maseiamboyo. ³⁸Asu Pita ai simbori hoafiyundūrihi yahuya, “Muŋguambo mamami se sihei moaruwai hohoanimo ra hiniŋgindihū hehi simbori hohoanimo sūngundihindūhi Sisasindi ndūrinambo hundūrūndeiani animbo God ai sihei moaruwai hohoanimo ra amboawi mbūsūmbui. Rani-sūngundihindani animbo God ai siheimbo Yifiafi Aboedi dagadūrūmbui. ³⁹God ai Yifiafi Aboedi saimbo hoafi firamūndū masihendi ranana se, sihei nimori asu sūngudidi nimori hondū siheimbo muŋguamboyo. Rani-moatūkuni ranana nindou muŋguambo God ai wand-aneī yahundūreimbi aheimbo hoafiyu masihend-ane,” mehu.

⁴⁰Pita ai amuri bidifiri hoafi ranifihi pare haya wataporimbo-marandi. Ai hūtihoafi-yupurūhi yahuya, “Se hidadihūmbo, ŋga nindou moaruwai hohoanimoyei-rihūndeimbi rani-babidimbo moaruwaimbo-ndahimboyei.”

⁴¹Pita hoafi wataporimbo-marandi ranai nindou afīndi ranaheimbo ŋgusūfoambe botimareandūra hundūrimayeī. Rani-simboani 3,000 nindouyeī Sisasimbo anihondūmbo-rihindeimbi horimbodidi ranifihi pamareandi.

⁴²Nimorehi nindowenihū ranai ranihū Sisasindi hoafi sowandūmo homorundeimbi-yomondi yamundife hoafi himboriyeihū bidifiri wandafi ranaheimbo fehēfendūrimbohūnda sesi mami sahūsihi Godimbo didibafiyahi marihūndi.

Sisasimbo anihondūmbo-rihindeimbi ai mami hohoanimo sūngumarihūndi

⁴³Sisasindi hoafi sowandūmo homorundeimbi-yomondi warisūngu God ai hepūnifeimbi moatūkuni ramareanda nindou afīndi ranai

yihimboyeihi ahinimarihori. ⁴⁴Sisasimbo anihondumbo-rihindeimbi nindou ranai mamūhiyahi nimareimbo mamami ahei napo ra ahei mamūhi nahuraimayo. ⁴⁵Ai ahei hifi asu napo ra nindou ŋgorumbo sehindūhi ranifihindi kaki sahūmūndi hehi kaki ra nindou napokoate-yeimbimbo sehi marihūndi. ⁴⁶Muŋguambo si Godindi worambe gugureahi marihūndi. Asu ai ahei worambe gugureahi nimareimbo sahūsi rihūndūhi aheimayo napo ra nindou ŋgorumbo ŋgusūfoambe hihifi-hihifi kapeihū sehi marihūndi. ⁴⁷Nindou ranai muŋguambo si Godimbo aboed-ani sei hohoanimoyeia asu muŋguambo nindou ranai aheimbo hihifi-hihifi-yahūndūri marihūndi. Muŋguambo si Adūkari ai nindou bidifiri semūndūndūra asu Sisasimbo anihondumbo-rihindeimbi nindou ranai afindi safi tūkūfe marandi.

Pita ai nindou mami tiŋari moaruwaimbū aboedimariri

3 ¹Mami nimbambeahi Pita ai Son-dibombo didibafifembohūnda Godindi worina mahūfani. ²Raniyo giniri yipuri Aboedi Yipuri sei arihūnd ranikimi nindou tiŋari moaruwaimbū mamaruwa hoeimarineri. Ahandi tiŋari ra hondi ai yahurai wakirimindi hayamboyo muŋguambo si giniri nafitambe ranikimi sahorimindei hei hiniŋgirihorani nimarumbo nimorehi nindowenihi Godindi worina heiani kaki moako-moakoyumarandi. ³Nindou ranai hoeireandane, Pita ai Son-dibombo Godindi worina mahūfandamboyo kaki moakomayu. ⁴Pita weimbo Son ai ahambo himboari parineri nimbafanimbo safaniya, “Yihoehimbo sowana himboyafi,” masafandamboyo. ⁵Nindou ranai ahafanimboya wambo kaki saimbo-mbayafani yahu haya himbomayu.

⁶Ŋga Pita ai hoafiyundowohū yahuya, “Ro moai kaki sihambo saimbo sahamindihi, ŋga ro sihambo mami-moatūkuni ndahaninimboya. Sisas Krai Nasaretihūndi ahandi ŋginindinambo botiyafo hawa hafi,” mehundo. ⁷Raniyu Pita ai ahandi warihondū watiŋari kikihiramūndū mbura botimarira nimehūnou ahandi tiŋari asu yimindiho ranai ŋginiramindiwohū botimefiyu. ⁸Ai horipirihoei piyu nūngu mbura mahu. Ai Pita weimbo-babidimbo Godindi worambe hu nūngu wakireandūhi hohoripi-hohoripiyu randūhi Godimbo adūkar-ani mehu. ⁹⁻¹⁰Muŋguambo nindou ranai fifirihindi sapo nindou ranaiyu Godindi wori giniri yipuri Aboedi Yipuri sei arihūndi ranikimi nimarumbo kaki moako-moakoyumarandi. Asu hapondani hoeirihorani nindou-mayu ranai hoahoŋguhū Godimbo aboed-ani yahu hoafimayua nindou ranai nūngure-hayamboyo rani-moatūkuni ra tūkūmefeyo sei hehi mahepūnahindi.

Pita ai Godindi worambe hoafi bokamarihendi

¹¹Nindou-mayu ranai Pita weimbo Sonimbo kikihirapūmūndi nūngambe nimorehi nindowenihi afindi ranai hepūnahi hehi

Soromonindi yibadi sei arihūndi Godindi worambe raninambo pipimayehei. ¹²Pita ai nindou afindi mahūsi ra hoeireandūri haya hoafiyundūrihi yahuya, “Israerihūndi nindou se nimboe hepūnehinda? Se nimboe yihoefimbo himboapoaye ahafandi ŋginindi asu ai-ana mbumundi nindouwambo mbayafandi nindou ra aboedimarineri sei hehimboa? ¹³Abraham, Aisak, Sekop asu sihefi amoaoyei God ai ahandi ratūpuriyu-randeimbi Sisas ahambo ŋginindi masagado, ŋga se hifokoe-fimbohūnda hūrūtūmbi nindou-yei warihūmarihori. Pairat ai aboedambo koarihefimo hohoanimoyuwane, asu se Pairatimbo seiya, ‘Ro moai Sisasimbo aboedambo koarihefimo hohoanimoyefi,’ masei. ¹⁴Se moai aboedi sūrūhoeimbi ranahambo hohoanimoyei, ŋga ahambo semūdūmbo hūndi-mayo raniyo asu yifiariyu nindou hifokoare randeimbi-mayu ra masahorimindei. ¹⁵Se nindoumbo koadūrūmbo-koadūrūmbo yaŋgiri ŋingombo nafi semindindūri hombo-mayu ra hifokoamarihori ranahamboane wataporimbo-rihu arihūndi. ¹⁶Sapo se nindou hoeiarihori nda se fifirihori, ro Sisasimbo anihondūmbo-arihoandi ranimboyo nindou tiŋari moaruwai nda aboedimefiyu. Se muŋguambo aboedi hamindi tūkūmefiyuwa hoeiarihindi ra Sisasimbo anihondūmbofe raninamboyo.

¹⁷Amoŋgo-mami asu rehi-mami, ro fifiriheandi se Sisasimbo ramarihori ra moai sihei bobaagori nindou rani-babidimbo nini-moatūkuniyo ramarihindi ra fifirihindi. ¹⁸God ai ahandi hoafi hoafiyomo-rundeimbi-yomondi yasimondi sūngure hoafiyuhūya, ‘Krais ai asūbusi ndemūdū haya yifindūmbui,’ mehu. Raniyo asu God ai haponda anihondū ndanisūngure hiniŋgimareanda tūkūmefeyo.

¹⁹Ranimbo-animbo se sihei ŋgusūfoambe hohoanimo ŋgorū sūngundihindūhi God sowana hihirindahi dideiyani animbo asu sihei moaruwai hohoanimo ra amboawi mbeyahuamboane. Rananimbo Adūkari ai fi hefe nimarimbo si ra koandihembui. ²⁰Rawehindi animbo God ai nindou siheimbo fehefendūrimbo kafoariri hiniŋgimariri Krais Sisas ra, koandihērūmbui. ²¹Sapo horombo ahandi hoafi hoafiyomo-rundeimbi-yomondi yasimondi sūngu hoafimayu sūngu. Sisas ai sūnambe nūngu ŋgumbo God ai muŋgu-moatūkuni simbori tūkūfembo hoafimayu ranambe tūkūndūfimbui. ²²Horombo Moses yahuya, ‘Nindou mami ro nahurai Godindi hoafi hoafiyorambo Adūkari God ai seambeahindi kaboadiri hiniŋgindirūmbui. Asu muŋgu-moatūkuni ai hoafiyuweimbi ra sūngundihindi,’ mehu. ²³Nindou Godindi hoafi hoafiyu-randeimbi ahandi hoafi himboriyo sūngufekoate-aye ana, God ai hifokoandeira yifindeimboyei asu ŋgiri Israeriyeyi sirambeahindindei.

²⁴Nindou Godindi hoafi hoafiyomo-rundeimbi Samuer nūnguambe peyo haya sinimbo ahandi wagabe ra muŋguambo mami rani hoafiyu wataporimboru homombo asu hapondanambe tūkefeyo. ²⁵Se-ana

Godindi hoafi hoafiyomo-rundeimbi ahamundi ahuri mam-anei. Asu God ai sihei amoa mami-babidimbo hoafi firamündü masihendi ra siheimbo-hündamboane. Ai sihei ape Abrahamimbo hoafiyundowohü yahuya, 'Sihafi ahuri ranahambo süngunambo animbo muṅguambo nindou ndani hifihü aniboadei ranaheimbo aboedi-aboedi-ndiheandüri-mboyahi,' mehu. ²⁶Siheimbo aboedi-aboedifendüra sihei moaruwai hohoanimo hiniṅgifembohünda God ai weaṅgürühi ahandi ratūpuriyu-randeimbi Sisas siheimbo sowahi koamaritherü," mehu.

Pita weimbo Sonimbo kansirindi himboahü papi-hoafimarupiri

4 ¹Pita ai Son-dibo nimorehi nindowenihimbo wataporimbo-rinandürühi nimbafandambe, Godimbo sesi sihou-rundeimbi-yomo, ami Godindi wori hifandirundeimbi-yomondi bogori-yomo asu Sadyusi-yomo ai aheimbo sowahi hafomo tüküfundü. ²Ahamumbo ṅgusüfoambe moaruwai marapuri ra sapo Kraisindi hoafi sowandifani hafani-rinandeimbi ranai nindoumboya, Sisasindi ṅginindinambo yifihündi botindahimboyei hoafi ra yamundi-marineanda ranimboyo ahafanimbo ṅgusüfoambe ṅginindi-marupiri. ³Suda-yafe bogori nindou ranai Pita weimbo Sonimbo kikihirupindümo houmbo papi-hoafiyopirimbo mehomo. ṅga asu nimbifembo yaṅgiri-mayoamboyo sümbo papi-hoafiyopirimboane yahomo houmbo karabusambe hiniṅgimarupiri. ⁴Pita, Son ai wataporimbo-marinanda nindou afindi ranai hoafi wataporimbo-marinandi ra himboriyei hehi Sisasimbo anihondumbo-marihindi. Nindou ahafandi hoafi himboriyei hehi anihondumbo-marihindi ranana 5,000-yei.

⁵Süngunambo ṅgorü sinambo Suda-yei hifandirundüreimbi, bogori nindou asu ahinümbi hohoanimo yamundu-rundeimbi ai Serusarem ṅgoafihü mafandundi. ⁶Godimbo sesi sihou-rundeimbi, Anas, Kaiapas, Son, Areksander asu muṅguambo Godimbo sihou-rundeimbi-yomondi fikiminindi ai-amboani ranihü mafandihindi. ⁷Ai Pita weimbombo sowapündümo ahamundi himboahü hiniṅgirupiri houmbo düduripirühi yahomoya, "Se nini-ṅginindinamboyo rani-moatükuni ra ramarineanda?" mehomondamboyu.

⁸⁻⁹Pitandi fiambe Yifafi Aboedi ranai tüküfehüyo simbori hoafiyupurühi yahuya, "Hifandi-rundeimbi asu bogori nindou, se nindou tiṅari moaruwaimbü ranahambo aboedi moatükuni ramarihoandi ranimboyo yihoehimbo düduwefundi? Asu düdi aboedimariri yahomomboemo yihoehimbo düduwefundi? ¹⁰Refe ana ro hohoanimoyehani muṅguambo se-anemo asu Sudahünd-anei nda fifirindihindi, nindou ranai ana Sisas Nasaretihündi ahandi ndürinamboyo aboedi tükümeṅfiyu. Se nimi keimbi karihendeimbi fihi tikorihorimindei pamarihori, ṅga asu God ai yifihündi botimariri.

Nindou ndanai tījari moaruwaiyusi, ŋga Sisasindi ŋginindinambo aboedifi haya haponda sihei wagabe ndanūngu. ¹¹ Sisas ai ana,

‘Kambohoani worimboru-rundeimbi nindou ai ambe mehomoyosi, ŋga asu wori ŋginemindimbohūnda bogimondi kambohoani noumbofi tūkūmefiyu.’ *Buk Song 118:22*

¹² Sisasimbo yanggiriyo hifi ndanihū God ai nindou aboedambofembo ŋginindi masagado. Ahandi sūngu animbo sihiri aboedambo-ndahumboyefi asu ai yanggiri animbo nindou aboedambo-ndeamunimbui,” mehu.

¹³ Suda-yafe bogori nindou ranai fifirundi Pita weimbo Son ai moai skuri-yafani, ŋga moanindi nindou-yafani yihimbokoate-wataporimayafandamboyo nindou ranai mahepūnafundi. Raniyo horombo Sisas babidimbo hoahoangomo marundi ra ai fifirimarundi. ¹⁴ Nimboe sapo nindou aboedimarineri ranai ahafandi fikimi manūnguamboyo asu ahafanimbo nini akidou-amboani hoafikoate-memo. ¹⁵ Suda-yei bogori nindou ranai hoafimemonda Pita ai Son-dibo tūkūyafine hena mahafani. Ai hafandaniyo bogori nindou ranai nimarimombo ahamundihoari bogo simbori ndūwurimefundi. ¹⁶ Ai hoafiyomondūhi yahomoya, “Nindou ndanahafanimbo nini nūnūngu-mandihupira? Muŋguambo nindou Serusarem ŋgoafihūndi ai fifirihindi sapo ai hepūnifeimbi moatūkuni ramarineandi ra. Ŋga rani wambo asu sihiri ŋgiri didimondēfūhi wani mbisefi. ¹⁷ Ŋga rani hoafi ra muŋguambo nindoumbo goago wakinde-amboembohūnda yowani mbisefomboane. Yowani mbisefani animbo nindoumbo Sisasindi ndūri ranahambo wataporimbo-yondūrikoate-mbeyafandamboane,” mehomo.

¹⁸ Ai asūkaiyomo miŋgiyomo hūrihaupiri houmbo yahomopiriya, “Se yowani Sisasindi ndūri ranahambo nindoumbo wataporimbo-yondūri asu yamundifendūri-rapoani,” mehomo. ¹⁹ Ŋga asu Pita ai Son-dibo simbori hoafiyafandūhi safaniya, “Nine-hohoanimo God ai yifirayu ra se tūrūboadundi. Ro sihamundi hoafi sūngu-mandihoyo asu Godindi hoafi sūngu-mandihoyo? ²⁰ Sapo ro nine-moatūkuni hoeiriho asu hoafi himboriye marihoandi ranahambo wataporimbo-hūndambo ŋgiri ro yafambe kikihi-ndihoamindehi,” mehu.

²¹ Ai moai ahafanimbo karabusi-fepirimbo nafi fifirundi, sapo nindou muŋguambo ai hepūnifeimbi moatūkuni ramarineandi ranimbo Godimbo adūkar-ani seihū wambo. Raniyo Suda-yei bogori nindou ranai Sisasindi ndūri ranahambo wataporimboyo asu nindou yamundiferambo ŋginindi hamindi yowani yahomo mburumbo asūkai aboedambo koamarahaupiri. ²² Nindou hepūnifeimbi moatūkuni rarineandūhi aboedimarineri ranana 40 himbani ŋgasūnde-andeimbiyu.

Anihondūmbo-rihindeimbiyei didibafife hoafi

²³ Suda-yafe boboagori ranai Pita weimbo-babidimbo hoafi didiboado-marundi. Raniyafani ranihūndambo ai mami anihondūmbo-rihindeimbi

aheimbo-so hihireafine hafani Godimbo sihou-rundeimbi bogori asu Suda-yafe boboagori wataporimbo-marundi ra wataporimbo-marinandi.

²⁴ Sisasimbo anihondumbo-rihindeimbi nindou ranai rani hoafi ra himboriyei hehi muṅguambo Godimbo didibafiyeihei seiya, “Adūkari serandi hifi, sünü, siriwara asu muṅgu-moatükuni ranambe eṅgoro ra nafimarandi. ²⁵ Horombo yihoefi amoa Defit sihafi ratūpuriyu randeimbimbo Yifiafi Aboedindi süngu se hoafiyafühi safiya,

‘Nimboe muṅguambo hifihündi nindou ra ṅginindaye?’

Asu nimboe nindou ranai ṅgusüfo hohoanimo-koate hoafi firarihümündi?

²⁶ Hifinindi adūkari boboagori nindou ranai yifiarimbo yahomo houmbo guguriyafu hoafi firarindümo.

Ran-ane hifandi-rundeimbi boboagori ranai

Adūkari asu Krai nindou aboedambofembo kafaoriri hiniṅgimariri

ahafanimbo hifinambo-fepirimbo hoafi firarindümo,’ masafi.

Buk Song 2:1-2

²⁷ Herot, Pondius Pairat, Suda-yafe ndifo asu Suda ai Serusarem ṅgoafihü mamühiyahi Sisas Krai sihafi ratūpuri, ratūpuriyu-randeimbi se nindoumbo aboedambofembo kafaoriwori hiniṅgimariwori ranahambo hoafi fimarihümündi. ²⁸ Nindou ndanai ndani-moatükuni ramarihindi ra sihafi yifiri sünguyo, sapo se horombo sihafi ṅginindinambo hoafi firandifühi ndani-moatükuni nda tükümbifeyo-wamboane safi masihawandi sünguyo. ²⁹ Asu haponda Adūkari se yihoefimbo yihimbombiyeia sei hehi hoafi wataporimbo-marihündi ra himborindafi. Sihafi ratūpuriyefi-rihundeimbi yihoefimbo fandihawamunani animbo yihimbokoate-sihafi hoafi ra wataporimbo-ndihumboane. ³⁰ Asu se sihafi wari ṅgünümbi nendiyei-wami nandowandürani aboedindahindühi Sisas sihafi ratūpuriyu-randeimbi ahandi ndüri süngu hepünifeimbi moatükuni ratūpurindafi.”

³¹ Ai rarihi Godimbo didibafiyei kikirihümündianiyu, wori guguriyahi nimareimbimayo ranai yabadimarandi. Raniyu Yifiafi Aboedi ranai ahei fiambe tüküfehüyo yihimbokoate Godindi hoafi ra wataporimbo-marihündi.

Sisasimbo anihondumbo-rihindeimbiyafe fehefe hohoanimo

³² Muṅguambo anihondumbo-rihindeimbi ranai hohoanimo mamamberihi hehi mamü hohoanimo süngumarihindi. Raniyu asu ahei napo ra moai yihoefi yaṅgir-ane sei, ṅga nindou mamami ahei napo ra muṅguambo aheimayo. ³³ Hoafi sowandümo homo-rundeimbi ai God Sisasimbo yifihündi botimariri hoafi wataporimbo-marundi ra ṅginindiyo. Raniyu asu God ai nindou ranaheimbo fehefendürimbo

hohoanimo-yundürühi afindi aboedi-aboedi-mareandüri. ³⁴⁻³⁵Nindou afindi ranambeahindi moai mami ai-amboani nini-moatükuni mbonimboramündu. Nindou hifi asu woreimbi-mayei ranai kakifihi koarihehi mburihü kaki ra sahümündi hei hoafi sowandümo homo-rundeimbimbo sehinda ai nindou napokoate-yeimbi mbonimborihümündiani yimbundurüri marundi.

³⁶Nindou mami ahandi ndüri Sosep ranihü manüngu asu raniyo hoafi sowandümo homo-rundeimbi ai ahambo ngorü ndüri Barnabas kamafoarüwuri. Ndüri Barnabas ranana ahandi nimindi ra ngusüfoambe nginiramindi randeimb-ane. Asu aiana Rifai srambeahindi Saiprusihündiyu. ³⁷Ai hifembüyu hayamboyu hifi ra kakifihi sai mbura kaki ra semündü hu hoafi sowandümo homo-rundeimbimbo masagapuri.

Ananias asu Safaira yifimayafe

5 ¹Nindou mami, ahandi ndüri Ananias, ai ahandi nimorehi Safaira-dibo hifi bidifiri nindou ngorumbo kakifihimbo masabinando. ²Ai kaki ra ahambohünda bidifiri masihenda nimorehi ai-amboani fiffireandi. Ngga asu bidifiri yanggiri semündü hu hoafi sowandümo homo-rundeimbimbo masagapuri.

³Asu Pita ai hoafiyundowohü yahuya, “Ananias, nimboe Satan ai sihafi hohoanimoambe nimarumbo Yifiafi Aboedi ranahambo wosihofori-randühi kaki hifi-hündi masowandifi ra bidifiri dibonapimarowanda? ⁴Se hifi masowandi ra sihafi hohoanimo yanggiriyo, asu kaki masowandifi ra se nini-moatükuni refemboayafi ra sihafi hohoanimo yanggiriyo. Ngga asu nimboe se rasüngu-marowanda? Yihoefimbo-yopoani wosihofafi hoafimayafi, ngga Godimboyo wosihofafi hoafimayafi.”

⁵⁻⁶Pita ai hoafimayuwu Ananias ai hihimbori-yuhündamboyu yifi pimayuwu akohoandi nimori ai ahandi fi-nimoko ra hoearinambo himondiwuri sowarindümo homo dibonapimarüwuri. Raniyo nindou afindi ranai rani hoafi ra himboriyei hehi yihimbomayei. ⁷Ahandi nimorehi ai rani-moatükuni ramefeyo ra moai fiffireandi, raniyo nggimi awa hohayamboyowane, ai asukai maho. ⁸Pita ai ranahambo düdureandühi yahuya, “Se hoafiyafindiri, hifi-hündi kaki masowandife ra ndearamboyawai?” mehuamboyo. Asu simbori Safaira ai hoafiyowohü yahoya, “Yini, ra ndeariyo,” mehuamboyo. ⁹Asu Pita ai ahambo simbori hoafiyundowohü yahuya, “Se nimboe sihafi nindowenihi-dibo Adükarindi Yifiafi ranahambo refe hoefimbo hoafi fimarinandifea? Hoeiro, nindou sihafi nindowenihambo hifikamarüwuri ranai yipurikimi aningomo. Asu sihambo amboani ndowandümonini nggomo hifi kanduninimboemo,” mehuamboyo. ¹⁰Hoafi ningoambe Safaira ai Pitandi yirikimi peyo yifimayo. Raniyo nindou akohoandi ranai sifomo

hoeirunda yifimayowamboyo sowandūmo homo ahandi nindowenihandi fikimi hifi kamarundi. ¹¹ Raniyo Kraisindi nendi-yei asu amuri bidifiri raniyei rani hoafi ra himboriyei hehi yihimbomaye.

**Hoafi sowandūmo homo-rundeimbi ai
hepūnifeimbi moatūkuni ramarundi**

¹² Hoafi sowandūmo homo-rundeimbi ai nindou-yei mbusūmo hepūnifeimbi moatūkuni ramarundi. Raniyo anihondūmbo-rihindeimbi nindou ranai Godindi worambe Soromonindi Yibadi sei arihūndi ranihū gugurimehindi. ¹³ Nindou bidifiri ranai moai ai-babidimbo fandihindi, ŋga ai aheimbo ahinimaye. ¹⁴ Raniyo nimorehi nindowenihi afindi hamindi ranai Adūkarimbo anihondūmbo-rihindūhi, asu weaŋgurūhi anihondūmbo-rihindeimbi maniboadei ahefihī pamarihindi.

¹⁵ Ranimbo-hūndamboyo nindou ranai aŋgūnūmbi nendi fufurihūmū-ndindūri hei nafi hohū fondiwami asu hoapari foasihi hehi kurimarihindūri. Ai hohoanimo-yeihīya, Pita ai ŋgu ŋgasūndeandani hūfihaminidnambo ahandi hūfihaminidhūndi yifiafi ranai boakimbifoareanda sei hehi. ¹⁶ Serusarem ŋgoafikimi ŋgoafi adaburo ranihūndambo nindou afindi ranai aŋgūnūmbi asu moaruwai nendi nimareimbi fufurihūmū-ndindūri tūkūmehindi. Raniyo nindou muŋguambo ranai aboedimehindi.

**Suda-yafe bogori ai hoafi sowandūmo homo-
rundeimbimbo yowani mehomopuri**

¹⁷ Hoafi sowandūmo homo-rundeimbi ai rani-moatūkuni ra ramarunda Godimbo sihou-rundeimbi ai Sadyusi-babidimbo ŋginindi-memo.

¹⁸ Raniyo ahamumbo kikihiripundūmo mburumbo karabusambe hinŋgimarupuri. ¹⁹ Ŋga asu nimbokoani Adūkarindi sūnambeahindi nendi ai karabus wori yipuri ra sūbūdimarihenda tūkūmefundi. Raniyo sūnambeahindi nendi ranai hoafiyuhū yahuya, ²⁰ “Ŋgomo Godindi worambe niŋgomombo nimorehi nindowenihimbo simbori hohoanimo ranahambo wataporimbo-ndundūri,” mehupuri. ²¹ Raniyo hoafi sowandūmo homo-rundeimbi ranai rani hoafi ra himbori-yomo houmbo Godindi worina siambe hondū homo nimorehi nindowenihimbo yamundi-marundūri.

Godimbo sihai-randeimbi ai ahandi wandafi-babidimbo tūkūyafundūhi-yomo Suda-yei kansir asu bogori hondū ahamumbo gugurife wataporimbo hoafimemo. Raniyo nindou bidifiri hoafi sowandūmo homo-rundeimbimbo karabus worambeahindi sepurimindimbo koamari-houpuri. ²² Ŋga asu nindou ranai homo himboyomondane, hoafi sowandūmo homo-rundeimbi ranai karabusi worambe moai nimarimo. Raniyo hihiriyafu homo Suda-yei bogori ranahamumbo hoafimemopuri. ²³ Ai homo hoafiyomondūhi yahomoya,

“Karabus wori yipuri ra paru mburumbo karabus hifandiru-rundeimbi ai yipuri hifandu maningomo. Iᅇga asu yipuri sübüdihoehü himboyefane, wori yanggiri mafondaro,” mehomu. ²⁴Karabus wori hifandiru-rundeimbi-yomondi bogoriyu asu Godimbo sesi sihou-rundeimbi-yomo ai rani-moatükuni ranahambo nününgufemboyo yahomo houmbo afindi hohoanimo-memo.

²⁵Nindou mami ranai süni hoafiyupurühi yahuya, “Himboriyomo, nindou se karabusimarūpuri ranana Godindi worambe nimorehi nindowenihimbo yamundürühi mbaningomo,” mehu. ²⁶Raniyo bogori-mayu ranai ratūpuriyomo-rundeimbi sepurimündü haya homo hoafi sowandümo homo-rundeimbi ra masiwapundümo. Iᅇga asu nindou yamundimarundüri ranaheimboya, “Yihoeᅇimbo nimoeinambo ndihūmunimboyei,” yahomo houmbo moai nini nününgurūpuri.

**Hoafi sowandümo homo-rundeimbi ranai yihombokoate-
kansirimbo Godindi hoafi wataporimbo-marundi**

²⁷Karabus hifandirundeimbi nindou ranai sowapurindümo homo guguriyafu wataporimbo-marundi ranambe Suda-yei bogori-yomondi himboahü wagabe hiningimarupuri. Godimbo sihai-randeimbi ai düdureapurühi yahuya, ²⁸“Ro sihamumbo nimorehi nindowenihimbo nindou ranahandi ndüri ranahambo wataporimbo yowani masefi. Iᅇga se wataporimbo marunda muᅇguambo nindou Serusarem ᅇgoafihü ranai sihamundi hoafi ra himborimaye. Ran-ane se yihoeᅇimboya, se-ruri nindou ranahambo hifokoamarūwuri yahomo houmbo papihoafarimuni,” mehomondamboyu. ²⁹Asu Pita ai hoafi sowandümo homo-rundeimbi bidifiri-babidimbo ningomombo simbori hoafiyupurühi yahuya, “Ro Godindi hoafi yanggiri animbo süᅇgundihumboyefi, ᅇga ᅇgiri hifi ndanihündambo nindou-yei hoafi ana süᅇgundihundi. ³⁰Se Sisasimbo nimi keimbi karihendeimbifihiti tikoründümo parūwuri mburūmbo hifokoa-mariwuriyosi. Iᅇga sihefi amoao-yei God ranai yifihündi botimariri. ³¹God ai sünambe serümündi hafu ahandi warihondü warani nindou siheᅇimbo aboedambofembo bogorimboriri hiningirira anüᅇgu. Ahandi süᅇgu animbo muᅇguambo Suda ai moaruwai hohoanimo hiningi-ndihindühi aboedi hohoanimo süᅇgundihinda ahei moaruwai hohoanimo ra amboawi mbüsūmbui. ³²Rani-moatükuni God ai ramareandi ra hoeirihu hoahu anihond-ane sefi wataporimborihu arihundi. Asu Yifiafi Aboedi ai-amboani anihond-ane yaho arandi. Asu muᅇguambo nindou didiyei Godindi hoafi süᅇgurihinda ranaheimbo Yifiafi Aboedi sagadüri arandi,” mehu.

**Gamarier ai kansirimboya hoafi sowandümo homo-
rundeimbimbo hiningirou-safindūpuri mehu**

³³Pita ai rani hoafi ra hoafimayuwa Suda-yei bogori nindou ranai ᅇᅇginindiyomondühi hoafi sowandümo homo-rundeimbi ranahamumbo

hifokoefepurimbo hohoanimo-memo. ³⁴Ŋga guguriyafu wataporimbo-marundi ranambe ahinūmbi hohoanimo yamunde-randeimbi nindou Farisihūndi mami ahandi ndūri Gamarier ahambo ahiniyei rihūndeimbi manūngu. Raniyu hoafi sowandūmo homo-rundeimbi ranahamumbo guguriyafu wataporimbo-marundi ranambeahindi akidou tūkumbeafundi mehu. ³⁵Hoafi sowandūmo homo-rundeimbi ranai botiyafu houmbo homondane Gamarier ai kansir ranahamumbo haofiyupurūhi yahuya, “Israer nindou se rani-moatūkuni ra hohoanimondimo hoeindundūhi animbo randundi mehupuri. ³⁶Se Tadius tūkūfi manūngu ra fifirundai. Ai hoafiyuhū yahuya, ‘Ro adūkari bogori nindou-anahi,’ mehua 400 nindou ahambo sūngumaruri. Ŋga ahambo gafman ai hifokoamariwura ahambo sūngururū-rundeimbi ai fefondūhi ahamundi ratūpuri ra hiniŋgimarundi. ³⁷Asūkai sūngunambo gafman ai ndūri semindambe Garirihūndi nindou mami ahandi ndūri Sudas amboani gafmani-babidi yifiarimbo nindou bidifiri masepurimūndu. Ai ahambo sūngururū-rundeimbi masepurimūndu, ŋga ahambo hifokoa-mariwuramboyo ahambo sūngururū-rundeimbi ranai mafefoundi. ³⁸Ranimboane ro haponda sihamumbo hoafehapuri, Se nindou ndanahamumbo nini nūnūngu-fepuripoani. Rani-moatūkuni ai rawarundi ra hifi ndanihūndambo nindou-yomondi ratūpurayo ana, ŋgiri aboedindo. ³⁹Asu rani-moatūkuni ra Godindi-mayoayo ana, se ŋgiri yowani mbisimo kikihi-ndūpurindūmo. Rawarundi ana, se God-babidimbo-anemo yifiar-ayomo,” mehuamboemo.

⁴⁰Suda-yafe bogori ranai Gamarierindi hoafi sūngurundūhi hoafi sowandūmo homo-rundeimbimbo miŋgiyomo hūrihoupora mahomondamboyo buburupuri mburumbo moani koarihoupurūhi yahomoya, “Se yowani nimorehi nindowenihimbo Sisasindi ndūri ranahambo wataporimbo-yondūripoani,” mehomopuri.

⁴¹Raniyo hoafi sowandūmo homo-rundeimbi ranai hihif-hihifi kapeihi mahomo. Sapo God ai ahamumbo Sisasindi sūnguna tiŋjirifo masagapuri ranimbo. ⁴²Raniyo muŋguambo si Godindi worambe asu nindou-yei worambe homo aboedi hoafi yamundi-rundūrihi nindou ranaheimboya, Sisas Krai ranana God ai ahandi nendambo aboedambo-fendūrimbo kafoariri hiniŋgi-marir-ani, mehomo.

**Hoafi sowandūmo homo-rundeimbimbo fehefembo
nindou 7 kafoaru hiniŋgimarupuri**

6 ¹Rani-simboani sūngurihindeimbi ranai afindi hamindi tūkumehindi. Raniyo asu sūngurundeimbi Grik hoafi hoafūmbi ai Aram hoafi hoafūmbi ranahamumbo ŋginiŋdimarundūri. Ai yaru hoafiyomondūhi yahomoya, “Muŋguambo si sehūndi nindou sesikoate-yeimbi ranaheimbo farihehindūri arihūndi, ŋga nimorehi kai rohūndi ranaheimbo ana moai farihehindūri rihūndi,” mehomo. ²Raniyo hoafi

sowandūmo homo-rundeimbi 12 ranai muṅguambo sūngurihindeimbi mborai yahomo hūrihoundūri houmbo hoafi yomondūhi yahomoya, “Asu ro Godindi hoafi bokarihēfe ra hiniṅgife hefe sesi yimbufe ana, aboedi hamindiyopoani. ³Ranimboane wandafi mami se siheiambeahindi nindou 7 ndofe fifirife hohoanimo asu Yifiafi Aboedi ahamundi fiambe nimaripureimbi kaboadu hiniṅgindūpuri. Ranimbo sihiri rani ratūpuri ra hifandimbo ahamumbo hiniṅgindihu-purimboane. ⁴Ranimbo asu ro nindoumo Godindi hoafi yamundife asu didibafife ra randihumboane,” mehomo.

⁵Muṅguambo nindou ranai rani hohoanimo ranahambo yifirimayei. Raniyo Stifen ṅginindi anihondūmbore haya Yifiafi Aboedi ahandi fiambe adūkari nimaroweimbiyu, Firip, Prokorus, Nikanor, Timon, Parmenas asu Nikoras Suda-yafe ndifohūndi ahei rotu sūngureandeimbiyu. ⁶Nindou ranahamumbo hoafi sowandūmo homo-rundeimbi-yomondi himboahū hiniṅgimarupuri. Raniyo rani ratūpuri ra refembohūnda kafefe hiniṅgifembo ahamundiwami wari nandu houmbo didibafimefundi. ⁷Raniyo Godindi hoafi ranai muṅguambo hifi hoahoangohū Serusaremiḥū nindou sūngurihindeimbi ranai adūkari tūkūmehindi. Raniyo asu Godimbo sihou-rundeimbi afindi ranai hoafi ra himboriyomondūhi anihondūmbo-marundi.

Suda ai Stifenimbo papi-hoafimaruri

⁸Stifenimbo God ai aboedi-aboedirirūhi ṅginindi masagadowa nimorehi nindowenihiyei mbusūmo hepūnifeimbi moatūkuni yare marandi. ⁹Asu Suda-yafe rotu, moani ratūpurambeahindi aboedambomehindi sei arihūndi ranambeahindi nindou bidifiri ranai tūkūyafu Stifen babidimbo hoafinambo simbori hoafi-memo. Aiana Sairini, Areksandria ṅgoafi asu Sisiria, Esia profens hūndi-yomo. ¹⁰Ŋga asu Yifiafi Aboedi ranai Stifenimbo fariherūhi ahandi hoafi ranai ṅginindiyo haya ndorihoeimbi-mayoa moai ai-babidimbo hoafinambo simbori-simbori-yomo.

¹¹Raniyomo nindou bidifirambo dibo hūti-hūti-marūpuri ho hoafiyowohūya, “Ro himboriyefani Stifen ai Moses asu Godimbo tirifoefe hoafimayu,” yahombo. ¹²Ramehomo-ndamboyo Suda-yafe bobaagori, ahinūmbi hohoanimo yamundu-rundeimbi asu nindou muṅguambo aheimbo ṅgusūfoambe moaruwai-marandūri. Raniyo homo Stifenimbo kikiḥirundūmo houmbo Suda-yafe bobaagori-yomondi fandife hoafi fifirife ranambe sowarūndūmo mahifomo. ¹³Raniyo nindou bidifiri sowapurindūmo hiniṅgimarupuri tikefehefe Stifenimbo wosihoaforiyuhūya, “Nindou ndanai ana Godindi wori asu Mosesindi ahinūmbi hohoanimo ranahambo tirifoefe hoafimayu. ¹⁴Ro himboriyefani ai hoafiyuhū yahuya, ‘Sisas Nasaretihūndi ai

wori nda biriboade mbunda asu Mosesindi hohoanimo horombo sihefimbo masendi ra ŋgorū-sūngundeambui, mehu,” mehomomo.
 15 Muŋguambo nindou hoafi fifirifembo gugurimefundi ranai Stifenindi ŋgusūmboarambe hoeirundane, ahandi ŋgusūmboari ranai sūnambeahindi nendi-yomondi ŋgusūmboari nahuraimayo.

Stifen ai kansirimbo hoafi bokarimarihendi

7 ¹ Godimbo sihai-randeimbi adūkari bogori ranai Stifenimbo dūdurirūhi yahuya, “Ndani-moatūkuni wataporimbo-arundi ra anihondūyo?” mehuamboyo. ² Asu simbori Stifen ai hoafiyuhū yahuya, “Amongo mam-anemo asu ape mam-anemo, awi se wandi hoafi himbori-yomo. Sihefi amoa Abraham ai Haran ŋgoafinambo hokoate Mesopotemia hifihū nūngambe Adūkari God Ŋginindeimbi ranai ahambo-o tūkumefiyu. ³ Raniyo God ai hoafiyundowohū yahuya, “Sihafi hifi asu fikiminindi hiniŋgindo hawa ŋgorū hifi ro nafuindahani raninambo ŋgafi,” mehundo. ⁴ Raniyo Abraham ai Kardia hifi hiniŋgire haya hu Haran ŋgoafihū manūngu. Asu ahandi afindi ai yifimayuamboyo God ai koamariheira haponda se aniŋgomo ndanihū hihirifi sūni manūngu. ⁵ God ai moai Abrahamimbo hifi ra akidou-amboani kikireando. Ŋga Abraham ai nimorikoate-yuambe God ai hoafiyuhūya, “Hifi nda ndahaninani sihafi nimori asu ahuirihoandi ahei hifindimboe,” mehundo. ⁶ God ai Abrahamimbo ndare hoafiyundowohū yahuya, “Sihafi ahuirihoandi ranai hifikoate-ndei hehimbo ŋgorū nindou-yei hifihū ŋgei nimboeimboyei. Rananimbo nindou rani hifihūndi ranai 400 himbani aheimbo moani ratūpuriyei rihūndeimbimbo ndihindūrūhi moaruwaimbo-ndihindūrimboyei. ⁷ Ŋga asu sūngunambo ana nindou didiyei aheimbo moani ratūpuriyei rihūndeimbimbo-arihindūri ranaheimbo tiŋirifo ndahandūrimboyahi. Asu sūngunambo ahei nimori ai rani hifi ra hiniŋgindihi hehi ndūhi didei wambo ŋgusūfo pandihindūrimboyei. ⁸ Fihoeari kefe tirihefe hohoanimo ra God ai Abraham-dibo hoafi firamūndi masihendi. Raniyo sūngunambo Abraham ai ahandi nimori Aisakimbo 8 siyuambe fihoeari kari tirimariherū. Aisak amboani ahandi nimori Sekopimbo hoeari kari tirimariherū, asu Sekop amboani ahandi nimori 12 sihefi amoa mami ahamumbo ramareapuri.

⁹⁻¹⁰ Sekopindi nimori apodoho mami-memo ranai ahamundi akidi Sosepimbo yiiboaruko-rūwurūhi-yomo Isipinambo moani ratūpuriyo randeimbi nindoumbo-fembo nindou-yomondi warihūmarūwuri. Ŋga God ai, ai-dibofihū ahandi tiŋirifo ranambeahindi aboedambomariri. God ai Sosepimbo ndorihoeimbi fifirife masagado ranimbo ahandi adūkari bogori ranai ahinirūrūhi hohoanimoyundo marandi. Ranimboyo Isip-yafe adūkari bogori ranai gafmani-yomondi adūkari bogorimbomarira ahandi worambe muŋgu-moatūkuni eŋgoro ra hifandimarandi.

¹¹Raniyo sūngunambo Isip asu Kenan hifihū yahimo afindi tüküfehū nūmbūrihūndi sesi yapatapariyohū sesikoate-yeihi wembo afindi tükūmefeyo. Raniyo Sekopindi nimori sihefi amoa mami ranai sesikoate-memo. ¹²Ūga asu Sekop ai Isipihū wit engoro hoafi himboriyu haya ahandi nimori sihefi amoa mami ra weaŋgurūhi hondū koamarihepuri. ¹³Asūkai hihiriyafu mahomondamboyo Sosep ai ahandi amoŋgo mamimbo ro Sosep-anahi mehua asu Isip-yafe adūkari bogori ranai Sosepindi amoŋgo mami ra fifirimareapuri. ¹⁴Raniyo Sosep ai ahandi afindi Sekop asu fikiminindi 75 nimorehi nindowenihi ra semindindūri Isipinambo hombohūnda nindou koamarihepuri. ¹⁵Raniyo Sekop ai ahandi nimori-babidimbo homo Isipihū ningomombo sihefi amoa mami ra ranihū muŋgu yifisafimemo. ¹⁶Raniyo asu ahamundi fi-nimoko ra Sekem ŋgoafinambo sowapurindūmo mahifomo hifi-kefepurimbohūnda. Sapo Sekem ŋgoafihū horombo Abraham ai Hamorindi nimori-yomondi-mayo yifi samboefembo hifi kakinambo pemimayu ranambe samboefe-purimbohūnda.

¹⁷Horombo God ai Abraham-dibo hoafi firamūndi masihendi ra asu anihondū tüküfehū Israerihūndi nindou Isipihū animboei ranai afindi safi tükūmehindi. ¹⁸Asūkai sūngunambo nindou mami Sosepimbo fifirifikoate ai adūkari bogorimbofi tükūfi haya Isip hifandimarandi. ¹⁹Raniyo sūngudidi adūkari bogori-mayu ranai sihefi amoa mamimbo wosihofori-randūrihi aheimbo moaruwaimbo-mareandūri. Raniyo ahei nimori ra yifisafimbeyeia yahuhaya moanambūhi hiningifendūrimbo hūtihoafimarandūri. ²⁰Rani-simboaniyo Mosesimbo hondi ai wakimarimindoa aboedi himbomayua asu God ai ahambo hohoanimomayundo. Raniyo Mosesimbo ahandi afindandi worambe ŋgimi amoamo hifandimarihori. ²¹Asu Mosesimbo moanambūhi masihehoramboyo Isip-yei adūkari bogorindi nimorehi nimori ai serimindi haya ahandi nimorimbore moaŋguimariri. ²²Raniyo Isipihūndi ranai Mosesimbo ahei muŋguambo hohoanimom aboedi ra yamundimarihori. Asu ai ŋginindi nindouyu haya muŋgu-moatūkuni ai hoafiyuhū yare marandi.

²³Moses ai 40 himbaniyu haya ahandi nendi Israer aheimbo ho hoeifendūrimbo hohoanimom-mayu. ²⁴Moses ai huane Isipihūndi nindou mami ai Israerihūndambo moaruwaimbomariri. Raniyo Israerihūndimayu ranahambo hoarehirūmūndi haya Isipihūndi-mayu ranahambo buburūri hifokoamariri. ²⁵Moses ai ahandi nendambo hohoanimoyuhūya, God ai wandi wari sūngu afarihendūri ra fifirimbirihi-ndamboane mehu, ŋga ai moai fifirihindi. ²⁶Ūgorū sinambo asūkai huane Israerihūndi yimbu ranai yifiari-mayafandamboyo kikifepirimbo mehu. Raniyo hoafiyupirūhi yahuya, 'Se nimboe simbori buburūri-ayafandi, ŋga se-ana apodoho-anafani,' mehupiri. ²⁷Raniyu nindou ŋgorū, ŋgorū-dibo yifiari botimareandi ranai Mosesimbo ninindiri pirirūhi yahundoya,

‘Düdi sihambo yihoefi bogorimbore asu nindou yiboboferambore hiniŋgimareanina?’ ²⁸ Se hamani Isipihündi hifokoamariwori nou asu wambo hifokoa-mandowandiriyo?’ mehuamboyu. ²⁹ Moses ai rani hoafi himboriyu haya Isip hifi hiniŋgire haya hu Midian hifihü manüŋgu. Ai ranihü nüŋgumbo süŋguna nindouwenihi nimori yimbu kamareapiri.

³⁰ Asu 40 himbani howane süŋgunambo sünambeahindi nendi ranai Mosesimbo-so nimi-wohi furikoate-reandühi Sainai wafukimi nimiwami hai imami ambere tükümeŋfiyu. ³¹⁻³² Moses ai rani-moatükuni ra hoeire haya hepünifi afindi hohoanimoyuhü akimi türüfoefe hoeifembo mahu. Raniyo Adükari ai hoafiyundowohü yahuya, ‘Ro sihafi amoao mami, Abraham, Aisak, Sekop ahamundi God-anahi,’ mehuamboyu Moses ai hiamindariyuhü hoeifembo yihimbomayu. ³³ Adükari ai hoafiyundowohü yahuya, ‘Sihafi yiri hoeari ra safurihoefi ŋga, se hifi haponda animbafi ndanana wandi yaŋgir-ane. ³⁴ Wandi Israer nindou ranaheimbo Isipihü nine moaruwai moatükuni ramarihindi ra hoeiriheandi. Asu ro ahei arani ra himboriya heheamboyahü Isipiyei warambeahindi aboedambo-fendürimbo makosahi. Ranimboane haponda Moses sihambo asüakai Isipinambo koandiheheanina ŋgamboyafi,’ mehu.

³⁵ Moses mami ranahamboyo weaŋgurühi Israerihündi yimbu ai hoafiyafinandowohüya, ‘Düdi sihambo bogorimbo-mareanini asu hoafi himboriyohü yiboboferambo mareanina?’ masafinando. Asu mami aiyu God ai sünambeahindi nend nimiwami hai imamiambe tükümeŋfiyu ahandi ŋginindinambo ahambo bogorimbofe asu Israerimbo aboedambofembo koamarisherü. ³⁶ Moses ai Israerihündi nindou ranaheimbo Isipihündi semündündüri mahu. Ai hepünifeimbi moatükuni Isipihü asu Hambur siriwara ranihü rareandühi 40 himbani nimiwohi furikoate-reandühi maniboadei. ³⁷ Moses mami ranaiyu Israer nindoumbo hoafiyundürühi yahuya, ‘God ai ahandi hoafi hoafiyu-randeimbi ro nahurai seambeahindi ndagadürimbui’ mehündüri. ³⁸ Moses mami ranaiyu Israer-babidimbo nimiwohi furikoate-reandühi guguriyahi mamarei. Asu ahamboyu Sainai wafuambe sünambeahindi nendi ai hoafimayundo. Ai Godindi hoafi yaŋgiri niŋgo hohoanimo sairandeimbi ra semündü haya sihefimbo masendi.

³⁹ ŋga sihefi amoao mami ranai moai Mosesindi hoafi himboriyei. Ai ahandi hoafi sahümündi pirihi hehi asüakai Isipinambo hombo hohoanimomaye. ⁴⁰ Ai Aronimbo hoafiyahündowohü sahündoya, ‘Moses ai yihoefimbo Isipihündi semündümuni masüfu, ŋga ahambo nini-moatükuniyo tükümeŋfeyo ra ro moai fifirihundi. Ranimbo animbo se god mami nafindandani ai yihoefimbo aboedi nafi semündümuni mbihuwamboane,’ masei. ⁴¹ Raniyo nindou-maye ranai tikai god burmakau nimori nahurai nafirühü mburihü sesi sihehindühi warinambo hüti nafiyoweimbi tikai god ranahambo hihifi-hihifimaye. ⁴² Ranimboyo

God ai aheimbo daboadi hihiri-mareandūra ai hüfihamindi, amoamo, mupui ranahambo hohoanimomayei. Sapo Godindi hoafi hoafiyomorundeimbi-yomondi bukambe mapeniŋgo süŋgu. God yahuya,

“Israer, se nimi wohi furikoate-reandühi 40 himbani manimboei ra moai wambohünda sesi sihehindi.

43 Se ser worimbombo sahümündi mahei ra wambo-hündambo-yopoani,

ŋga tikai god Morek asu

Refan rani god sisami mupuiyo nafirühü mburihü hohoanimoyei marihündi.

Ranimbo-hündambo animbo ndühindambo koandihe-heandürani

Babiron hifinambo ŋgeimboyei,”

Amos 5:25-27

mehu.

44 Nimi wohi furikoate-reandühi nimboeiambe worimbombo ser ra ai-babidimbo meŋgoro ranambeyo God ai sihefi amoao mamimbo hoafiyu marandi. Ser raninambo worimbombo hohoanimo ra God ai Mosesimbo hoafimayu-ndowamboyo ahandi hohoanimo-mayu süŋguru worimbomarundi. 45 Asükai süŋgunambo amoao mami ranahei nimori ranai ser ra sahümündi hehi Sosua-babidimbo ŋgorü nindou-yei hifi kosemindimbo mahei. Sihefi amoao mami ranai tükümehindamboyo God ai ahei himboarühi ŋgorü nindou ranaheimbo hemafoareandüri. Raniyo ser raninambo worimbörühü hiniŋgirihihinda niŋgo hombo adükari bogori Defit niŋguambe tükümeŋyo. 46 Sapo Defit, God ai ahambo hihif-hihifiyundo-randeimbi-mayu ranai didibafifihi yahuya, ‘Se yini mbisafani, ro Sekopindi God sihambo aboedi wori worimbondiha,’ mehundo. 47 Ŋga Soromoniyu Godindi wori ra worimbomarandi. 48 Ŋga God Nimoamo Hondü ranai ana moai wori nindou worimbo-rundeimbi ranambe namaru, sapo Godindi hoafi hoafiyu-randeimbi ai hoafimayu süŋgu. 49 God ai hoafiyuhü yahuya,

‘Sünü ana wandi nimarimbo muŋgu-moatükni hifandimbo fond-ane, asu hifi ana wandi yitiŋari pühiyo nimarimboane.

Asu se wambohünda nini-moatükuni wori worimbo-mandundiyo?

Asu ro fi hefe nimari fondimbo ra hohoanimoyahai?

50 Sapo se fifiri-ndihindi ro wandi warinamboyo muŋgu-moatükuni ra nafimarihandi,’

Aisaia 66:1-2

Adükari ra mehu,” mehu.

51 Stifen ai kansirimbo hoafiyupurühi yahuya, “Sihamundi hohoanimo ana anihondümbofekoate nindou-yei nahurai tapihamiyomboane. Se-ana himboambekoate-yomondühi moai Godindi hoafi himbori-yomo rundi. Ranimboane se Yifiafi Aboedindi hoafi himborikoate-ayomo sihamundi amoamami ramefundi nou. 52 Sihamundi amoao ai Godindi hoafi hoafiyomorundeimbi horombo hondü maningomonda hifokoefepurimbo

mehomo. Ranai horombo hondū hoafiyomondūhi yahomoya, ‘Sūngunambo nindou mami Mbumundi Hohoanimo-yurandeimbi tükündüfimbui,’ mehomu, ŋga sihamundi amoao ai hifokoamarūpuri. Asu se haponda ranahambo daboadi hihirundūhi hifokoamarūwuri. ⁵³Se Mosesindi ahinūmbi hohoanimo God ai sūnambeahindi nendandi sūngu masagado ra masahūmūndiyosi, ŋga se moai sūngurihindi,” mehu.

Stifenimbo nimoeinambo hifokoamarūwuri

⁵⁴Kansiri-memo ranai rani hoafi ra himboriyomo houmbo Stifenimbo ŋginindirurūhi yahafi hitimarundi. ⁵⁵Ŋga Yifiafi Aboedi ranai Stifenindi fiambe farifehūyo sūnambe himbomayu hafu. Raniyo ai Godindi himboamupuimbo-randeimbi si ra hoeireandane, asu Sisas ai ahandi warihondū warani manūngu. ⁵⁶Asu Stifen ai hoafiyuhū yahuya, “Himboriyomo! Ro hoeiriheanda sūnū ai bureandūhiyo Nindou Hondū ranai Godindi wari hondū warani manūngu,” mehu.

⁵⁷Ai rani hoafi ra himboriyomo houmbo, himbo tūhifo warinambo kikiru papirūndūmo mburu pukūna hoafi karihoemo houmbo pipiyomo homo Stifenimbo kikihimarūndūmo. ⁵⁸Raniyo ŋgoaf-ambeahindi moanambūhi sowarūndūmo homo hifokoefimbo yahomo houmbo nimoeinambo hūfūtimaruri. Nindou horombo ahambo papi-hoafimaruri ranai ahamundi wari hoandari ŋgisihari hoeari ra yimūndūndūmo nindou mami hoarifi ahandi ndūri Sor ahandi yirikimi kurimarundi. ⁵⁹Stifenimbo nimoeinambo hūfūtirtūwurambe didibafifihi yahuya, “Adūkari Sisas, se wandi yifiafi ndowandifi,” mehu. ⁶⁰Ai piyu yimīndoho yimbunambo nimarūmbo pukūna hoafi karihoehū yahuya, “Adūkari se yowani ahamumbo moaruwai hohoanimo ndanimbohūnda **8** tiŋjirifo segupuripoani,” yahu mbura yifimayu. ¹Stifenimbo hifokoamarūwuri ra Sor ai aboed-ane, mehu.

Sor ai Sisasimbo anihondūmbo-rihindeimbimbo moaruwaimbo mareandūri

Rani-simboani mūnguambo anihondūmbo-rihindeimbi Serusaremihū maniboadei ranaheimbo piyei hehi moaruwaimbo marihindūra Sudia asu Samaria-yafe hifina bukūrūmayei. Ŋga hoafi sowandūmo homo-rundeimbi ai yanggiri Serusaremihū manīngomo. ²Anihondūmbo-rundeimbi nindou bidifiri Godindi hohoanimo yanggiri sūngurundeimbi ai Stifenimbo pukūnambo aranihoafiruri mburu hifi-kamarūwuri. ³Raniyo asu Sor ai anihondūmbo-rihindeimbi-yafe hohoanimo moaruwaimbo-reandūrihū hu worini-woriniyuhū worambeahindi nimorehi nindouwenihi kifi hūramūndūndūri hu karabusambe hiniŋgireandūri marandi.

Firip ai Sameria ŋgoafihū aboedi hoafi bokamarihendi

⁴Anihondūmbo-rihindeimbi ai mūnguambo ŋgoafi bukūrūmayei ranihū aboedi hoafi bokarihoemo marundi. ⁵Raniyo asu Firip ai

Sameria-yafe adūkarī ŋgoafina hanū Sisasimbo ai Kraisi-ani yahu wataporimbo-marandi. ⁶Raniyo asu nindou afindi ranai ahandi hoafi himboriyeihī hepūnifeimbi moatūkuni ramareanda hoeirihindūhi ahandi hoafi wudipoaporihī himborimayei. ⁷Nindou ranahei fiambe moaruwai nendi mamarondūriyosi, ŋga Firip ai hemafoareandūra wurūniyombo gorefoendūhi nindou ranaheimbo hiniŋgimarhindūri. Asu nindou afindi yiri wari nimokoyeimbi tiŋari moaruwaimbū ranai-amboani aboedimayei. ⁸Raniyo asu nindou afindi ranai rani ŋgoafihū afindi hihifi-hihifi-mayei.

⁹⁻¹⁰Ŋga nindou mami ahandi ndūri Saimon rani ŋgoafihū manūngu. Ai himoarokora randeimbiyu, raniyo asu Samariahūndi ai hepūnimehindi. Saimon ai hoafiyu randūhiya, “Ro adūkar-anahe,” yahu marandamboyei, amonŋgohoandi asu akohoandi muŋguambo ahandi hoafi wudipoaporihī himborimayei. Nindou ranai hoafiyeihī seiya, “Nindou ra ŋginindeimb-ani asu ŋginindi ra Godindi nahurai adūkar-ane,” sei marihūndi. ¹¹Asu Saimon ai afindimbo ŋgoŋgoani hoafi yare maranda hepūnahindūhi ahandi sūnguyahi marihūndi. ¹²Ŋga Firip ai God ŋginindi hifandarandi asu Sisas Kraisi aboedi hoafi ra wataporimbo maranda nimorehi nindouwenihī ranai Firipindi hoafi himboriyeihī hundūrumayei.

¹³Saimon amboa Godindi hoafi anihondūmbo-mareanda ahambo hundūrumarūra asu Firip-dibo manūngu. Ai hoeireandane, Firip ai hepūnifeimbi moatūkuni ramareanda, asu ai afindi hohoanimo-mayu.

¹⁴Ŋga asu raniyomo hoafi sowandūmo homo-rundeimbi Serusaremihū manūngomo ai hoafi himboriyomondane, Samariahūndi ai Godindi hoafi anihondūmbo-marihindi. Raniyo Pita asu Son aheimbo sowana koamari-haupira mahanifani. ¹⁵Ai tūkūyafine anihondūmbo-rihindembi-mayei, ranaheimbo-hūndambo Godimbo didibafi-yafineandūhi safaniya, “Sihafi Yifiafi Aboedi aheimbo dabadūri,” masafani. ¹⁶Nindou ranai Sisasi ndūrinambo yaŋgiriyei hundūrumayei. Ŋga awi moai rani simboni Yifiafi Aboedi ai aheiwami koso. ¹⁷Ŋga asu sūngunambo hoafi sowandifani hafani-rinandeimbi ai ahafandi wari aheiwami nandine mburinambo, didibafi-mefineanda, Yifiafi Aboedi ranai aheiwami makoso.

¹⁸Saimon ai hoeireapirane hoafi sowandifani hafani-rinandeimbi ai ahafandi wari aheiwami manandineanda, Yifiafi Aboedi aheiwami makoso. Raniyu asu Saimon ai kaki semūndū-haya, ahafanimbo sowana hu hoafiyupirihū yahuya, ¹⁹“Ŋginindi ra wambo amboa seneandiri, rananimbo asu ro-amboa wandi wari nindou ranaheiwami nandiheandani, Yifiafi Aboedi aheiwami mbikoso-amboane,” mehu. ²⁰Ŋga Pita ai simbori hoafiyuhū yahuya, “Rani-moatūkuni God ai moani asendi ra, asu se nimboe kakinambo pemimbo hohoanimoayafa? Ranana se sihafi kaki rani bitapindo yifindamboyafi. ²¹Se ŋgiri Godindi-mayo ratūpuri ndanambe keboawandi. Nimboe sapo sihafi

hohoanimo ra Godindi himboahū aboediyopoani, nga moaruwai-ane. ²² Nga ranimboane se didiboadindo hohoanimondafūhi animbo, sihafi moaruwai hohoanimo randūhindo hiniṅindowandi. Asu se Adūkarimbo didibafindafoando rananimbo ai sihafi ṅgusūfoambe moaruwai hohoanimo ra amboawi mbūsūmbui. ²³ Ro fifiriheandi, se-ana hohoanī afindeimbanafi asu sihafi ṅgusūfoambe moaruwai rani hohoanimo ranane nimaririnimbo hifandaranini,” mehu. ²⁴ Saimon ai simbori hoafiyuhū yahuya, “Se wambo farihefembohūndambo Adūkarimbo didibafindafoandani animbo, asu ranani moatūkuni se hoafimayafi ra ṅgiri tūkūndifeyo,” mehu.

²⁵ Asu Pita weimbo Son ai nini-moatūkuni Adūkari ai ramareandi ra ai hoafiyafinandūri mburinambo, asūkai Serusareminambo hihiriyafine mahahūfani. Nafinambo hahūfandūhi, Samaria-yafeihi muṅgua ṅgoafi adaburo ranaheimbo Adūkarindi hoafi ra bokamariheneandūri.

Firip ai Itiopia-hūndambo aboedi hoafi bokamarihendi

²⁶ Sūnambeahindi nendi mami ai Firipimbo Serusaremiḥū hoafiyuhū yahuya “Botiyāfo, gebū Gasa ṅgoafinambo nindou ṅgoafi naṅgokoateyo nafi gadifi,” mehu. ²⁷ Raniyu asu Firip ai botifi yaha hanūhi rani nafihū Itiopiahūndi mami hoeimariri. Nindou ra Itiopia-yafe adūkari bogori nimorehi Kandas ahandi kaki hifandirandeimbi bogoriyu. Nindou ranai timoefi kariwurimb-ani. Ai rotumbo-hūndambo Serusareminambo mahafu. ²⁸ Asūkai ahandi karisambe ṅgoafina hihirifi mahu. Karisambe huhū Aisaia Godindi hoafi hoafiyu randeimbi ai bukambe sūrū papimarandi ra nafina hūbudūmara hu. ²⁹ Raniyo Yifafi Aboedi ai Firipimbo hoafiyohū yahoya, “Akimi ṅgafi karisi-kimi nimbafi,” meho.

³⁰ Raniyu Firip ai pipiyu hu, karisi fikimi-fiyuane, nindou ranai buk Aisaia sūrū papimarandi ra ritimimaranda himboriyu haya dūdufihī yahuya, “Hoafi se ritimimarandi ra awi fifirohawambo wamboayafi?” mehuamboyu. ³¹ Asu ai simbori hoafiyuhū yahuya, “Nindou wambo hoafi ranahandi nimindi fifirife hoafikoate-ayu ana, ro ṅgiri aboedi fifirindiheandi. Nga se mborai sihūfi, fareafu, ro-dibo karisambe nimandembo,” mehundo.

³² Nindou buk hoeimareandi ranai ndare hoafiyohū yahoya, “Ahambo sipsip hifokoefembo sowandūmo ahomo nahuraiyo sowarūndūmo mahomo.

Sipsip wei ninendi tūpuri-hehindani, heikoate-ayo nou nindou nda moai simbori yafambe fare hoafiyu.

³³ Ai ahambo amoani-ṅgeimbi moatūkuni rarihindūhi moai didiboadorihori papi-hoafirihori.

Hifi ndaniḥū hifokoa-marūwura ai nimorikoate yifimayu, ranimboane ahandi nimori niṅgo-koateyeyi,” meho. *Aisaia 53:7-8*

³⁴Kaki hifandira randeimbi ranai Firipimbo düdufindowohü yahuya, “Hoafindafindiri, Godindi hoafi hoafimbi ra dabui hoafimayu? Ahandi fimboyu, asu nindou ngorümboyu?” mehuamboyo. ³⁵Raniyo asu Firip ai ahambo Aisaiandi buk ranihü piyu hayambo, Sisasindi aboedi hoafi ra yamundimariri.

³⁶⁻³⁷Ai nafisüngu hanifani, himoni tükümeFINEANDI. Nindou kaki hifanda randeimbi ranai hoafiyuhü yahuya, “Hoeiro, hoe apuiaro ra, nga wambo hundürüyondirimbo ra moai nini-moatükuni gureandiri,” mehu. ³⁸Nindou ranai karis ngiḡḡini-mareanda manḡgo. Raniyafani hanifani himoni kosifoene Firip ai ahambo hundürümarüri. ³⁹Hoe hiniḡgirine hena hahüfandane, Adükarindi Yifafi ai Firipimbo nimai serimindi maho. Nindou kaki hifanda randeimbi ranai Firipimbo moai asukai hoeiriri, nga nindou ranai ahandi nafisüngu hihif-hihifi-kameihi mahu. ⁴⁰Firip ai Asdot ngoafihü tüküfi haya Sisasindi aboedi hoafi wataporimbora hüfumbo Sisaria ngoafihü tükümeFIYU.

Sor ai Sisasimbo anihondümbo-mariri

9 ¹⁻²Rani-simboani Sor ai Adükarimbo süngurihoreimbimbo hifokoako-foefendürimbo hoafi, hoafiyumarandi. Raniyu asu Godimbo sesi sihai-randeimbi bogori adükari sowahi hu, hoafiyundühi yahuya, “Damaskus ngoafihü Suda-yei rotu worambe fandihü arihündi ranaheimbo pas papinda koandihawandi. Pas ranambe hoafindafühi animboya, ‘Sor ai nindowenihiyu nimorehiyo Sisasindi nafi süngurihindeimbi ranaheimbo hoeiareandüri ana, watiḡari hüputüpu-ndihendüri ndemündündüri Serusaremina ngumbui,’ mbisafi,” mehu. ³Raniyo asu Sor ai pas ra semündü hu Damaskus ngoafikimi tüküfiyuane, nimehünou sünambeahindi wabürüsi nahurai ahandi fihü sümafoareandi. ⁴Sor ai hifini piyu yaḡgurimbo himboriyuwane, hoafi mami hoafiyondowohü yahoya, “Sor, Sor, nimboeafi se wambo moaruwaimbo arowandiri?” mehondo. ⁵Raniyu asu ai simbori hoafiyuhü yahuya, “Adükari, Se didiyafa?” mehuamboyo hoafi ranai simbori hoafiyondowohü yahoya, “Ro Sisas-anahi, se wambo moaruwaimbo arowandiri. ⁶Se botiyafo, hawa adükari ngoafinambo ḡgafi. Ranihü nindou mami ai se nini-moatükuniyo refembo ra hoafindüninimbui,” mehu.

⁷Sor-babidi nindou mahomo, ranai hoafikoate homo manḡgomo. Hoafi ra himboriyomo, nga asu nindou fi ra moai hoeirüwuri. ⁸Raniyo Sor ai botifi himboari birihoei himbomayu, nga asu moai nini-moatükuni hoeireandi. Raniyo asu nindou ai-babidimbo mahomo ranai Damaskusinambo wamburündumo mahomo. ⁹Asu ḡgimi sihi ahandi himboari ranai rahurai yaḡgiri manḡgo howa moai sesi sesü, hoe sümündi randi.

¹⁰Sisasimbo sūngureandeimbi nindou mami Damaskusihū manūngu ra, ahandi ndūri Ananias. Ai ranipoani moatūkuni yafogoadinambo nahurai hoeireandane, Adūkari ai hoafiyuhū yahuya, “Ananias,” mehuamboyu. Ananias ai yahuya, “Adūkari, ro-ana ndanimboahinda,” mehu. ¹¹Adūkari yahuya “Botiyafu hawa, Nafi Mbumundi aho rasūngu ŋgafi Sudasindi worambe se Tarsusihūndi nindou mami hoeindiworimboyafi, ahandi ndūri Sor. Ai didibafiyuhū mbamarū. ¹²Sor ai yafogoadinambo nahurai ranipoanimbo moatūkuni ranambe hoeireandane, nindou mami ahandi ndūri Ananias ai ahandi himboari birimbihoyuwambo yahu haya worambe kefuai nindou ranahandi wami wari manandeandi,” mehu. ¹³Ŋga Ananias ai simbori hoafiyuhū yahuya, “Adūkari, nindou afindi ai Sorimbohūnda wambo hoafimehūndiri. Sihafi nindou Serusaremi hūndi ranaheimbo moaruwaimbo mareandūri, ranahambo. ¹⁴Godimbo sesi sihou-rundeimbi bogori ai ahambo kamafoariwuri, ai nindou afindi ndanihū sihafi ndūrimbo hohoanimo yeihi didibafi-yahūnini arihūndi ranaheimbo karabusi-fendūrimbohūnda,” mehu. ¹⁵Ŋga Adūkari ai Ananiasimbo hoafiyunduhū yahuya, “Se ŋgafi. Nindou ra wandi ratūpuriyu-randeimb-ani. Suda-yafe ndifo, nindou adūkari bogori, asu Suda, ranaheimbo sowana hombo, ai wandi ndūri fifirifembohūnda kamafoarihin-ani. ¹⁶Muŋguambo tiŋirifo wambohūnda ahambo tūkūndifemboe ra ro ahambo nafuindahan-domboyahi,” mehu.

¹⁷Raniyu asu Ananias ai hu, worambe kefuai, Sorindi wami ahandi wari nande haya hoafiyundūhi yahuya, “Wandafi Sor, Adūkari Sisas nafini sihambo sowahi tūkūmefiyu ranai wambo koamarihendira makosahane se asūkai wudipoapofe himboariyo asu Yifiafi Aboedi sihafi fiambe tūkūfembohūnda,” mehu. ¹⁸Raniyo asu himboarihū kini yapuri nahurai foare mapaiaro ranai nimai foarihoai pirimayo-wamboyu asu wudipoapore himboari-mayu. Ai botifi mamaru-wamboyo ahambo himoni hundūrumarūri. ¹⁹Asu sūngunambo Sor ai sesi sesūhiyu, ahandi fi ra ŋginimarimindo. Ai Damaskusihū yahunūmbi si Sisasimbo sūngururū-rundeimbi-babidi manūngu.

Sor ai aboedi hoafi Damaskusihū hoafimayu

²⁰Ai nimehūnou Suda-yafe rotu worambe hoahoangu waikire randūhi yahuya, “Sisas ra Godindi nimor-ani,” yahu marandi. ²¹Ahandi hoafi himboriyeihi, hepūnahi hehi, hoafiyeihi seiya, “Nindou ndanimbaiyu Serusaremi hū nindou afindi Sisasindi ndūrina didibafiyei arihūndi, ranaheimbo moaruwaimbo-rendūri marandi? Raniyo horombo ndanihū Sisasimbo sūngurihori-rihūndeimbimbo watiŋari hūputūpuhefe semindi Godimbo sesi sihou-rundeimbi bogori sowana hombo hohoanimo-mayu ranimbeyu?” masei. ²²Sorindi hoafi ŋginindi ho-hombo adūkari

tüküme feyo. Asu ai Sudahündi Damaskus ngoafihü aniboadei rani-babidi watapori-mayua ahei hohoanimoambe seiya ninihoafiyo anihondayo masei. Raniyo asu ai anihondumbo hamindi aheimbo nafuiyundürühi yahuya, Sisas ra Nindou God ai nindou aboedambo-fendürimbo kamafoarir-ani mehu.^b

Sudahündi Sorimbo yiboaruko-marihora mafifoendi

²³ Afindi siyo-hayamboyo, Suda ai hoafi firündümo sihou hou hoafiyomondühi yahomoya, “Sihiri Sorimbo hifokoa-ndihurimboane,” mehomo. ²⁴ Iḡga asu rani hoafi ra Sor ai himborimayu. Raniyo asu nimbi-nimbi si Suda ai ngoafi adükari nimoei giniri yipurikimi Sorimbo hifokoeffimbo-hündambo sirifoaru nimarimo marundi. ²⁵ Iḡga nimboambo ahambo süngururü-rundeimbi ai arambe sandüwuru hou giniri nafitambe nafi masafaorüwuri hanimo.

Sor ai Serusaremiḡu manüḡu

(Ratūpuri 4:26)

²⁶ Sor ai Serusareminambo hu Adükariḡu süngururü-rundeimbi babidifembo mehu. Iḡga asu ai ahambo yihimborurühi, ai-ana Sisasiḡu sünguriri randeimbiyupoani mehomo. ²⁷ Iḡga asu Barnabas ai fifireapuri ai Sorimbo yihimbomemonda asu ai Sorimbo serümündü haya Godindi hoafi sowandümo homo-rundeimbi sowana hu ahamumbo hoafiyupurühi yahuya, Sor ai Damasakusina nafi huhü Adükariḡu hoeimarira ai ahambo hoafimayundo. Asu Damasikusihü Sor ai yihimbokoate Sisasindi hoafi bokariḡu, mehü. ²⁸ Raniyo asu Sor ai süngururü-rundeimbi-babidi nünḡumbo Serusaremiḡu müḡuambo hoahoḡu wakireandühi yihimbokoate Sisasindi hoafi bokariḡu marandi. ²⁹ Suda Grik hoafi fifirundeimbi ai Sor-babidi simbori hoafi, simbori hoafiyomo marundi. Raniyo ahambo hifokoeffimbo-hündambo nini-süḡundihuri, nini-süḡundihuri-memo. ³⁰ Raniyo asu süḡunambo Sisasiḡu anihondumbo-rundeimbi ai ra fifiru mburimbo asu ahambo sowaründümo hanimo Sisaria ngoafihü koamariḡu Tarsusinambo mahu.

³¹ Raniyo asu müḡuambo anihondumbo-riḡu, Sudia, Gariri, Sameria-yafeambe manimboei, ranai aboedi maniboadei. Adükariḡu ahiniyei-ane, Yifiafi Aboedi aheimbo ḡuḡimara-mindindüra asu nindou afindi Sisasiḡu anihondumbo-riḡu aboedi mamambeyahi maniboadei.

Pita ai Ainasimbo aboedimariri

³² Pita ai müḡua ngoafi hoahoḡuhü ḡoru-simboani Godindi nendi Ridahü amarei ranaheimbo sowana ndüfosimbo mahu. ³³ Raniḡu ai

^b 9:22 Suda-yafe hoafinambo nindou ra ahandi ndüri Mesaia-ani.

nindou mami ahandi ndūri Ainias hoeimariri. Ai yiri wari nimokoyu haya 8 himbaniyu worambe yangiri mamaru. ³⁴Pita ai ahambo hoafiyundūhi yahuya, “Ainias, hapoana Sisas Kraiss ai sihambo aboedareanini. Botiyafo, sihafi fondi diboadiro,” mehundoa nimehūnou botimefiyu. ³⁵Ridahūndi nindou-yei asu Seronihūndi-yei ai hoeirihora mayoa ai Adūkarimbo anihondūmbo-marihori.

Pita ai Tabitambo botimareandi

³⁶Sopa ngoafihū sūngureandeimbi mami ra ahandi ndūri Tabita-ane. Griki-yafe hoafinambo ana, Dokas. Nimorehi ra ahandi hohoanimo aboediyo haya ai nindou napokoate-yeimbimbo farihendūri marandi. ³⁷Rani-simboani ai aṅgūnūmboyo mbura moaruwaimayo. Raniyo ahandi yifinimoko ra hundūrihi mburihūmbo, nimoamo yibadiwami manandihindi. ³⁸Rida ra Sopa ngoafikim-ane. Asu Pita ai Rida ngoafihū nimarwane, Sopahūndi sūngurihindeimbi ai himboriyei hehi nindou yimbu ahambo sowana koamarihehipira mahafani. Asu ai ahambo hoafiyafinandowohū safaniya, “Mborai, nimai ro-babidi ngefombo,” masafinando-amboyu.

³⁹Pita ai botifi haya, ai-babidimbo homo tūkūyafu hou ahambo nimoamo yibadinambo sowarūdūmo mahafomo. Asu ranihū nimorehi kaisahoabedi ai hei, Pitandikimi niboadeimbo Dokasimbo hohoanimoyeihi araniyeihei seiya, “Hoandari hoeari asu bidifiri hoeari ro gudahūndi nda Dokas yangiri nṅombo nafimarand-ane,” sei hehi ahambo nafuimaye. ⁴⁰Asu Pita ai mūnguambo nindou hihaimafoa-reandūra weindani maheiya, yiri yimbu pusire nimarūmbo, Godimbo didibafifi mbura asu hihirifihū yahuya, “Tabita, se botiyafo,” mehundo. Raniyo asu nimorehi ranai himboari birihoai, Pitambo hoeirera mayowa, asu botife mamaro. ⁴¹Raniyu asu Pita ai wambuamūndi nūngumbo anihondūmbo-rihindeimbi asu nimorehi kaisahoabedimbo hoafimayua kamefoehinda ai Dokas nafuimendūri. ⁴²Pita ai Dokasimbo yifihūndi botimareandi hoafi ra Sopa ngoafi mūngu ho mēngorowa, nindou afindi ranai himboriyei hehi, Adūkarimbo anihondūmbo-marihori. ⁴³Raniyo Pita ai Sopahū afindi si manūngu. Nindou mami burmakau hoeari nafira randeimbi Saimon ra-dibo manūngu.

Pita ai Korniriusimbo Godindi hoafi hoafimeindo

10 ¹Suda-yafe ndifo nindou mami adūkari ngoaf Sisariahū manūngu, ahandi ndūri Kornirius. Ai Romi-yafe ami ranambe 100 ami Itari sei arihūndi ra hifandapuri randeimb-ani. ²Ai Godimbo hohoanimo pariri randeimbiyu haya asu ahandi fikiminindi babidi Godimbo ahiniyei rihūndeimb-anei. Asu Suda ai napo mbonimbo-marihūmūndia ahandimayo kaki adūkari sagadūri randūhi asu Godimbo mūnguambo

si didibafifi marandi. ³Nimbambe safi yafogoadinambo nahurai hoeireandane, Godindi nendi mami ahambo sowahi kusū hoafiyundūhi yahuya “Kornirius,” mehu. ⁴Asu Kornirius ai ahambo yihimboyuhū himboa parirūhū hoafiyundūhū yahuya, “Adūkari, se ninimboeafa?” mehuamboyu. Asu Godindi nendi ai simbori yahuya, “God ai sihafi didibafiyafō marandi ra himboriyumboani. Asu ai hoeireandi se nindou afindi napo mbonimbo rihūmūndeimbimbo farihawandūri marandi ranahambohūnda God ai sihambo hohoanimo-yumboani. ⁵Haponda se nindou bidifiri Sopa-nambo koandihawapuri nindou ahandi ndūri Saimonimboyu Pitamboyu randeimbi-mayu ranahambo fihimūndi sinimbohūnda. ⁶Ai ndūri mboafō Saimon burmakau hoeari nafira randeimbi-dibo manūngu. Ahandi wori ra siriwara hoekimi mafondaro,” mehu. ⁷Godindi nendi Korniriusimbo hoafimeindo ra huane asu Kornirius ai ahandi ratūpuriyafani rinandeimbi asu ami mamiyu ranahamumbo mborai mehupuri. Ami ra Godimbo hohoanimo pariri randeimbiyu haya asu Korniriusimbo fariherū randeimbiyu. ⁸Asu Kornirius ai muṅgu-moatūkuni tūkūmefeyo ranahambo ndore wataporimbo-rapuri mbura Sopanambo koamarihepura mahomo.

Pita ai ranipoanimbo moatūkuni hoeimareandi

⁹Ŋgorū sina ai homo Sopa ṅgoafi tebūnani tūkūyafundane, hūfūnimbo Pita ai Godimbo didibafi-fembohūnda wori bogimondiwami mahafu. ¹⁰Raniyo asu Pita ai wembomboyuhū sesi sesimbo hohoanimomayu. Ŋga awi sesi didiboandombarihi nou ranipoanimbo moatūkuni yafogoadinambo nahurai Pitambo tūkūmefeyoa hoeimareandi. ¹¹Ai hoeireandane, sūnū sūbūdihoehiyo, asu nini-moatūkunimbi hoeari adūkari yimbuyimbu himborūmbi nahurai hifinambomare koso. ¹²Muṅgua mamikarambo yimbuyimbu tiṅarūmbi ninihondi asu wako, amoasiri ai hifisūngu hahabodei, asu ndu ai nimoamo botirihehi arihūndi ranambe ninoumayo. ¹³Asu yafambe mami Pitambo hoafiyohū yahoya, “Pita, se botiyafō, ninihondi hifokoaro, mando, sowasifi,” meho. ¹⁴Pita ai simbori hoafiyundowohū yahuya, “Adūkari, ro sesi Sudambo ai moaruwai-ane sei arihūndi ra ṅgiri dagadihi,” mehu. ¹⁵Asu yafambe ranai asūkaiyo yimbumbo hoafiyohū yahoya, “Nini-moatūkuniyo God ‘aboed-ane’ mehu ra, se ṅgiri ‘moaruwai-ane’ mbisafi,” meho. ¹⁶Yafambe ra ṅgimimbo yare hoafimendowa, asu rani-moatūkuni ra nimehūnou sūnambe asūkai hihirife mahafo.

¹⁷Asu Pita ai ranipoanimbo moatūkuni ahandi nimindi ranahambo hohoanimoyuane, nindou Kornirius koamarihepuri ranai sinimo tūkūyafu hou asu Saimonindi wori ranahambo dūduyafu hou homo, ahandi giniri yipurikimi manūngomo. ¹⁸Asu ai miṅgiyomo dūduyafundūhi yahomoya, “Saimonimboyu Pitamboyu randeimbi

ranai nūnguawai waniyo?” mehomō. ¹⁹Pita ai yafogoadinambo nahurai hoeimareandi ranahambo hohoanimoyuhū nūnguwane, Yifiafi Aboedi ai hoafiyohū yahoya, “Se himboriyafi. Nindou ŋgimi ai sihambo kokoarunini. ²⁰Se botiyafo hawa, hanifi hifini yibadinambo asu se ŋgiri ai-babidi ŋgafihū afindi hohoanimondafi. Ŋga ranana ro koamariheheapura masinimo-ane,” meho.

²¹Pita ai ranahamumbo sowana hanū hoafiyupurūhi yahuya, “Se wamboemo kokomarūndiri, ŋga ro-ana nda. Nimboemo se masinimo-a?” mehuamboemo. ²²Asu ai hoafiyomondūhi yahomoya, “Godindi sūnambeahindi nendi ami bogori Korniriusimbo hoafimeindoa ai koamarihemuna masinefi sihambo hoafiyowani se ahandi worina hifombohūnda. Ai mbumund-ani asu Godimbo ahiniyuhū ndore hohoanimoyumb-ani. Muŋgua Suda ai ‘Aboedi hohoanimoeimb-ani’ sei marihūndi. Godindi sūnambeahindi nendi ai ahambo hoafiyundowohū yahuya ‘Se Pitandi hoafi himborimbohūnda ahambo hoafindafi koaboadi-wandūhi animboya, “Wandi worina didifi,” mbisafi,’ mehu.” ²³Pita ai ahamumbo hoafiyupurūhi yahuya “Se sinimo mami nimbi ro-dibo apoefo,” mehuamboyo. Apomo mburu asu siambe ai botifi napoamūndi haya mahomonda asu Sopahūndi Sisasimbo sūngururū-rundeimbi bidifiri ai Pita-babidi mahomō.

Pita ai Korniriusindi worina mahu

²⁴Ŋgorū sihi ai homo Sisariahū tūkūmefundi. Asu Kornirius ai ranihū ahamumbo hifandapuri mamaru. Ai ahandi mamisiri, asu ŋgunindi ranaheimbo hoafimayundūra ahandi worambe Pitandi hoafi himborimbohūnda guguriyahi mamarei. ²⁵Pita ai hu worambe kefuai Korniriusindi himboahū tūkūfiyuane Kornirius ai ahambo adūkar-ani yahu haya ahandi yirikimi piyu mamaru. ²⁶Ŋga asu Pita ai ahambo hoafiyundowohū yahuya, “Se botiyafo. Ro-amboa nindou se nahurai-anahi,” mehu. ²⁷Pita ai Kornirius-dibo wataporiyu hu kefuai, asu nindou afindi fanda meŋgoro ra hoeimareandi.

²⁸Asu Pita ai yare hoafiyundurūhi yahuya, “Se siheihoari fifirihindi ro yihoefi ndifo-babidi nimaripoani asu ahei worambe kefoefepoani sei arihūndi. Ŋga God ai wambo nafuimayu, ro ŋgiri nindou mami moaruwai-ani mbisahi. ²⁹Ranimboanahi asu ro moai simbori hoafi kikihiriheandi wambo ndanihū sinimbo hoafimemo ra. Asu haponda siheimbo dūduweheandi, nimboyei se wambo sinimbo hoafimayeia?” mahuamboyo.

³⁰Asu Kornirius ai hoafiyuhū yahuya, “Ranihūndi ro wandi worambe nimbambe safi Godimbo didibafi-yaheandane, asu nimehūnou sūnambeahindi nendi mami ai wandi himboarūhi himboarambe forihoeimbi hoeari gūde haya manūngu. ³¹Asu ai hoafiyuhū yahuya,

‘Kornirius, God ai se didibafiyafu marandi ra himbori-yumboani. Asu se napo mbonimbo-rihūmūndi-mbimbo kaki napo sabadūri arandi ra fifireamboani. ³²Ranimboane asu se sihafi nindou bidifiri koandihawapura Sopa-nambo ŋgomo Saimon Pitambo hoafindimondowa mbūsūfuwamboane. Saimon ai ahandi ndūrimboafu Saimon-dibo-ani anūŋgu. Ŋgorū Saimon ai burmakau hoeari nafira randeimb-ani. Ahandi wori ra siriwara hoekim-ane afondaro,’ mehu. ³³Ranimboanu asu sihambu sowana nindou bidifiri nimehūnou koamariheheapuri. Asu se aboedi hamindiyo ndanihū masifomo. Asu haponda muŋguambo ro sūhifi ndanihū Godindi himboarūhi aniboadeŋi. Muŋguambo hoafi Adūkari ai sihambu hoafimayu ra se hoafiyowani ro himborimbo aseŋi,” mehu.

Pita ai Korniriusindi worambe hoafi bokamarihendi

³⁴Asu Pita ai hoafiyuhū yahuya, “Haponda ro wudipoaporihe fifiriheamboanahi nindou muŋgua Godindi himboahū sisimogodi yaŋgir-aneŋi. ³⁵God ai muŋguambo nindou ahambo ahiniyeihi ahandi hohoanimō sūngurihinda ranaheimbo hohoanimoyundūri arandi. ³⁶God ai Israer yihoefimbo aboedi hoafi koamarihendi ra se fifirihindi. Hoafi ra rahurai-ane, ‘Sisas Krai ai muŋguambo nindou ahei Adūkar-ani asu ai sihefimbo God-babidimbo mamūhi-mareamuni.’ ³⁷Horombo Sudia-yafeambe muŋguambo nini-moatūkuniyo tūkūmefeyo ra se fifirihimboane. Horombo Son ai Garirihū boatei nindou hundūrimbo hoafimayu. ³⁸Se Sisas Nasaretihūndi ra fifirihori God ai Yifiafi Aboedi ŋginindi kameihi masagado. Ai hoahoŋgu wakireandūhi nindou farihendūrihū muŋgua Satanindi ŋginindi hoarehi manimboei ranaheimbo aboedambo-mareandūri sapo God ai-dibo nūngumbo wambo. ³⁹Suda-yafe hifambe asu Serusaremihū muŋgu-moatūkuni ramareandi ra hoeirihu hohu anihond-ane seŋi arihūndi. Ŋga Suda ai ahambo Serusaremihū nimi keimbi karihendeimbifihū parūwuri hou hifokoamarūwuri. ⁴⁰Ŋga ŋgimi siyo haya God ai ahambo botimarira nindou himboahū weindahi tūkūmefiyu. ⁴¹Nindou muŋgua moai ahambo hoeirihori, ŋga wani. Ŋga yihoefimbo horombo God ranahambo hoeife hefe hoafimbohūndambo kafaore hiniŋgi-mareamuni ro yaŋgiri hoeimarihuri. God ahambo yifihūndi botimariri asu ro ai-babidi sesi sahusifi, hoe simindeŋi marihūndi. ⁴²Asu ai yihoefimbo hoafiyuhū yahuya, ‘Nindou muŋguambo se aboedi hoafi bokarindihōemo-ndūhi anihondūmbo hoafindomondūhi animboya, “God ai ahambo nindou yaŋgiri niaboadeimbi asu yifiyeimbi aheimbo refe yibobofembohūnda kamafoarir-ani,” mbisimo,’ mehu. ⁴³Horombo muŋgua Godindi hoafi hoafiyomo-rundeimbi ahambohūndambo yaru hoafiyomondūhi yahomoya, ‘Muŋgua ahambo anihondūmbo-ndihorani ahandi ŋginindina ranaheimbo God ai ahei moaruwai hohoanimō ra gogorindihe-ndūrimbui,’ mehomo,” Pita ramehu.

**God ai ahandi Yifiafi Aboedi Suda-yafe ndifoambo
koamarihenda masahümündi**

⁴⁴Pita ai hoafiyuambe Yifiafi Aboedi ai nindou muṅguambo hoafi himborimaye ranaheiwami makoso. ⁴⁵Sudahündi anihondümbo-rundeimbi Pita-babidi masifomo ai hepünafu hou yahomoya, “God ai ahandi Yifiafi Aboedi Suda sihefi ndifoambo amboani masagadüri,” mehomomo. ⁴⁶Suda-yafe ndifo ai ranipoanimbo ranipoanimbo hoafina wataporiyehü ‘God ai aboed-ani’ masei ra himborimemo. ⁴⁷Asu Pita ai hoafiyuhü yahuya, “Aheimbo himoni hundürümbo nindou didai yowani mambüsindüra. Ai Yifiafi Aboedi masahümündi sihiri masahumindéfi nahurai-ane,” mehu. ⁴⁸Asu ai aheimbo hoafiyundürühi yahuya, “Sisasindi ndürinambo siheimbo hundürü-ndürimboemo,” mehu. Asu ai Pitambo hoafiyahündowohü seiya, “Se ro-babidi yahunümbimbo nimbafi,” masei.

**Pita ai Serusaremiñü anihondümbo-rundeimbi ahamumbo rani-
moatükuni tüküme feyo ranimbo wataporimbo-marandi**

11 ¹Kraisindi hoafi sowandümo homo-rundeimbi asu anihondümbo-rundeimbi Suda-yafe hifambe aniṅgomo ai himboriyomondane Suda-yafe ndifo ai-amboa Godindi hoafi ra masahümündi. ²⁻³Raniyo asu Pita ai Serusaremina hafuane anihondümbo-rundeimbi nindou fihoeari karu tirihoundeimbi ai ahambo ṅginindi hoafiyomondowohü yahomoya, “Se-ana nindou fihoeari kefe tirihefekoate-yomondi worambe apafi asu ai-babidi sesi masowasifi,” mehomomo.

⁴Raniyo asu Pita ai piyu haya muṅgu-moatükuni tüküme feyo ra ndore wataporimbo-marandi. ⁵“Sapo ro adükari ṅgoafi Sopahü nimboambo Godimbo didibafi-yaheandühi nimboahani ranipoanimbo moatükuni yafogoadinambo nahurai wambo sowahi tüküme feyoa hoeimariheandi. Raniyo hoeari adükari nahurai ninimbai yimbuyimbu himborani kikihamindi haya asu wambo sowana sünambeahindi afurimare koso. ⁶Ro wagabe ragu himboyahaniyo nimambeahindi ninihondi, yimbuyimbu tiñarümbi, amoasiri asu ndu ra hoeimariheandi. ⁷Asu ro himboriyaha yafambe mami wambo hoafiyondürühi yahoya, ‘Pita, se botiyafo, ninihondi hifokoaro mando sowasifi,’ meho. ⁸ṅga ro hoafiyahühi sahiya, ‘Adükari, wani. Suda ro sesi moaruwai-ane sefi arihundi ra moai sahasi rihandi,’ masahando. ⁹ṅga yafambe ranai sünambeahindi asükai wambo hoafiyondürühi yahoya, ‘Nini-moatükuni God nafimarandi ranana aboed-ane, ṅga se ṅgiri moaruwai-ane mbisafi,’ meho. ¹⁰Rani-moatükuni ra refe hayambo-yowaniyo asu muṅgua ninoumayo ra sünambe asükaiyo hümaramindo hafo.

¹¹Asu rani simboani hamindi nindou ṅgimi ai sinimo wori ro nimboahmeimbi rasowahi tüküme fundi. Nindou mami Sisariahündi ai

wambo fihemindiri hifombo-hündamboemo koamariehpura masinimo. ¹²Yifiafi Aboedi ai wambo hoafiyohü yahoya, ‘Se yihimbokoate ai-babidi ŋgafi,’ meho. Raniyo anihondümbö-rundeimbi 6 aniŋgomo ndanamboa ro-babidi mahomo. Asu ro hefi Korniriusindi worambe mafariyahundi. ¹³Asu ai hoafiyumunühi yahuya sünambeahindi nendi mami wandi worambe farifi manüŋguwa hoeimarihini. Ai yahuya, ‘Nindou bidifiri Sopa-nambo koandihawapuri ndüri Saimonimboyu Pitamboyu-randeimbi ranahambo hoafiyowani sifombohünda. ¹⁴Ai sihambo hoafindüninimbui asu hoafi raninambo God ai se sihafi fikiminindi-babidi aboedambo ndeandürimbui,’ mehu.

¹⁵Ro peya hehea wataporimbo-rihandambe Yifiafi Aboedi aheiwami makoso, weaŋgurühi sihefiwami makoso nou. ¹⁶Ro Adükarindi hoafi asüakai hohoanimo-mayahi. Horombo ai yahuya, ‘Son hoenambo hundüra-marandüri, ŋga Yifiafi Aboedi ai kosowohü ranambo se hundüri-ndeimboyei,’ mehu. ¹⁷Horombo sihiri Adükari Sisas Kraiss anihondümbö-marihura God ai Yifiafi Aboedi moani masemuni, ŋga haponda Yifiafi ra Suda-yafe ndifoambo amboani moani masagadüri. Ŋga ro nünŋunahurai nindou-yahi animbo Godindi nafi kikindihe gündiheandani hundürikoate-mandeia?’ mehu.

¹⁸Asu Sudahündi ai hoafi ra himboriyomo hou moai simbori ahambo asüakai hoafiyomo, ŋga Godimbo adükar-ani yahomo hoafiyomondühi yahomoya, “God ai sihefi ndifoambo amboa mafarihendüra ahei hohoanimo moaruwai hiniŋgindihi hehi asu yaŋgiri koadürümbo nimboeimboyei,” mehomo.

Aboedi hoafi Andiokihü tüküme Feyo

¹⁹Horombo Stifenimbo hifokoarihori hehimboyowani Sisasimbo anihondümbö-rihindeimbi ranaheimbo moaruwaimbo marihindüra bukürümehindi. Ai hei Finisia hifihü, Saiprus hifihü, Andiok ŋgoafihü tüküyahi hehi aboedi hoafi Sudambo yaŋgiri hoafimehündüri. ²⁰Ŋga anihondümbö-rundeimbi bidifiri Saiprusihündi, Sairinihündi ai Andiokinambo homo Grikimbo amboani Sisas Adükar-ani yahomo hou aboedi hoafi ra hoafimemo. ²¹Asu Adükarindi ŋginindi ai-babidi maniŋgowa nindou afindi ai Ahambo anihondümbö-rihindihi süngumarihori.

²²Sisasimbo anihondümbö-rihindeimbi Serusaremihü hoafi ranahambo himboriyei hehi Barnabas koamariehora Andiokina mahu. ²³Barnabas ai hu tüküfi God ai nindou aboedi-aboedi-mareandüri ra hoeire haya hihif-hihifiyuhü ahei ŋgusüfoambe ŋginamündi-ndürühi yahuya, “Nimbi-nimbi si se Adükarimbo aboedi süngundihori,” mehu. ²⁴Barnabas ai nindou aboed-ani, ŋga Yifiafi Aboedeimbiyu haya asu afindi hamindi anihondümbö-reandeimb-ani. Asu nindou afindi ai Sisasimbo anihondümbö-rihindeimbi babidimbo mamambe-mehindi.

²⁵Raniyu asu Barnabas ai Sorimbo kokombo Tarsus ŋgoafina mahu. ²⁶Ahambo hoeiriri mbura serimündü Andiokina mahafani. Mami himbaniyo haya nindou yimbu ranai Sisasimbo anihondümbo-rihindeimbi babidimbo fandihimbo afindi yamundi-marineandüri. Asu Andiokihü weaŋgurühididi Sisasimbo anihondümbo-rihindeimbi ranaheimbo Kristen anei masahündüri.

²⁷Rani-simboani Godindi hoafi hoafiyomo-rundeimbi bidifiri ai Serusarem hiniŋgiru hou Andiokina makosimo. ²⁸Nindou mami aihündi Agabus-ani. Yifafi Aboedi ai ahambo hoafimendoa ai botifi hoafiyundürühi yahuya, “Sünŋunambo muŋgu hifi ndanihü wembo adükari tükündifemboe,” mehu. Ai yare hoafimayu, ŋga sünŋunambo Krodius ai Romi-yafe adükari bogori nünŋuambe wembo ra tükümeŋyo. ²⁹Raniyu asu sünŋurihindeimbi ai Sudahündi wandafi mami farihefembo-hündambo kaki koarihefembo hoafi fimarihümündi. Mamami ai aheimbo kaki saimbo sei hehi hohoanimoyehühi kaki bidifiri yiboborihü masihehindüri. ³⁰Ai Barnabas asu Sor koamari-hehipira kaki ra sowandifani hena Serusaremina hahüfani hifandi-rundembimbo masabinapuri.

Herot ai Sems hifokoarirü mbura Pitambo karabusimariri

12 ¹Rani-simboani bogori adükari Herot ai Kraisindi nendi bidifirambo moaruwaimbo-mareandüri. ²Ai hoafimeyuwa Sems Sonindi amonŋo pisao yihimindinambo hifokoamarüwuri. ³Herot ai hoeireanda Suda ai ranahambo aboed-ane maseiamboyu Pitambo kameihi karabusimariri. Suda ai bret yisikoate-sesesi-maye rasimboa Herot ai ramareandi. ⁴Ai Pitambo serümündü karabus worambe hiniŋgimarira, yimbuyimbu bidifirambe yimbuyimbu ami ai hifandimaruri. Herot ai yare hohoanimoyuhüya, “Awi Suda ai bret yisikoate-sesesindei mbundühümbo animbo ro Pitambo weindahi papi-hoafindühüni-mboeahi,” mehu. ⁵Asu Pita ai karabusi worambe mamaru, ŋga anihondümbo-rihindeimbi ai ahambohünda Godimbo didibafiyei marihündi.

Pita karabus wori hiniŋgimareandi

⁶Ndani nimbınambo sümbu noufe Herot ai Pitambo papi-hoafimbo yahumboyu sen yimbunambo hüputüpurundümo ami yimbu-yafandi mbusümo sihawura mapu. Asu hifandiru-rundeimbi ai karabus wori yipurikimi hifandimarundi. ⁷⁻⁸Nimehünou Adükarindi sünambeahündi nendi ai manünŋuambo asu worambe si pimayoa Pitambo ŋgirisafini sindira botimefiwa hoafiyuhü yahuya, “Nimai botiyafu!” mehuamboyu nimehünou asu sen ai Pitandi warihündi fufurimarichoayo. Sünambeahündi nendi ai Pitambo hoafiyuhü yahuya, “Hoeari yihuruyafi mbura su güdo,”

mehuambo Pita ai rasūngu-mareandi. Asu sūnambeahindi nendi ai yahuya, “Sihafi hoandari hoeari gūdo mbura wandi sūngu sinifi,” mehu. ⁹Raniyu asu Pita ai ahandi sūngu karabus wori safambeahindi tūkumefiyu. Ŋga Pita ai sūnambeahindi nendi ramariri ra moai weindahane yahu, ŋga yafogoadi-nambombai yahuhayamboyu. ¹⁰Yibobo ai hafani yimbu hifandi-rinandeimbi ŋgasūndine hena karabus ain yipuri ra-sowahi tūkumefineandi. Yipuri ra ahafanimbo moani timarihoayo-wamboyafani weindani tūküyafine hena adūkari nafi sūngu hafani asu nimehūnou sūnambeahindi nendi ai ahambo hiniḡimariri.

¹¹Pita ai wudīpōapore fifire hohoanimoyuhū yahuya, “Haponda ro anihondūmbo fifirihe-amboanahi Adūkari ai ahandi nendi koamariheira kusū mafarihendira Herot ai ŋgiri wambo moaruwaimbo-ndeandiri. Suda ai wambo moaruwaimbo-fendirimbo mehomo, ŋga ŋgiri randundiri,” mehu. ¹²Raniyu asu ai Maria, Sonimboyu Makimboyu-randeimbi hondandi worina mahu. Nindou afindi ai ranihū Godimbo didibafi-fembo-hūndambo gugurimehindi. ¹³⁻¹⁴Raniyu asu Pita ai hu yipurūhi pirako-pirako-marandamboyo nimorehi ratūpuriyo-randeimbi ahandi ndūri Roda ai yipuri sūbūdūhefembo ho Pitandi yasimondi himboriyo haya hihifi-hihifimayo. Raniyo asu yipuri moai sūbūdūhendi, ŋga hihirife wori safana pipiyo ho hoafiyondūrūhi yahoya, “Pita yipuri nafitambehū anūngu,” mehoamboyo. ¹⁵Asu ai ahambo hoafiyeihi seiya, “Se ra hihindi-hihindi-yafūhiyafi!” masei. Ŋga asu ai yahoya, “Tikaipoani, ŋga anihondūmbo asahi,” yahoeniḡo asūkaiyo hoafimayo. Asu ai hoafiyeihi seiya, “Awi sūnambeahindi nendi Pitambo hifandirūri-randeimbi-mbai ranana?” masei.

¹⁶Asu Pita ai asūkaiyu pirako-pirako-marandamboyo ai yipuri sūbūdi-hehindihūnda hoeirihori hehi hepūnimehindi. ¹⁷Pita ai aheimbo warinambo afoai yahu haya Adūkari ai ahambo karabus worambeahindi serūmūdū moanambūhi tūkumefiyu hoafi ra wataporimayu. Ai yahuya, “Sems asu wandafi mami ranahamumbo hoafindahūpuri,” mehu. Asu ai Pita ranihū hiniḡiriri haya ŋgorū goanini mahu.

¹⁸Asu raniyo ŋgorū siambeahi Pita ai nimarikoate-mayuwa, ami ai hepūnafundūhi afindi hohoanimo-yomondūhi yahomoya, “Pita nūḡufiyuwa?” mehomo. ¹⁹Herot ai Pitambo karabus wori mūngu kokofoefimbo hoafimepuramboemo ramarundi, ŋga asu moai hoeirūwurū. Raniyo asu karabus hifandi-rundeimbimbo Pita ai aboedambomefiyu ranimbo dūdumareapuri, ŋga ai moai didiboadoru hoafiyomo. Raniyo asu ahamumbo hifokoefe-purimbo hoafimayu. Sūḡuna ai Sudia hifi hiniḡire haya hanū Sisaria ŋgafihū mamaru.

Herot ai yifimayu

²⁰Herot ai Tairihūndi asu Saidonihūndi ranaheimbo ŋginindi-marandūri. Raniyei asu ai fandihī hehi nindou bidifiri ahambo sowana

koamarihehipura mahomo. Weaŋguruhi ai Brastus, bogori adūkarindi ratūpuriyu randeimbi-mayu, ranahambo yahomoya, “Farihawamuni,” mehomo-ndamboyu. “Fandihehea-purimboyahi,” mehu. Ai Herot soana homo hoafiyomondūhi yahomoya, “Sihiri aboedi-aboedi-ndahumboane,” mehomo. Nimboe hifi ra Herot ai hifandimarandi ranihū Tair asu Saidon ai ahei sesi sahūmūndi rihūndūhi wambo. ²¹Raniyo Herot ai mami sihi ware haya, ahandi adūkari bogori hoeari yihuru-ramūndū haya, ahandi adūkari bogori nimari fondiwami nimarūmbo nindou afindi ranaheimbo wataporimbo-marandūri. ²²Asu nindou ranai pukūna hoafi karihehindūhi seiya, “Ndanana god mamindi yafambe-ane! Ŋga nindou yomondi yafambeyopoa!” masei. ²³Asu Herot ai ahei hoafi ranimbo moai ambe yahu asu ai moai Godimbo adūkar-ani yahu. Ranimboyo sūnambeahindi nendi hari-memondowa nūngari ahandi safi ra sahūsi wakirihī marihūnda yifimayu.

²⁴Ŋga asu Adūkarindi hoafi ai ŋginindi tūkufe haya muŋguambo ŋgoafi maho. ²⁵Asu Barnabas, Sor ai ratūpuri Serusaremihū moendirine hena hihireafine Andiok ŋgoafina mahafani. Ai Son Mak sowarindifani hena ai-babidimbo mahomo.

Barnabas Sorimbo Godindi ratūpurimbo koamarihaupira mahafani

13 ¹Sisasimbo anihondūmbo-rihindeimbi Andiokihū aniboadei ranahei mbusūmo Godindi hoafi hoafiyomo-rundeimbi asu yamundu-rundeimbi manūngomo. Ahamundi ndūri ra Barnabas, Simion, ahambo fi nimbandi sei marihūndi, Rusius Sairinihūndi, Manayen, ai Herot bogorindi ŋgunindiyu asu Sor. ²Ai Godimbo hohoanimoyeihi sesi wehiyeiane, asu Yifiafi Aboedi ai hoafiyohū yahoya, “Ro Barnabas weimbo Sor wandi ratūpuri ratūpurimbo dibonimehapir-ane, ŋga se ahafanimbo rani ratūpurimbo kaboadihi hiniŋgindihipiri,” meho. ³Ranimboemo ai sesi wehiyomondūhi ahamundi wari ahafandiwami nandu houmbo koamarihaupira mahafani.

Barnabas asu Sor Saipirasihū Godindi hoafi hoafimefani

⁴Yifiafi Aboedi ai Barnabas, Sor ahafanimbo koamarihepira Serusia ŋgoafina mahanihani. Ranihū ai sipambe farefineanda sip ai Saiprus airaninambo sepirimindi maho. ⁵Ai Saramis ŋgoafihū tūkuyafine hena Suda-yei rotu worambe Godindi hoafi wataporimbo-marinandi. Son Mak ai-babidimbo manūngu ahafanimbo farihefepirimbohūnda.

⁶Ai Saiprus airan ŋgasūndine Pafosihū tūkūmefineandi. Ranihū tibagire randeimbi mami hoeimarineri, ahandi ndūri Barsisas. Ai Sudahūndiyu asu tikarehaya hoafiyuhūya, “Ro Godindi hoafi hoafiya rihandeimb-anahi,” mehu. ⁷Ai gafman bogori Sergus Paurus-dibo mamaru. Sergus Paurus ana aboedi hohoanimoyu kūkūhifoare

fifireandeimb-ani. Ai Godindi hoafi himborimbo yifiriyuhū asu Barnabas Sorimbo mborai mehupiri. ⁸Ŋga asu tibagire randeimbi Erimas ai gafman bogori ranahambo Sisasindi hoafi anihondūmbofembo ra yowani yahundombo Sor weimbo Banabasimbo hifinambo-mareapiri. (Tibagire randeimbi Barsisas ndūri ra Grik hoafinambo Erimas-ane masei.) ⁹⁻¹⁰Ŋga Sor, Grik hoafina ahandi ndūri Por. Yifiafi Aboedindi ratūpuri woribori kidaboari-mayu ranai Erimasimbo himboa parirūhi yahuya, “Se-ana Satanindi nimor-anafi asu se-ana aboedi hohoanimo ranahandi hūrūtimb-anafi. Muṅguambo tikai hoafi, moaruwai hohoanimo sihafi ṅgusūfoambe amaro ranana afindi hamind-ane. Se-ana muṅguambo Adūkarindi aboedi nafi moaruwaimboro randūh-anafi. Awi se rani hohoamimo ra hiniṅgifembo moei safimboyafa? ¹¹Asu se himborindafi! Hapondani Adūkari ai sihambo himboari sūndianinani se tūtūmondamboyafi. Haponda se ṅgiri hūfihamindi hoeindowandi, ṅga akidou gedūhi safi nimandimboyafi,” mehundo. Raniyo asu nimehūnou mburingai peyowohūyo Erimasimbo nimbi mamaro. Raniyu asu ahambo watījarahū kikihimūndi hefembo nafi nafuimbohūnda nafi kokomarandi. ¹²Gafman bogori ai ra hoeire haya anihondūmbo-mareandi. Asu ai Adūkarimbo yamundife hoafi hoafimefani ra himboriyu haya hepūnimefiyu.

Barnabas Sor ai Andiok ṅgoafihū Pisidia-yafeambe Adūkarindi hoafi hoafimefani

¹³Por asu nindou bidifiri ai-babidi Pafos ṅgoafi ṅgasūndundaniyo sip ai sepurimindi haya Perga ṅgoafinambo Pamfiria-yafeambe maho. Ŋga Son Mak ai hiniṅgireapuri haya hihirifi Serusareminambo mahu. ¹⁴Ai Perga ṅgasūndine hena, hafani Andiokihū Pisidia-yafeambe tūkūmefineandi. Raniyo asu moani ṅgoafimbo nimarimbo si rasimboani ai Suda-yafe rotu worambe kefoene mamarifani. ¹⁵Mosesindi ahnūmbi hoafi asu Godindi hoafi hoafiyomo-rundeimbi-yomondi hoafi ra bokarihoemo mburumbo asu hifandi-rundeimbi ai hoafiyomondūhi yahomoya, “Wandafi weimbo, se nindou-yei ṅgusūfoambe ṅginemindimbo hoafi hohoanimondafandūhi ana, hoafindafani,” mehomo. ¹⁶Por ai botifi nūṅgumbo wari pakarifoareandūhi hoafiyuhū yahuya, “Wandaf, Israerihūndi asu nindou amuri Godimbo ahinirihori rihūndeimbi se himborindei. ¹⁷Israer-yafe God ai sihefi amoao kamafoareandūr-ane. Ai Isipihū fehefehūndi-yahi niboadeiane, God ai ṅgorū sūṅgumareanda nindou afindi momorimayei. Sūṅgunambo ahandi adūkari ṅginindinambo ai semūndūndūri Isip hiniṅgirihi hehi mahei. ¹⁸Nimi wohi furikoate-reandūhi niboadeimbo 40 himbani Godindi hoafimbo moei masei, ṅga asu God ai aheimbo fehefendūrimbohūnda tiṅirifomayu. ¹⁹Kenan-yafe hifihū 7 siri God ai aheimbo yihirirearūhi hifi ra Israer aheimbo masagadūri horombo

hoafimayu sūngu. Horombo Israer ai Isip sowana hei nimareimbo asu sūngunambo Kenaninambo mahei ra 450 himbaniyo. ²⁰Sūngunambo God ai Israerimbo hifandiyo-ndūrimbohūnda yiboboru rundeimbi nindou kamafoareapura ai hifandirundūri homomboyo sūngunambo Samuer Godindi hoafi hoafiyu-randeimbi ai tūkūfi ahamundi fondi kasimaramūndu.

²¹Rani-simboani Israer ai adūkari bogori semindimbo hoafimehūndowamboyo asu God ai Sor, Kisindi nimori, ahei adūkari bogori kamafoariri. Ai-ana Bensaminindi sirambeahind-ani. Raniyu ai adūkari bogorimbo 40 himbani mamaru. ²²Ŋga God ai ahambo raguanamboriri mburambo Defit ahei adūkari bogorimbo hiniŋgimariri. God ai ahambo hoafiyuhū yahuya, ‘Ro Sesindi nimori Defit fifirihini, ŋga wandi ŋgusūfo ai nindou rahurai ranahambo anahi hohoanimo-ayahi. Nimboe ai animbo wandi hohoanimo sūngundeambui,’ mehu. ²³God ai Defitindi sirambeayahindi Sisas sihefimbo aboedambo-fembohūnda Israer sowana koamariherū horombo hoafimayu sūngu.

²⁴Sisas ai weindahi tūkūfekoate-yuambe Son ai Israerihūndi mūngu ranaheimbo aboedi hoafi bokarihendūrihi yahuya, ‘Sihei hohoanimo moaruwai daboadanambo-ndihinda asu siheimbo hundūri-ndihandūri-mboyahi,’ mehu. ²⁵Ndeara Son ai ahandi ratūpuri mūngumbo yaŋgiri-yoaniyo ai hoafiyuhū yahuya, ‘Se hohoanimoyeiya ro dideyaha? Ro-ana nindou sapo se hifandarihūndi raniyahipoani. Se himboriyei! Nindou ra sūnguna tūkūndifimbui, ŋga ro-ana ahandi sufihindi wofi fufurihefembo ra aboediyahipoani,’ mehu.

²⁶Wandafi mami, se-ana Abrahamindi ahūiri anei, asu Suda-yafe ndifo se Godimbo hohoanimoyei arihūndi God ai aboedambo-ndeamunimbui hoafi ranana ai sihefimbo soana koafoareamboani. ²⁷Serusaremihūndi nindou anei asu ahei bogor-anemo ai moai Sisasimbo aboedambore randeimb-ani sei ndorihori fifirihori. Asu ai moai Godindi hoafi hoafiyomo-rundeimbi-yomondi hoafi mūnguambo ŋgoafimbo nimarimbo si ranambe hoeiru marundi ra fifirihindi, ŋga wani. Ai ahambo papi-hoafimarihori horombo Godindi hoafi hoafiyomo-rundeimbi rani-moatūkuni tūkūndifemboe mehomo sūngu. ²⁸Ŋga yibobofeambe Sisasimbo hifikoeffimbo moai hoafi yaŋgoro, ŋga asu moani hoaŋgirihi hehimboyei papi-hoafirihorūhi Pairatimbo hoafiyeihi seiya, ‘Hifokoariwori,’ masei. ²⁹Ai mūnguambo moatūkuni ramarihindi ra horombo Baiborambe hoafimayo sūngu. Raniyo sūngunambo nimi keimbi karihendeimbifihindi foarindūmo hanimo hoŋguambe masihawuri. ³⁰⁻³¹Ŋga God ai ahambo yifihūndi botimaramboyo nindou ai-babidi Gariri hiniŋgiru hou Serusareminambo afindi si mahafomo ranai ahambo hoeimarūwurū. Nindou ranai haponda Sudambo ranimbo wataporimboru marundi.

32-33 Haponda ro siheimbo yariho hoafayehi: God ai sihefi amoao mamimbo horombo hoafimayu sūngu haponda ahei ahuirimami sihefimbo anihondūmbo tūkūmefeyo ra Sisas yifihūndi botimariri. Ndani-moatūkuni hoafimayo ra Herū Buk yimbu ranambe amboa mbapeningo.

‘Se wandi nimor-anafi,

haponda ro sihafi ape-anahi.’

Buk Song 2:7

34 God ai yifihūndi ahambo botimariri, ŋga ai ŋgiri hihindūfi ŋgu yifi ambe-ambe sūmbondu. Rani-moatūkuni ra God ai hoafimayu sūngu,

‘Ro siheimbo aboed-aboed-ndiheandūrūhi

asu anihondū aboedi moatūkuni ndahandūri-mboyahi

horombo ro Defitimbo saimbo hoafimayah sūngu.’ *Aisaia 55:3*

35 Ranimboyo ŋgorū Herū Bukambe hoafiyohū yahoya,

‘Sūrihoembi nindou ranahambo se ŋgiri hiningi-ndoworani sūmbondu,’ meho.

Buk Song 16:10

36 Defit ai nūnguambe Godindi hohoanimo sūngu ratūpurimayu.

Sūngunambo ai yifimayuwamboyo ahandi amoao-babidimbo

masamboarihora asu ahandi fi ra sūmbomayo. 37 Ŋga sapo nindou God

ai hoŋguambeahindi yifihūndi botimariri ranana moai ahandi fi ra

sūmboyo. 38-39 Ranimbo-animbo, wandafi mami, se fifiri-mbirihinda-

mboane, ro siheimbo hoafi aboedi hoafiyefūhi sefiya, Nindou ndanana

wanŋei sihei moaruwai hohoanimo gogorindihembui. Muŋgu moaruwai

hohoanimo ra Mosesindi ahinūmbi hohoanimo ana ŋgiri gogorindihe

mbunda nindou mbumundi mbiso. Ŋga nindou Sisasimbo anihondūmbo-

arihori ana, ahei moaruwai hohoanimo gogorihendūhi nindou mbumundi

mbūsūmbui. 40 Ranimbo animbo se hibadūhūndi! Ŋga ranani moatūkuni

Godindi hoafi hoafiyomo-rundembi hoafimemo ra siheimbo sowahi

tūkūndifemboe. 41 Ai yaru hoafiyomondūhi yahomoya,

‘Anihondūmbo-fekoate-yeimbi, se himborindei,

Se-ana hepūnūndahi mbundūhi ŋgei yifindei.

Nimboe se niboadeiambe ro mami-moatūkuni ratūpuri-ndamboyahi.

Nindou mami ai ratūpuri ranahambo hoafayu ana,

se ŋgiri anihond-ane mbisei,’

Habakuk 1:5

mehomo,” mehu.

42 Asu Por, Barnabas ai Suda-yafe rotu wori hiningirine hena

hafandaniyo, nimorehi nindowenihi ai hoafiyeihi seiya, “Ŋgoafimbo

nimari si ranambe hoafi nda sūngunambo asūkai yihoefimbo

hoafindafani,” masei. 43 Rotu wori hiningirihī moanambūhi

tūkūyahindani, Suda nindou asu ndifo Suda-yafe rotumbo hei-

rihūndeimbi ai Por Barnabas yafandi sūngu mahei. Aheimbo

dibafirinearūhi safaniya, “Se Godindi moani hipoambofe ranambe

nimboei ŋgei,” masafani.

⁴⁴Asūkai ŋgorū ŋgoafimbo nimarimbo si ranambe nindou adūkari ŋgoafihündi muŋguambo ai Adūkarindi hoafi himborimbo mafandihindi. ⁴⁵Asu Suda ai nindou afindi hoeirihi hehi ŋgusūfoambe moaruwaimayei. Raniyo ai Porindi hoafi hifinambo-rihindūhi moaruwai moaruwaimbo-marihindi. ⁴⁶Ranimboyo Por weimbo Barnabas ai yihimbokoate hoafiyafandūhi safaniya, “Godindi hoafi siheimbo boatei mbihowamboane. Ŋga asu se hoafi ndanahambo daboadanambo-arihindi. Ro rarihe hohoanimoayahi, se siheihoari hohoanimoyeihi seiya, ‘Ro-ana koadürümbo-koadürümbo niŋgombo ra ŋgirindefi,’ asei. Ranimbo animbo se himborindei! Haponda siheimbo hiniŋgiriherū hohoa sihei ndifo sowana ahehi. ⁴⁷Adūkari ai yihoefimbo hoafiyuhū yahuya, ‘God ai nindou aboedambo-fembo ranahambo muŋguambo hifi semindi hombohūnda ro sihambo Suda-yafe ndifombo si nahurai hiniŋgi-mariheanini,’ ” masafani.

⁴⁸Suda-yafe ndifo ai hoafi ra himboriyei hehi hihif-hihifiyeihi Adūkarindi hoafi aboed-ane masei. Muŋguambo nindou God ai yangiri gedūhi niŋgombo kamafoareandūri ranai anihondümbo-marihindi. ⁴⁹Adūkarindi hoafi ra muŋgu hifi ranihū maho. ⁵⁰Raniyo asu Suda ai ŋgoafi hifandi-rundeimbi asu Suda-yafe ndifo nimorehi bogori Godimbo hohoanimoyei rihūndeimbi ranaheimbo hohoanimo botimarihindūra Por Barnabasimbo moaruwaimbo-rihipirūhi ahei ŋgoafihündi hemafoarihipiri. ⁵¹Ranimboyafani ai ahei hohoanimo moaruwai ra fifirimbirihinda safani hena nafuimbohūnda hifi hasūfi ahafandi yirifihindi kükifoarine mburina asu Aikoniaminambo mahafani. ⁵²Yifiafi Aboedi ai Andiokihündi Sisasimbo süngurihoreimbi ranahei fiambe tüküme Feyondūra afindi hihif-hihifimayei.

Por Barnabas ai Aikoniamihū aboedi hoafi hoafimefani

14 ¹Aikoniamihū Por weimbo Barnabas ai asūkai mami rasūngu-marineandi. Ai Suda-yafe rotu worambe hafani kefoene hoafi diboadorine waporimbo-marinandi rani süngu asu Suda-yafe ndifo afindi ai anihondümbo-marihindi. ²Ŋga Suda bidifiri anihondümbo-fekoate-yeimbi ai nimorehi nindowenihi Suda-yafe ndifo bidifiri-yafe ŋgusūfoambe botimarihi-ndüramboyei anihondümbo-rihindeimbi mo yiboaruko-marihindūri. ³Ai gedūhi Aikoniamihū nimbafanimbo Adūkarimbo-hündambo yihimbokoate hoafiyafani marinandi. Raniyo Adūkari ai ahafanimbo ŋginindi masagapira hepünifeimbi asu ŋginindi moatükuni ramarineanda ai ahafandi hoafi ranai Adūkarindi hipoambo ra anihond-ane yaho nafuimeyondūri. ⁴Ŋga nimorehi nindowenihi adūkari ŋgoafihündi ai yikürübümehindi. Bidifiri ai Suda-babidimbo-yahindi asu bidifiri ai Kraisindi hoafi sowandifani hafani-rinandeimbi

babidimbo-yahindi. ⁵Sūngunambo Suda-yafe ndifo asu Suda ahei bogori-babidimbo sübabı hoafirundühi yahomoya, “Sihiri ahafanimbo moaruwaimbo-ndihupirühi nimoeinambo hifokoandihu-pirimboane,” mehomo. ⁶Raniyo ai ra fifirine hena fefoene hena Rikonıa-yafeambe yimbu adükari ŋgoafi Rıstra asu Debi ŋgoafihü tüküyafine mburına rani hifikimi mahafani. ⁷Ranihü amboani nimbafanimbo aboedi hoafi wataporimbo-marinandi.

Por Barnabas ai Rıstrahü asu Debihü aboedi hoafi hoafimefani

⁸Rıstrahü nındou mami tiŋari moaruwaimbü mamaru. Ahandi hondi ai rahurai wakımarımındı-ane, ŋga ŋgiri hoahoangu ndandi. ⁹Asu ai Porındı hoafi himbori-mayua, ahambo himboari pariri nüngumbo hoeirira ahandi anihondümböfe ranınambo God ai waŋgei aboedındırımbui. ¹⁰Ranımböyu Por ai puküna hoafiyuhü yahuya, “Sihafi tiŋarinambo botıyafo nımbafi,” mehundowamboyu horıpirıhoei piyu mburambo hoahoangu wakıre marandi.

¹¹Nındou afındı ai Por ramareandı ra hoeirihi hehi Rikonıa-yei hoafınambo puküna hoafıyeihi seiya, “God bıdıfiri nındumbo-yafine henambo sıhefımbo sowana makosafanı,” masei.^c ¹²Asu Barnabasımbo ndüri Sus dükamarihori. Asu Por ai hoafi wataporımbora randeımbı-mayua raniyo asu ahambo Hemis-ani masahündo. ¹³Susındı adükari rotu worı adükari ŋgoafi himboranıkimı mafondaro. Raniyo Susımbo sesi sıhai-randeımbı ai burmakau anamındı bıdıfiri asu nımi ahuri wofı amboa sıfımbı semündü haya adükari ŋgoafi yıpurı nafıtambekimi sünü tükümeıfiyu. Nındou afındı ai-babıdı Por Barnabasımbo, “Ai yihoefı god-anafanı,” sei hehi burmakau hıfoköefe segopımbo masei.

¹⁴Ŋga Kraısındı hoafi sowandıfani hafanı-rınandeımbı ai rani hoafi himborıyafanı hena yowanımbo hohoanımo-yafandıhi ahafandı hoearı hirine hena pipıyafanı hafanı nındou afındı-yafe mbusümo puküna hoafıyafandıhi safanıya, ¹⁵“Wandıfı mami se, nımboe ramarihında? Ro-ana nındou yaŋgiri se nahurai-anehi. Ro sıheimbo aboedi hoafi wataporımbı-rıhoanda se nımındıkoate-moatükuni ra hıningındıhi hehi God Yaŋgiri Nüngumbü sowana ŋgei. Ai sünü, hıfı, sırıwara asu muŋgu-moatükuni ranambe eŋgoro ra nafımarandı. ¹⁶Horombo God ai nındou muŋguambo hıfihü hıningıreandıra, ahei hohoanımo süngu hei marıhündı. ¹⁷Ŋga ai anüngu ra nafuımböhünda sıhefımbo aboedıreamunı arandı. Ai sıheimbo sünambeahındı hoe koafoare nümbür-ambeahındı sesi yımuŋgu-remındambe sagadıri arandı. Ai sesi afındı asu ŋgusüfoambe hıhıf-hıhıfı sagadıri arandı,” masafanı. ¹⁸Ai rani hoafi ra

^c 14:11 Ai rarihi hohoanımoıyeihi Sus ai ahei adükari bogori god-anı asu Hemis ai Susındı yasımondıhündı hoafi semündü hu hoafıyu-randeımb-anı masei.

wataporimbo-marinandi, nga nindou ai ahafanimbo burmakau hifikoe fe sihefembo hohoanimo-mayei hei, nga ai kikifoe fe-ndürimbohünda tiñirifomefani.

Ai Porimbo nimoei pimarundi

¹⁹Raniyo Andiokihündi-yomo asu Aikoniamihündi-yomo Suda bidirifi ai sinimo nindou-yei ngusüfoambe botimarundüra ai Porimbo yifimbiyuwa yahomo houmbo nimoeinamborurü mburu asu ngoafi bidifirani kiafu hüründümo mahomo. ²⁰Iga Sisasimbo süngurihori-rihündeimbi ai sinei wakirihori manimboeia ai botifi haya, asukai adükari ngoafina mahu. Raniyo asu ngorü sina Barnabas dibombo Debinambo mahafani. ²¹⁻²²Rani ngoafihü aboedi hoafi ra bokarimari-heneanda asu nindou afindi ai Sisasimbo süngurihori-rihündei-mbimboyahi tükümehindi. Raniyo asu ai hihiriyafine Ristra, Aikoniam, asu Andiok raninambo hafani süngurihori-rihündeimbi nginandifi-nandürühi safaniya, “Se Godimbo ndondihi anihondümbondi-hori ndühündi. Tiñirifo afindi sihefembo tükündifemboe sihiri God nginindi hifandarandi ranambe hombohünda,” masafani. ²³Asu mamami ngoafihü anihondümborihindeimbi ranaheimbo nindou hifandi-yondüri rambo kafoarineapuri hena asu sesi wehiyafandühi Godimbo didibafi-mefineandi. Asu ai Adükarimbo anihondümborihori ahandi wariwami aheimbo hiniñgi-marineandüri.

Ai hihiriyafine Siria-yafe-ambe Andiokinambo mahafani

²⁴⁻²⁵Raniyo ai Pisidia-yafe mbusümo hafanimbo Pamfria-yafeambe tüküyafine Pergahü hoafi-wataporimbo-rinirü mburina asu Atarianambo mahafani. ²⁶Ateriahü ai sipambe fariyafine hena Andiokinambo sepimindi maho. Ranihü horombo Sisasimbo anihondümborihindeimbi ai ahafanimbo Godindi ratüpuri ratüpurihünda hiniñgi-rihipirühi seiya, “God ai sihafanimbo hipoambo-ndeapirühi mbifarihepiramboane,” masei. Asu ai ratüpuri ra ratüpuriyafani moendi-marineandi. ²⁷Ai Andiokihü tüküyafine hena, anihondümborihindeimbi guguri-marineandüri. Asu muñgu-moatükuni God ai ahafandi wari süngu ratüpuri-mayu ranahambo hoafimefani. Ai hoafiyafandühi safaniya, “God ai ngorü nafi nafimaranda Suda-yafe ndifo ai-amboani Godimbo anihondümborihori,” masafani. ²⁸Asu ai afindi si Sisasimbo süngurihori-rihündeimbi-babidimbo mamarifani.

Serusaremiñü Sisasimbo anihondümborihindeimbi-yafe bogori ai guguri-mefundi

15 ¹Raniyo asu nindou bidifiri ai Sudianoepedi Andiokina kosimo Suda-yafe ndifo Sisasimbo anihondümborüwureimbimbo

yamundirūpurūhi yahomoya, “Se Mosesindi hohoanimo sūngufekoate-ndimondūhi sihamundi fihoeari kefe tirihefekoate-ndimondani asu ŋgiri aboedambo-ndafundi,” mehomomo. ²Asu Por Barnabas ai Sudiahūndi-babidimbo hoafina simbori simbori-memo. Ranimboemo anihondūmbo-rundeimbi ai hoafi firūdūmondūhi yahomoya, “Por, Barnabas asu nindou bidifir-amboani ai Serusareminambo mbihomondamboane. Asu ai hoafi ra Kraisindi hoafi sowandūmo homo-rundeimbi asu hifandi-rundeimbi-babidimbo didiboado-mbirundamboane,” mehomomo. ³Anihondūmbo-rihindeimbi ai koamari-hehipura mahomomo. Ai Finisia asu Samaria-yafeambe mbusūmondūhi homo hoafiyomondūri yahomoya, “Asu sihefi ndifo amboani Sisasimbo anihondūmbo-marihori,” mehomonda asu anihondūmbo-rihindeimbi muṅguambo ai afindi hihif-hihifi-mayei.

⁴Ai homo Serusaremiḥū tūkūmefunda anihondūmbo-rihindeimbi Kraisindi hoafi sowandūmo homo-rundeimbi asu hifandi-rundeimbi ai ahamumbo hihifi-marihūpuri. Asu Por Barnabas ai muṅgua-moatūkuni God ai ahafandi wari sūngu ratūpurimayu ranahambo hoafimefinandūri. ⁵Ŋga asu anihondūmbo-rundeimbi Farisihūndi bidifiri ai botiyafu hoafiyomondūhi yahomoya, “Sihefi ndifo ai ahamundi fihoeari karu tirimbihou-ndamboane asu ai Mosesindi ahinūmbi hohoanimo sūngu-mbirihind-amboane,” mehomomo.

⁶Ranimboemo Kraisindi hoafi sowandūmo homo-rundeimbi asu hifandi-rundeimbi ai hoafi ranahandi nimindi wataporiyo didiboado-fembohūnda gugurimefundi. ⁷Ai wataporiyomo homo muṅgumayoa asu Pita ai nūngumbo hoafiyupurūhi yahuya, “Wandafi mami, se fifirundi horombo hondū God ai seambeahindi wambo kafaore hiniṅgimareandiri sihefi ndifo ranaheimbo wandi yasimondinambo aboedi hoafi hoafiyowani himboriyohū anihondūmbo-fembohūnda. ⁸God ai muṅguambo nindou-yafe hohoanimo ra fifireandi. Ai sihefi ndifo ranaheimbo yini mehu ra nafuimbohūnda Yifiafi Aboedi masagadūri sihefimbo masemuni nou. ⁹Ai moai sihefimbo ŋgorū sūngureandūhi aheimbo ŋgorū sūngurearū, ŋga wani. Ai anihondūmbo-marihinda asu God ai ahei ŋgusūfoambe ramareandūra sūrūhehindeimbi tūkūmehindi. ¹⁰Ŋga nimboe asu se Godimbo randihu hoeindihurū yahomo houmboa? Se ŋgiri sihefi ndifoambo sihamundi fihoeari karu timbirihound-amboane mbisimondūhi aheiwami nimboreimbi moatūkuni nandundi. Ŋga horombo sihefi amoa asu sihir-amboani nimboreimbi moatūkuni ra ŋgiri ndahumindefi. ¹¹Suda sihiri ndarihu anihondūmbo-arihundi ana, Sisasindi hipoambonambo aboedambo-ndahumboyefi, ŋga asu sihefi ndifo ai-amboani raninambo aboedambo-ndahimboyei,” mehu. ¹²Barnabas Por ai Godindi ŋginindi nafuimbo moatūkuni asu hepūnifeimbi moatūkuni ra God ai Suda-yafe ndifombo ahafandi

warisūngu ramareandi ranahambo ndorine wataporimbo-marinandi. Asu muṅgu ai watapori ra hihimbori-yomondūhi himbo yangiri kūmarundi.

¹³ Hoafi moendimayowa asu Sems ai hoafiyuhū yahuya, “Wandafi mami. Se wandi hoafi himboriyomo. ¹⁴ Saimon ai haponda ndore korifoare hoafiyuhū yahuya, God ai ahandi hipoambofe hohoanimo nafuiyuhū sihefi ndifo bidifirambo weaṅguruhi wand-anei mehu. ¹⁵ Asu Godindi hoafi hoafiyomo-rundeimbi-yomondi hoafi-amboa mami yahurai-ane. Ai yaru hoafi nda sūrū papimarūndi: ¹⁶ Adūkari ai hoafiyuhū yahuya,

‘Defitindi mamsiri ai wori nahurai birimefoendi,

ṅga sūngunambo ro hihindahe koda

asu ahandi mamsiri ra asūkainda botindihe-amboyahi

nindou ai wori birifoare mbura simbori worimbo-arandi nou.

¹⁷⁻¹⁸ Ranimbo asu nindou amuri ai randihi Adūkarimbo kokondi-horimboyei.

Asu muṅguambo Suda-yafe ndifo ro wand-anei masahi ranai-amboa kokondi-horimboyei. Hoafi nda horombo hondū ndani-moatūkuni tūkūndifemboe mehu-ane.

Adūkari ai yare hoafimayu ai rani-moatūkuni raremarandi, asu horombo hondū nindou ai ra fifirimarihindi,’ mehu.”

Amos 9:11-12

¹⁹ Ranimboyō asu Sems ai hoafiyuhū yahuya, “Ro rarihe hohoanimoayahi sihefi ndifo ai hihiriyahi Godimbo sowana mahei ranaheimbo sihiri ṅgiri tiṅirifo ndahundūri. ²⁰ Wani, ṅga sihiri aheimbo pasambe ndandihu hoafinde-fomboane. Kabomombo sesi didibafife sihefeimbi sesipoani, nimorehi sisihimopoani asu anamindihoandi birabiriyopoani, ninihondi aminda-wofifeimbi asu hori sesipoani. ²¹ Ai ṅgiri randihindi ra nimboe horombo peyomo houmbo haponda muṅguambo ṅgoafi adūkarambe nindou ai Mosesindi hoafi bokarihoemo arundi. Asu muṅguambo ṅgoafimbo nimarimbo si ranambe Suda-yei rotu worambe ritimiru arundi,” mehu.

Suda-yafe ndifo anihondūmbo-rihindeimbi ahei pas-ane nda

²² Ranimboane asu Kraisindi hoafi sowandūmo homo-rundeimbi-yomo hifandiru-ndeimbi-yomo asu anihondūmbo-rihindeimbi-yei ai hoafi firihūmundihi seiya, “Sihiri-hūndi bidifiri ai Por Barnabas babidimbo Andiokinambo hombohūnda koandihēhu-purimboane,” masei. Ai Sudas, ahandi ndūri ṅgorū Barsabas, asu Sairas ahafanimbo ṅgafani sei hiningi-marihipiri. Yimbu ai anihondūmbo-rihindeimbi-yei bogori-yafani.

²³ Ahafandi warihū ai pas mami koarihoe-mondūhi hoafiyo-mondūhi yahomoya:

“Ro Kraisindi hoafi sahumindefi hefi rihundeimb-ane fi asu hifandirihu-hundeimb-ane fi. Suda-yafe ndifo anihondūmbo-

rihindeimbi Andiokihū, Siriahū, Sirisiahū aniboadei, se karihasi-handūri.

²⁴Ro himbori-yeifimboanefi rohūndi bidifiri ai homo watapori-memondamboyo sihei hohoanimo mamikari-marandūri, ŋga asu ro moai ahamumbo randundi sefi. ²⁵Ranimboane asu ro hoafi firihumindexi mburihu sefiya ro nindou siheimbo sowana koandihēhupurimboyefi. Ro nindou ra yihoefi ŋgunindi Barnabas asu Por-babidi koamarihehupiri. ²⁶Ai moai ahafandi fimbo hohoanimo-yafani, ŋga ai sihefi Adūkari Sisas Krai ahambo-hūndambo ahandi ratūpuri ratūpuri-mayafani. ²⁷Ranimboyefi ro Sudas asu Sairasimbo koandihēhupira ŋgafani hoafi ro sūrū paparihundi rahurai randine ahafandi yafambenambo hoafindamboayafani. ²⁸Yifiafi Aboedi ai yihoefi mbusūmo nimarimbo asu ro mami mamamberihu hohoanimo-yefūhi sefiya, ‘Ro ŋgiri ŋgorū tiŋūmbi hohoanimo sihei wami nandihundi,’ masefi, ŋga se ndani hohoanimo yangiri animbo randihimboyei. ²⁹Se kabomombo sesi didibafife sihefeimbi sesipoani, hori sesipoani, ninihondi aminda-wofifeimbi sesipoan, nimorehi sisihimopoani asu animindihoandi birabiri-yopoani. Se rani hohoanimo sūŋgufepoani. Se rani-moatūkuni ra hiningarihindi ana, aboedindeimboyei. Yihoefi hoafi ndear-ane, ŋga se aboedi niboadei,”

mehomo.

³⁰Raniyo asu Serusaremihūndi anihondūmbo-rihindeimbi ai nindou yimbuyimbu ra koamari-hehipura Andiokinambo mahanimo. Asu ai anihondūmbo-rihindeimbi gugurundūri mburu pas ra masabudūri.

³¹Anihondūmbo-rihindeimbi ai pas ranambeahindi aheimbo ŋginemindindūrimbo hoafi hoeirihē hehimbo hihif-hihifi-mayei. ³²Sudas asu Sairas ai Godindi hoafi hoafiyafani rinandeimb-anafani. Raniyo asu yimbu ai aheimbo afindi ŋginemindimbo hoafi hoafiyafinandūri marinandi. ³³⁻³⁴Yimbu ai Andiokihū niŋgo-niŋgo-yafine mburina anihondūmbo-rihindeimbi ai ahafanimboya, “God ai aboedi-aboedi mbireapir-amboane asu ŋgusūfoambe afurinde kündeambui,” sei hehi nindou koamari-houpiri ranahamumbo sowana koamarihehipira hihiriyafine mahafani. ³⁵Ŋga Por asu Barnabas ai Andiokihū manimbafani. Ranihū yimbu ai nindou bodimondi-babidi Adūkarindi hoafi bokarihe-neandūhi yamundi-marineandūri.

Por Barnabas ai yūkurūbi-mefineandi

³⁶Sūŋgunambo Por ai Barnabasimbo hoafiyundūhi yahuya, “Sihiri muŋgu ŋgoafi adūkari sapo Godindi hoafi horombo bokamari-hehoandi rani ŋgoafinambo anihondūmbo-rihindeimbi ai nūŋgumbayahi rani ndūfosimbo gagimboane,” mehu. ³⁷Barnabas ai Sonimboyu Makimboyu

randeimbi-mayu ranahambo ai-babidi semündü hombo mehu. ³⁸Horombo Son Mak ai Pamfiria ŋgoafihü ahafanimbo hiniŋgimareapiri, ŋga moai ai-babidi Adükarindi ratūpuri, ratūpuriyu hu. Ŋga asu Por ai ahambo moai semündü-hombo yifiriyu. ³⁹Yimbu ai simbori hoafiyafine hena yükürübi-mefineandi. Barnabas ai Mak serümündü haya sipambe fariyafine hena Saiprusinambo mahafani. ⁴⁰Ŋga Por ai Sairas serümündü mahafani. Anihondümbo-rihindeimbi ai ahafanimbo hoafiyeyihi seiya, “Adükari ai sihafanimbo moani hipoambo-ndeapirühi mbifarihepir-amboane,” masei. ⁴¹Yimbu ai Siria, Sirisia-yafeambe hahabodifani wakirineandühi anihondümbo-rihindeimbimbo ŋginimari-nandifinandüri.

Timoti ai Por-dibo mahu

16 ¹Por ai Derbe ŋgoafi hu ŋgasünde haya Ristra ŋgoafina mahu. Sisasimbo süngurüri-randeimbi mami, ahandi ndüri Timoti ai ranihü mamaru. Ahandi hondi ai Sudahündi anihondümbo-reandeimbiyo, ŋga asu ahandi afindi animbo Grikihündiyu. ²Ristrahündi asu Aikoniamihündi anihondümbo-rihindeimbi ai Timotimbo ahiniyeyihi seiya ai nindou aboed-ani masei. ³Asu Por ai Timotimbo ahandi süngu semündü-hombo yahu haya hohoanimo-mayu. Ai Sudahündi rani hifihü maningomo ranahamumbo hohoanimoyuhü ahambo serümündü haya ahandi fi hoeari ra kariri timariherü. Sapo muŋguambo ai fifirundi Timotindi afindi ra Grikihündi-mayuwambo. ⁴Ai ŋgoafi adükarinambo homo tüküyafu, homo tüküyafu rundühiyo asu horombo Kraisindi hoafi sowandümo homo-rundeimbi asu hifandi-rundeimbi Serusaremihü hoafi rani sünguru masihoemo ra anihondümbo-rihindeimbimbo masabudüri. ⁵Asu ranimboyo Kraisindi nendi ranai hoafi raninambo ŋginindi anihondümbo-rihindühi muŋguambo si aho ra nindou ai afindi tüküyahi marihündi.

Por nindou mami Masedoniahündi hoeimariri

⁶Ŋgimi ai Frigia, Garesia-yafeambe homondane, Yifiafi Aboedi ranai ahamumbo nindou Esia hifambe ranaheimbo Godindi hoafi hoafiyo-ndüripoani meho. ⁷Raniyomo ai Bitinia hifinambo hombo yahomo houmbo Misia-yafe yüpupukimi tüküyafundane, asu Sisasindi Yifiafi ranai ahamumbo ranafi hombo yowani mehopuri. ⁸Raniyomo asu ai Misia nafiyafu hou Troas ŋgoafinambo mahanimo. ⁹Raniyu asu rani nimbokoani Por ai yafogoadinambo nahurai ranipoanimbo moatükuni hoeireandane, nindou mami Masedoniahündi ai botifi nüŋgumbo hütihütirürühi yahuya, “Se ndanafi kosafi yihoefombo farihawamuni,” mehu. ¹⁰Por ai rani-moatükuni hoeire hayamboyo ro hohoanimo-yefomboanefi God ai ranaheimbo ahandimayo hoafi ra hoafimbohünda

koamarihemuni. Ranimboane asu nimehūnou ro Masedonia hifinambo hombo naporihundūhi nafi kokomarihundi.

Ridia ai Godindi hoafi sūngumareandi

¹¹ Sipambe fariyahu Troas ŋgoafi hiniŋgirihi hohu asu Samotres airaninambo hefi asu ŋgorū sihū Neapolis ŋgoafihū tūkūmehundi. ¹² Raniyefi asu ranihū hiniŋgirihi hohu hefi, Firipai ŋgoafihū tūkūmehundi. Masedonia-yafe hifambe Firipai ŋgoafi adūkari Rom ai hifandi-marundi. Ranihū tūkūyahu yahunūmbi nimbi manimboefi. ¹³ Ŋgoafimbo nimarimbo si tūkūfeyoane, asu ro hefi ginirūmbi ŋgoafi tebūnani tūkūyahu mburihu, hoekimi mahefi. Hoe rani fikimi ranipoanimbo fondi Godimbo didibafi-fembohūnda fondi mbaningoyo sefi hoahumboyefi mahefi. Ranihū nimorehi bidifiri ai guguriyahi nimarei-ane asu ro ai-babidi wataporimayefi. ¹⁴ Nimorehi mami adūkari ŋgoafi Taiatairahūndi, ahandi ndūri Ridia, ai hoafi ro hoafimayefi ra himborimayo. Ranai ana Godimbo didibafife hoafiyorandeimbi asu ai hamburi hoarifihī kaki semindi-randeimb-ane. Adūkari ai ahandi ŋgusūfoambe hohoanimo botimare-andamboyo Por ai hoafi, hoafimayu ra anihondūmbo-mareandi. ¹⁵ Ai ahandi worambeahindi-babidimbo himoni hundūrūmayei. Ai himoni hundūrūyo mbura yihoefimbo hoafiyohū yahoya, “Se ro Godimbo anihondūmbo-marihini ra fifirindundūhi ana, se wandi worambe difomo nimandomo,” meho. Ai yihoefimbo hūti-hūti-maramuna-mboyefi, asu ro ahandi hoafi sūngu mahefi.

Por ai Sairas-dibo Firipai ŋgoafihū karabusi-mefineandi

¹⁶ Mamimbo ro Godimbo didibafifembo fondūhi hefane, moani ratūpuriyo-randeimbi nimorehi mami yihoefimbo nafini hoeimareamuni. Ŋga moaruwai nendi ahandi fiambe nimarimbo nini-moatūkuni sūngunambo tūkūfemboayo ra hoafiyo-marandi. Ranimboyo asu nindou ai ahandi hoafi himborimbo ranahambo hifandiru-rundeimbi ahamumbo kaki adūkari sahūpuri marihūndi. ¹⁷ Raniyo nimorehi ranai Por-babidimbo yihoefi sūngu hohūyo asu ai yare pukūna hoafiyowohū yahoya, “Nindou ndanai ana God Nimoamo Hondū amaru ranahandi ratūpuriyomo-rundeimb-anemo. Rananemo asu God ai siheimbo aboedambo-fendūrimboayu hoafi ra hoafiyomo rundūhanemo,” yaho marandi. ¹⁸ Muŋguambo si ai rapomayo hoamboyo asu Por ai ranahambo yihoaruko-yihoarukofi haya, asu ai hihirifi nūngumbo moaruwai nendi amaro ranahambo hoafiyundūhi yahuya, “Ro Sisasindi ndūrinambo hoafayahi se nimorehi ranahambo hiniŋgindo hawa ŋgafi,” mehundo. Raniyo asu moaruwai nendi ranai mami rani simboani hiniŋgire haya maho.

¹⁹Ahambo hifandiru-rundeimbi ranai ahamundi kaki semindi nafi awarimarihoayo ra fifirimarundi sapo nimorehi ra ŋgiri nini-moatūkuni tüküfemboayo ra asukai hoafindo. Ranimbo-anemo ai Sairas asu Por ahafanimbo kikihirüpündümo mburümbo kiafu hürüpündümo nindou adükari ahamundi koadürü guguru nimarimo rundühi mahomo. ²⁰Ai ahafanimbo sowapündümo nindou hoafi himboriyomo-rundeimbi ahamumbo soana homo hoafiyomondühi yahomoya, “Nindou yimbu ndanana Sudahünd-anafani, ŋga aiyafani nindou sihefi adükari ŋgoafihü amarei ranaheimbo moaruwai hohoanimo botimarineandi. ²¹Ran-anafani nindou Romihündi sihiri ahinümbi hohoanimo süngukoatempo-mayo ranahambo yamundarineandi,” mehomo. ²²Raniyei asu nindou afindi ranai ahafanimbo ranimbohünda papi-hoafi-marihüpiri. Raniyomo asu hoafi himboriyomo-rundeimbi ai ahafandi hoeari yümündühaupüri mburu hoafiyomondühi yahomoya, “Ahafanimbo wofi bogorinambo harimbemopira-mboane,” mehomo. ²³Raniyomo asu ahafanimbo wofi bogori-mayo ranambo puküna buburüpiri mburu, asu karabusi-marupiri. Raniyomo nindou karabus wori hifandi-randeimbi ahambo hoafiyomondowohü yahomoya, “Se ahafanimbo wudipoapondo hibadapiri,” mehomo. ²⁴Raniyu nindou ranai hoafi ranahambo himboriyu mbura ahafanimbo karabus wori safambe ragu nimi ahi yirifoneimbinambo yitiŋarihü hüputüpu-rapürimündi hiniŋgimareapiri.

²⁵Raniyafani Por Sairas ai nimbü mbusümondühi nimarifanimbo herüyafandühi Godimbo didibafi-mefineando. Asu nindou bidifiri karabusiyafu mamarimo ranai ahafanimbo himbori-memopiri. ²⁶Asu nimehünou hifihe afindi tüküfehüyo karabus wori kambohoani ranai fifimimayo. Raniyo nimai yipuri ranai sübüdihoehüyo nindou karabus worambe mamarimo ahamundi fihindi sen makiaro ra fufurimarihoayo. ²⁷Raniyu asu karabus hifandarandeimbi ranai botifi yipuri sübüdihoai meŋgorowa hoeire haya nindou ai mbafefou yahu haya yihimboyuhü penau hoandari semündü haya wandihoari hifokoandühe yahu haya ramefiyu. ²⁸Iŋga Por ai heiyuhü yahuya, “E! Se sihafi fi yimbündamboyafi! Ro-ana muŋgu amarefi,” mehuamboyu. ²⁹Raniyu karabus hifandi-randeimbi ai nindoumbi hai sowandümo sinimo yahu miŋgiyu hoafiyu mbura nimai wori safambe pipiyu hu Por Sairas yafandi yirikimi hihamindariyuhü piyu meŋguru. ³⁰Raniyu ai ahafanimbo sepürimündi weindani hüfu nimarümbo hoafiyupurühi yahuya, “Ritifo yimbu, ro nini nünüŋgundiheanda God ai wambo aboedambo-mandeandira?” mehuamboyafani.

³¹Asu ai simbori safaniya, “Se Sisas Adükari ranahambo anihondümbo-ndiworani animbo asu God ai sihambo, sihafi worambeahindi-babüdi aboedambo-ndeandürümbui,” masafani. ³²Asu raniyo Por Sairas

ai karabus hifandi-randeimbi-mayu ranahambo nindou mami rani worambe manimboei aheimbo kameihi parineri hena Adükarindi hoafi hoafimefinandüri. ³³Raniyo asu rani nimbokoani karabus hifandi-randeimbi-mayu ranai ahafanimbo sepirimüdi mbura ahafandi masimei ra popoaimarandi. Raniyo asu ai ahandi fikiminindi-babidimbo muṅgu hundürümayeri. ³⁴Raniyu ai ahafanimbo sepirimüdi hafu ahandi worambe nimarumbo sesi sagapira masowasifani. Asu ai ahandi fikiminindi-babidi haponda Godindi hoafi himboriyei mburihü anihondumbo-marihindi ranimbohünda hihif-hihifimayeri.

³⁵Raniyomo siambe hoafi himboriyomo-rundeimbi ai prisman bidifiri koarihoupurühi yahomoya, “Hapoana se nindou yimbu ranahafanimbo hiniṅgindowapira mbihafanda-mboane,” mehomomo. ³⁶Raniyu nindou karabusimbo hifandi-randeimbi ai Porimbo hoafiyundühi yahuya, “Hoafi himboriyomo-rundeimbi ai ‘hiniṅgindowapira mbihafanda-mboane,’ mehomonda-mboanahi sini hoafayahapiri, ṅga hapoana se aboeda ṅgafani,” mehupiri. ³⁷Asu Por ai prismanimbo hoafiyupurühi yahuya, “Ro-ana Romihünd-anehi, ṅga ai yihoehimbo ninihümboyo hoafi himborambe nindou himboahü buburümuni mburu, karabus worambe koamafoarümuni. Asu ran-anemo haponda ṅgoafina yihoehimbo dibo semindimuni koehefembo hohoanimoemo. Refeana wani! ṅga ahamundihoari animbo sifomo sowandümomuni koarihoomuna ṅgemboyehi,” masafandamboemo.

³⁸Asu prisman ranai ahafandimayo hoafi ra hoafi himboriyomo-rundeimbimbo hoafimemo-puramboemo. Raniyomo asu Por Sairas ai Romihünd-anafani hoafi ra himboriyomo mburu yihimbo-memo. ³⁹Raniyomo asu ai homombo ahafanimboya, “Karihapisi, ro hütiyefi,” yahomo mburu moanambühi sowapündümo mahomo. Asu raniyomo ahafanimbo hoafiyomopirühi yahomoya, “Se ṅgoafi nda hiniṅgindine hena ṅgorü goanini ṅgafani?” mehomomo. ⁴⁰Raniyafani ai karabus wori ra hiniṅgirine hena Ridiandi worina mahafani. Ranihü anihondumbo-rihindeimbi ai mafandi-hindamboyo asu aheimbo ṅgusüfoambe kikimi-foarineiri hena mahafani.

Tesaronaika-hündi ai Por Sairasimbo hürütumarihüpiri

17 ¹Raniyafani Por Sairas ai hafani Amfiporis Aporonia ṅgoafi kefoene hena hafani Tesaronaika ṅgoafihü tükümefineandi. Ranihü Suda-yafe rotu wori mami mafondaro. ²Raniyu asu Por ai yaremarandi süṅgu Suda-yafe rotu worambe kefuai hüfu nimarumbo ṅgimimbo moani nimarimbo si ra ai-babidimbo Baibor-ambeahindi hoafi ranahambo ndorihi wataporimbo-marihündi. ³Ai aheimbo Godindimayo hoafi ranahandi nimindi ra wataporimbo-randühi yahuya, “Nindou God ai ahambo nimorehi nindowenihimbo aboedambo-fendürimbo

kafoariri hiniŋgimariri ra Kraisi-ani asu ai asūbusi afindi semündü haya yifiyu mbura asūkaiyu botimefiyu,” mehu. Asūkaiyu hoafiyuhü yahuya, “Sisas ndanahambo ro siheimbo hoafayahi ai Kraisi-ani,” mehu. ⁴Nindou bidifiri ranihündambo ai hoafi ranahambo anihondümborihimburihü, Por Sairasi-yafandi süngu mahei. Nindou bidifiri Grikihündi Godimbo hohoanimo parihoreimbi asu nimorehi afindi bogorimbo-yahindeimbi ai-amboa ahafandi süngu mahei.

⁵Ranimboyo asu Sudahündi bidifiri ai ŋgusūfoambe moaruwaimarapura nindou bidifiri funiru wakirundeimbi maketambe maningomo ranahamumbo gugurimarūpura ai homo nindou afindi guguripuri mburumbo hohoanimo botimaripura ŋgoafambe ŋginindi hoafemo wakimarundi. Raniyomo asu ai Por Sairas kikihepimindi nindou afindi burimemo ranahamumbo sowana sepimindi hombohünda ahafanimbo kokorupirühi Sesonindi worina pipina mahomo. ⁶Ŋga raniyomo ahafanimbo hoeifepirikoate-yomondühi-yomo, ai Sesoniyu asu anihondümborundeimbi bidifiri-yomo ahamumbo nindou bogorimboyafu mamarimo ahamumbo sowana kiafu hürüpundümo mahomo. Ai homo puküna hoafiyomondühi yahomoya, “Nindou ndanai ana muŋguambo hifi ranihü moaruwai hohoanimoyomo marundi rananemo asūkai haponda ndanihü tüküyafu aniŋgomo. ⁷Asu Seson ai ahafanimbo worinimareapiri. Ŋga nindou muŋgu ndanai ana adükari bogori hondü Sisarindi ahinümbi hohoanimo gogonimboriheneandühi safaniya, ‘Awi nindou adükari bogori ŋgorü manüŋgu, ŋga ahandi ndüri Sisas-ani,’ safani marinandi,” mehomo. ⁸Raniyomo ŋgoafihündi bogori-yomo asu nindou afindi-yei ranai hoafi ranahambo himboriyei hehi afindi hohoanimoyeihi ŋgusūfoambe moaruwaimarandüri. ⁹Ranimboemo nindou bogori ai Sesoniyu bodimondi-yomo ahamumbo kot pemindomo mehomonda asu ai kaki masabupura hiniŋgimaripura mahomo.

Por Sairas ai Beria ŋgoafihü mamarifani

¹⁰Mami rani nimbokoani anihondümborihindeimbi ai Beria ŋgoafinambo Por Sairas koamarihhipira mahafani. Ai hafani Beria ŋgoafihü tüküyafine mburina Suda-yafe rotu wori mafengoro ranambe kefoene mahüfani. ¹¹Beria ŋgoafihü Suda mamarei ahei hohoanimo ra Tesaronaikahündi-yafe hohoanimo ŋgasündimareandi. Beriahündi ai Por Sairas-yafandi hoafi himboriyei mburihü, asu hoafi ranahambo masahümündi. Raniyo ai muŋguambo si maho Bukambeahi hoafi ra hoeirihimarihündi ahafandi hoafi ra anihondümborisei hehi. ¹²Raniyei asu Sudahündi afindi ranai hoafi ranahambo anihondümborimarihündi. Asu Grikihündi nimorehi ndüreimbi bogorimbo-yahindeimbi afindi asu nindouwenihimarihündi ai hoafi ranahambo anihondümborimarihündi.

¹³ Por ai Beriahündambo Godindi hoafi bokari-marihendūri ranahambo Tesaronaikahūndi Suda ai himboriyēi hehi Beria ŋgoafihū amboa hei tükūmehindi. Raniyo asu Tesaronaikahūndi ai nindou Beriahūndi-mayēi ahei ŋgusūfoambe moaruwai hohoanimo botimarihindūri. ¹⁴ Raniyēi asu anihondūmbo-rihindeimbi ai hohoanimo yēihei seiya Porimbo moaruwaimbo ndihorimbo yēi sei hehi ahambo hoekimi koamarihēhora mahanu, ŋga Sairas Timoti ai Beriahū mamarifani. ¹⁵ Raniyomo nindou bidifiri ai Por sowarūndūmo hou ai-babidi Atens ŋgoafina mahomo. Asu Por ai yahuya, “Sairas Timoti ai nimai wambo-sowana mbisini-fandamboane,” mehuamboemo asu hoafi ra sowandūmo hou hihiriyafu Berianambo mahomo.

Pori ai Atens ŋgoafihū Godindi hoafi hoafimayu

¹⁶ Por ai Atens ŋgoafihū Sairas asu Timoti ahafanimbo hifandapirūhi nimarūmbo hoeireandane, ŋgoafi ranihū tikai god sisami afindi burimayo ranimbo ŋgusūfoambe nimbimayu. ¹⁷ Raniyu Por ai Suda-yafe rotu worambe Grikihūndi bidifiri asu Suda bidifiri anihondūmbo Godimbo hohoanimo yomo-rundeimbi ahamumbo wataporimbo-marapuri. Raniyu muŋguambo si maho ra nimorehi nindowenihi maketambe gugureyahi nimareiane, hu ai-babidi nimarūmbo wataporiyu marandi. ¹⁸ Raniyomo Epikurian asu Stoik fifirundeimbi nindou ranai Por-babidi hoafinambo simbori-simbore-memo. Ai yaru hoafiyomondūhi yahomoya, “Nindou hoafi afindeimbi ndanai nini hoafi, hoafinda yahumbo yuwa?” mehomo. Asu bidifiri ai hoafiyomondūhi yahomoya, “Awi, ai ndifo-yafe sisami god mami ranahambo hoafimbo yahumboani,” mehomo. Ŋga Por ai Sisas yifihūndi botimefiyu hoafi ra hoafimayuwambo ranimboemo asu ai rahurai yaru hoafimemo. ¹⁹ Raniyomo ai kansir Areopagus wafuwami mafandundi ahamumbo sowana Porimbo sowarūndūmo mahafomo. Ai homo ahambo hoafiyomondūhi yahomoya, “Ro simbori hoafi nda se nindou aheimbo hoafiyafi arandi ra himborimbo sefomboanefi. ²⁰ Asu ro sihafi hoafi ra himboriyēfi hohu hoafi ranahandi nimindi ra fifirindihu sefomboanefi,” mehomo. ²¹ Ŋga nindou Atens ŋgoafihū amarei anei asu ŋgorū ŋgoafihūndi sūhūsi Atens ŋgoafihū amarei anei ranai moai amuri hohoanimo yēi rihūndi, ŋga wani. Ai ana hoafi simbori ŋgoro ranahamboane hoafiyo asu himboriyō ranimbo yangiri hohoanimo yēi. ²² Raniyu asu Por ai Areopagus wafuwami kansir-yomondi mbusūmo nūngumbo hoafiyuhū yahuya, “Nindou Atensihūndi, ro hoeiriheandane se-ana muŋguambo god ranaheimbo sūngufe hohoanimo-ane hohoanimo-memo. ²³ Ŋga ro nafina habodihūhi sihei sisami god hoeimariheandūri. Asu sisami godimbo sesi sihefe randeimbi fondi mami hoeimariheandi ranifihi se sūrū papimarihūndi ra yare hoafiyowohū yahoya, ‘Ndanana

sisami god ro fifirifekoate-mayefi ran-ane,' meho. Ŋga asu se moai rani god ra ahambo fifirihori, Ŋga se ahambo moani hohoanimoyei marihūndi God ranahambo haponda ro hoafindahandūri samboanahi.

²⁴ God ai hifi nafira mbura asu muŋguambo moatūkuni ranifihi nafira hiniŋgimareanda aniŋgo ranai Adūkar-ani sūnambeahi asu hifini. Ranimboani aiana ŋgiri nindou ai ahei warinambo worimborihūndeimbi wori ranambe ana nimandu, Ŋga wani. ²⁵ Ai moai ranani moatūkuni mbonimboramūndi randi ranimboane asu ŋgiri nindou ahei warina ahambo rarani-moatūkuni fandihehuri. Sapo ai-ani nindoumu yangiri niŋgombo hohoanimo, yafui asu muŋguambo rani-moatūkuni ra saimuni arandi. ²⁶ Amoa mamani ranahandambo-hūndiyo God ai nindou muŋgua siri nafimarandi muŋguambo hifihū niŋgombohūnda. Asu ai ahandihoari horombo nindou ranihū niŋgombo asu hifi yūpupui kikire hiniŋgimareandi. ²⁷ God ai yare hiniŋgire hayambo hohoanimoyuhū yahuya, 'Ranihū diboadimbo animbo asu ai wambo ro animboahi ra koko-mbirihūndir-amboane,' mehu. Ranimbo-hūndambo animbo nindou ai God nahi anūŋgu ranahambo kokondihori hoeindohorimboyei. Ŋga God ai mamani sihefimbo sowahi anŋguniyupoani. ²⁸ Sihiri ai-dibo yangiri animboefi, ai-dibo ahahabodefi asu ai-dibonefi aniboadefi. Rahurai-ane sihei herū fifirundeimbi bidifiri ai yaru hoafiyomondūhi yahomoya, 'Sihir-amboani Godindi nimor-ane fi animboefi,' mehomo. ²⁹ Sihiri Godindi nimor-ane fi asu ŋgiri sihiri randihu hohoanimondefūhiya, God ai gor, sirfa kapa, nimoei rani sisamiyu mbisefi. Asu ŋgiri hohoanimo-ndefūhiya, God moani sihefihoari hohoanimoyefi hohu sihefi warinambo nafimarihur-ane mbisefi, Ŋga yowani. God ai-ana gor, sirfa kapa, nimoei rani sisamiyupoani.

³⁰ Horombo nindou ai Godimbo fifirifikoate-mayeiamboyu rasimboani ai moai aheimbo ŋginindirandūri. Ŋga hapondanambe ai muŋguambo nindou muŋguambo hifihū ranaheimbo yahuya, 'Se sihei hohoanimo moaruwai daboadanambo-ndihi hehi wandi hohoanimo sūngundihindi,' mehu. ³¹ Ŋga asu ai mamani sihi diboniyu hiniŋgimareandi si ranambe ai mbumundi hohoanimo sūngundeandūhi ahei hohoanimo rani simogodūhi muŋguambo nindou yibobo-ndeandūrimbui. Ŋga ai nindou mamani rani-moatūkuni ra hifandimbohūnda hiniŋgiririmboani. Nindou ra yifimayuwa God ai honguambeahindi botimariri ranani, Ŋga ranahambo animbo sihiri anihondūmbo-ndihurimboane," mehu.

³² Nindou bidifiri ai nindou yifihūndi yangirifembo hoafi ra himboriyomo houmbo-yomo asu ai ahambo sisindi hoafimaruri. Ŋga bidifiri ai hoafiyomondūhi yahomoya, "Asūkaindefi rani-moatūkuni ranahambo sihafi hoafi himborindefo," mehomondo. ³³ Asu Por ai kansiri-yomondi watapori yare hiniŋgireapuri haya mahu. ³⁴ Nindou bidifiri ai ahambo sūngurihorūhi hoafi ranahambo anihondūmbo-

marihindi. Nindou mami ahandi ndūri Dionisius Areopagusihūndi ai kansirimbofi mamaru. Asu nimorehi ahandi ndūri Damaris ai-amboani anihondūmbo-mareanda asu nindou bidifiriyei hoafi ranahambo anihondūmbo-marihindi.

Por Korin ŋgoafihū amaru

18 ¹Sūngunambo Por ai Atens ŋgoafi hiniŋgire haya Korin ŋgoafina mahu. ²Ranihū ai Sudahūndi mami ahandi ndūri Akwira hoeimariri. Aiana Pondus-hūndiyu. Nindou raniyu ai ahandi nimorehi Prisira-dibo Itari hifi hiniŋgirine hena asu Korinina mahafe. Nindou mami Rom ŋgoafihū adūkari bogorimbofi nimarūmbi ahandi ndūri Krodius ai Sudahūndi nindou muŋgu aheimbo yahuya, “Se Rom ŋgoafi nda hiniŋgindihi hehimbo ŋgorū hifina-ndahindi,” mehuamboyafe ai Korininambo mahafe. Raniyu asu Por ai ahafembo ranihū hoeifepirimbo mahu. ³Nindou yimbu ranai Por-babidi mami rani ratūpuri ra ratūpuriyei rihūndeimbi wamboyu Por ai, ai-dibo nūngumbo seri wori kakiyei marihūndi. ⁴Muŋguambo moani ŋgoafimbo nimarimbo si Por ai Suda-yafe rotu worambe kefuai hūfu nūngumbo Sudahūndi nindou ranaheimbo wataporiyu marandi. Nindou Sudahūndi asu Grikihūndi aheimboya ahei ŋgusūfoambe botindiheirani asu Sisasiṁbo anihondūmbo-mbirihinda yahuhayamboyu hūfu hoafimendūri.

⁵Sairas asu Timoti ai Masadonia hifi ra hiniŋgirine hena Korin ŋgoafina kosafandani Por ai Sudahūndi ranaheimbo aboedi hoafi yamundeandūrihi manūngu. Ai Suda-maye aheimbo anihondūmbo hoafiyundūrihi yahuya, “Sisas ana nindou God ai nindou aboedambofembo kafaoriri hiniŋgimarir-ani,” mehu. ⁶Iḡga ai ahandi hoafi ra sahūmūndi pirihi mburihū asu ahambo tirifoarihori hoafimehūndo. Raniyu asu Por ai ahandi hoeari fihindi dūdūbudi pūpūrūfi-foareandūhi simbori hoafiyundūrihi yahuya, “Se hoafi ra himborikoate-yeihi awararihehindi ana, ro hūtiriharūpoani, ḡga siheihuar-anei. Iḡga haponda ndūhūnda ro-ana siheimbo hiniŋgindihearū hehea asu nindou sihefi ndifo sowana, ḡgamboyahi,” mehu. ⁷Raniyu asu ai rotu wori ra hiniŋgire haya wori akimi Titius Sastusindi worina mahu. Nindou ranai ana Suda-yafe ndifoyu, ḡga asu Godindi hoafi sūngure randeimbiyu. ⁸Suda-yafe rotu wori hifanda-randeimbi ahandi ndūri Krispusiyu asu ahandi fikiminindi-yei ai Adūkarimbo anihondūmbo-marihori. Asu nindou afindi Korin ŋgoafihūndi ranai Porindi hoafi ra himboriyei mburihū anihondūmbo-marihinda aheimbo hundūrimarandūri.

⁹Por ai mami nimbokoani ranipoanimbo moatūkuni yafogoadinambo nahurai hoeireandane, God ai hoafiyundūhi yahuya, “Se yihimbo-ndamboyafi, ḡga hoafindafi ndandi. ¹⁰Iḡga ro se-dibo nimboamboanahi

ranimboane asu sihambo nindou ŋgorū ai ŋgiri moaruwaimbo-ndeanini. Ŋga wandi nendi afindi ai adūkari ŋgoafi ndanihū nimandeimboyei,” mehu. ¹¹Ranimboyu Por ai mami himbani asu 6 amoamo ranihū nūngumbo Godindi hoafi aheimbo yamundeandūri marandi.

¹²Gario ai Akaia-yomondi gafman bogorimbofi nūnguambeahiyo asu Suda ai mamihūyafu mburūmbo Porimbo ŋginindimaruri. Raniyomo ai ahambo sowarūdūmo hoafi didiboadofe worina mahomo. ¹³Ai yahomoya, “Nindou ndanai ana nimorehi nindouwenihi aheimbo Godimbo hohoanimombo ra ranipoanimbo yamunde-andūrihani asu ai ahinūmbi hohoanimo hifinambo-mareandi,” mehomo. ¹⁴Por ai simbori ahamumbo hoafiyupurimbo yahuhayamboysi, ŋga Gario ai Sudambo hoafiyupurūhi yahuya, “Nindou ndanai sihefi gafmani-yafe hohoanimo ra hifinamboreandūhi moaruwai hohoanimombeimbonana ro sihamundi hoafi ra himboriya. ¹⁵Ŋga Suda se-ana sihamundi hoafi, ndūri asu sihamundi hohoanimo ranimboanemo se wambo sifomo dūdufundiri, ŋga ambe, rani-moatūkuni ana sihamundihoari ŋgomo didiboadondundi. Ro-ana yahurai hoafi himboriyo mburimbo yibobofembo-yahipoani, ŋga wani,” mehu. ¹⁶Raniyu asu ai ahamumbo hoafi didiboadofe wori ranambeahindi koamarihepuri. ¹⁷Raniyomo nindou bidifiri ai nindou ahandi ndūri Sostenis, Suda-yomondi rotu wori hifanda-randeimbi bogori, ranahambo kikihirundūmo mburu hoafi didiboadofe wori rani haŋgifoani harimemondo. Ŋga asu Gario ai moai rani-moatūkuni ranahambo afindi hohoanimoyu, ŋga wani.

Por Andiok ŋgoafina hihirifi mahūfu

¹⁸Por ai Korin ŋgoafihū afindi si nūngu mbura asu ai anihondūmbo-rihindeimbi aheimbo hiniŋgireandūri haya Senkrianambo mahu. Raniyo Prisira asu Akwira ai Porindi sūngu mahafe. Horombo Por ai Godimbo hoafiyunduhū yahuya ro mami moatūkuni randiheamboyi mehu. Ranimbo nafuimbohūnda ai ahandi mbiro ra tūpurimarandi. Raniyei asu ai Sirianambo sipambe fariyahi hehi mahei. ¹⁹Ai hei Efesus ŋgoafihū tūkūyahi mburihūmboyei asu ranihū Prisira Akwira hiniŋgireapiri haya ai yangiri Suda-yafe rotu wori ranambe kefuai hūfu nūngumbo Godindi hoafi ai-babidimbo wataporimayu. ²⁰Raniyomo asu ai ahambo hoafiyomondowohū yahomoya, “Awi se ndanihū gedūhi nimbafi,” mehomondo, ŋga “Ŋgirindahi,” mehu. ²¹Asūkaiyu ahamumbo hiniŋgifepurimbo yangiri hoafiyupurūhi yahuya, “God ai yifirayu ana, awi ro asūkainda hihirindahe didimboyahi,” mehu. Raniyu asu ai sipambe farifi mbura Efesus ŋgoafi hiniŋgire haya mahu. ²²Raniyo asu sip ai ho Sisaria ŋgoafihū tūkūmefeyo-wamboyu asu Por ai kusifoai haya hafu Serusarem ŋgoafihū anihondūmbo-rihindeimbi hihifirirū haya Andiokinambo mahanu.

Aporos ai Godindi hoafi Efesus ŋgoafihū hoafimayu

²³Raniyu asu Por ai Andiok ŋgoafihū gedūhi nūŋgu mburamboyu Garesia asu Frisia-yafeambe ŋgoafi daburi wakireandūhi ranihū Sisasimbo anihondūmbo-rihindeimbi amarei aheimbo kikimi-foefendūrimbo mahu.

²⁴Nindou mami, ahandi ndūri Aporos Sudahūndi, Areksandria ŋgoafihūndi Efesus ŋgoafihū manūŋgu. Nindou ai-ana hoafi aboedi hoafiyu-randeimbi asu Godindi hoafi ra aboedi hamindi ndore fifireandeimbiyu. ²⁵Horombo ahambo Adūkarimbo sūŋgufi hombo rani hohoanimo ra yamundi-marior-ane. Raniyu asu ai ŋgusūfoambe botireirūhi nimorehi nindowenihi ranaheimbo hoafi aboedi sagadūrihi Sisas ai nindou God koamafoariri ranahambo wudipoapore hoafiyundūri marandi. Ŋga ai moai Sisasindi hoafi aboedi muŋgua fifireandi, ŋga Son hundūri-marandūri ranahambo yangiri fifirimareandi. ²⁶Asu ai hūfu Suda-yafe rotu worambe kefuai nūŋgumbo yihimbokoate piyu haya Godindi hoafi hoafimayundūri. Prisira asu Akwira ai ahandi hoafi himboriyafe hena ahambo sowarindife hūfe ahafe worambe Godimbo sūŋgufimbo hohoanimo ra ndorine hoafimefinando. ²⁷Raniyu asūkai Aporos ai Akaia-yafe hifina ŋga yahu haya ramefiyu-wamboyei, Efesusihūndi ai ahambo farihehori hehi Aporos ai tūkūndifiyuani ndahorimindei sei hehi Godindi hoafi sūŋgurihi-ndeimbimbo pas sūri papimarihūndi. Raniyu Aporos ai hu Akaia hifambe tūkūfi mbura asu nindou ranihūnda God ai aheimbo hipoambo-mareandūra anihondūmbo-marihindi ranaheimbo afindimbo aboedi mafarihendūri. ²⁸Ai Suda-babidi simbori-simboryuhi ndore hoafiyuhū ahei hoafi hifinambo-mareandi nimorehi nindowenihi-yafe himboahū. Ai Godindi Bukambe hoafi raninambo Sisas ra God ai nindou aboedambo-fendūrimbo kafaariri hiniŋgimarir-ani yahu hoafiyuhū nafuimayundūri.

Por ai Efesus ŋgoafihū ratūpurimayu

19 ¹Aporos ai Korin ŋgoafihū nūŋguambe Por ai hifi wafuambe ŋgoafi adaburo ra hoahoanūgu hu Efesus ŋgoafihū tūkūfi Sonimbo sūŋgururū-rundeimbi hoeimareapuri. ²Asu ai ahamumbo dudufipurūhi yahuya, “Se Godimbo anihondūmbo-riwurani ahandi Yifiafi Aboedi sihamundi wami kosowai waniyo?” mehuamboemo. Asu ai simbori ahambo hoafiyomondowohū yahomoya, “Yifiafi Aboedi ra ro moai himboriyefi,” mehomondoamboyu. ³Ai yahuya, “Nini sūŋgure hayamboyu sihamumbo hundūri-marapura?” mehuamboemo. Asu ai ahambo hoafiyomondowohū yahomoya, “Sonindi sūŋguyo hundūri-maramuni,” mehomondamboyu.

⁴Por ai hoafiyuhū yahuya, “Sonindi hundūri ranana nindou ai moaruwai hohoanimo daboadanambofe hefembo aboedi hohoanimo

sūngufembo-hündamboane. Raniyu asu ai nindou Israerihündi ranaheimbo hoafiyundürühi yahuya, ‘Se nindou wandi sūngu tükefiyu ranahambo anihondümbo-ndihori. Nindou ranana Sisas-ani,’ mehu. ⁵Sonimbo sūngururü-rundeimbi ai hoafi ra himboriyomo houmbo Adükari Sisasindi ndürinambo hundürü-memo. ⁶Raniyu Por ai ahamundiwami wari manande-apuramboemo Yifiafi Aboedi ranai ahamundi wami kosiwohü ranipoanimbo hoafinambo watapori-yomondühi Godindi hoafi hoafiyomo-rundeimbi nahurai hoafimemo. ⁷Ramefundi ranana 12 nindou-yomo. ⁸Ŋgimi amoamo Por ai Suda-yafe rotu wori ranambe kefuai hüfu nūngumbo yihimbokoate hoafiyu marandi. Ai aheimboya, God ŋginindi hifandarandi ranahambo anihondümbo-mbirihinda yahuhayamboyu wataporimborarü marandi. ⁹Ŋga nindou bidifiri ai ahei hohoanimo tapihami-randürühi anihondümbofo-koateyeihi Sisasindi nafi ranahambo nindou himboahü moaruwai hoafimaye. Raniyu asu Por ai aheimbo ranihü hiniḡirearü haya, Sisasimbo sūngururü-rundeimbimbo sepurümündi haya hu Tiranusindi yamundife worambe muḡuambo si wataporimbora marandi. ¹⁰Rani-moatükuni ra yimbu himbani yare marandamboyei Sudahündi asu Grikihündi muḡuambo Esia hifihü amarei, ai Adükarindi hoafi ra himborimaye.

Skefandi nindouwenihi nimori

¹¹God ai ranipoanimbo hepünifeimbi moatükuni Porindi warisūngu yare marandi. ¹²Raniyo nindou bidifiri ai yikunimi gedühefe hoeari asu güdife hoeari ra Porindi fi sündiandeimbi sahümündi hei nindou aḡgünümboyeimbi aheiwami manandihinda ahei aḡgünü ranai muḡuyowohü moaruwai nendi ranai hiniḡi-rihindüri hehi mahei.

¹³Ŋga Sudahündi bidifiri ai hoahoḡgomo wakirundühi moaruwai nendi nindou fiambeahindi ranipoanimbo ŋginindina raguamaboru marundi. Ai moaruwai nendi hefoefembohünda Sisasindi ndürina yaru hoeimarundi. Ai yaru hoafiyomondühi yahomoya, “Por Sisasindi hoafi hoafiyu marandi ranahandi ndüri raninambo ro siheimbo anihondümboanefi hoafayefi, ŋga se nindou ranaheimbo hiniḡirihindüri,” mehomo. ¹⁴Nindou mami Sudahündi Godimbo sesi sihai-randeimbi bogori ahandi ndüri Skefa. Ahandi nimori 7-yomo ai rani-moatükuni ra ratūpuriyomo marundi. ¹⁵Ŋga asu mami sihi moaruwai nendi ranai hoafiyopurühi yahoya, “Ro Sisasimbo fifirihini asu Porimbo fifirihini, ŋga se didemoa?” mehopuri. ¹⁶Raniyu asu nindou mami ahandi fiambe moaruwai nendi nimarümbi-mayu ranai ahamundi wami horipirihoei piyuhü bubuhaimepura ai hori kapehü ahandi worambeahindi safi yanggiri mafefoundi. ¹⁷Nindou muḡu Sudahündi asu Grikihündi Efesus ŋgoafihü mamarei ranai hoafi ra

himboryei hehi, yihimboyeihī Adūkarī Sisasimbo adūkar-ani masei. ¹⁸Raniyei asu Sisasimbo anihondūmbo-rihoreimbi ai nindou himboahū tükūyahi moaruwai moatūkuni ratūpuriyei marihūndi ranahambo weindahī hoafimaye. ¹⁹Himoarokoru-rundeimbi bidifiri ranai ahei buk ranipoanimbo himoarokombo hoafi ranambe engoro ra mamambe-mamamberūhi sahūmūndi hei nindou-yei himboahū fufusimarihīndi. Horombo buk masahūmūndi kaki ra tapuiyei heimbo 50,000 kakifihīyo masahūmūndi. ²⁰Rani hohoanimo raninamboyo Adūkarīndi hoafi ranai ŋginīndi tükūfehū muṅguambo hifi yaṅgori wakimareandi.

Efesus ai Porimbo himbosi papimarihori

²¹Rani-moatūkuni ranai ramefeyo-wamboyo Por ai hohoanimoyuhū yahuya, ro Masedonia asu Grik hifi, ŋgasūndi-heapiri mbundiha sipambe fandahe hehea Serusareminambo, ŋgamboyahi mehu. Ai yahuya, “Rani nafi boatei ŋga heheambo animbo, asu ŋga Rom ŋgoafi hoeindihea,” mehu. ²²Raniyu ahambo fariheneri-rinandeimbi, Timoti asu Irastusimbo Masedonianambo koarihepira ai-boatei mahafanda, asu ai Esia hifihū akidou gedūhi safi manūṅgu.

²³Rani-simboani Efesus ŋgoafihū Sisasīndi hohoanimo ranahambo hūmbo hoafinambo simbori-simborimaye. ²⁴Nindou mami Demitrius ai sirfanambo muṅguambo sisami nafira randeimb-ani. Raniyu rani-moatūkuni-nambo tikai god sisami Atemisīndi rotu wori nafiramarandi. Asu sisami nafiru rundeimbi ai ranifihī kaki afīndi sowandūmo marundi.^d ²⁵Raniyu Demitrius ai sisami nafiru-rundeimbi-yomo asu nindou amuri muṅgu simogodi ratūpuri, ratūpuri-yomorundeimbi ahamumbo gugureapuri haya hoafiyupurūhi yahuya, “Wai, se fifirarundi sihefi ratūpuri ndanamboane kaki ra tūkefeyo. ²⁶Sihamundihoari se hoeirundi asu himboryomo nine-moatūkuni Por ratūpurimayu ra. Ai yare hoafiyuhū yahuya, ‘Sisami god warinambo ratūpuriyo-weimbihūndi ana god hondūyopoani,’ yahu arandi. Nindou afīndi ranaheimbo gugurearū haya hohoanimo ŋgorū sūṅguarearū marandi ra Efesus hifihūndi yaṅgiri randūripoani, ŋga bidifiri muṅgu Esia hifihūndi kameihī randūri. ²⁷Porīndi hoafi ranambo ana sihefi kaki semīndimbo ratūpuri ra moaruwai-ane mbiseimboyei. Rani yaṅgiriyo poani, ŋga sisami god rehi Atemisīndi wori ra nindou-yei himboahū moaruwai himbondimboe. Asu ahandi ndūri adūkarī ra hifinambo-ndeamboe. Sapo nindou afīndi Esia hifihū asu muṅguamho hifihū ahambo didibafiyahīndo arihūndi,” mehu.

²⁸Rani hoafi ra himboryei hehi nindou ranai ŋginīndiyehī pukūna seiya “Efesusi-yafe Artemis ana Adūkar-ane!” masei. ²⁹Raniyo hoafi

^d 19:24 Artemis ai tikai god sisami nimoreh-ane. Ahandi rotu wori adūkarī Efesus ŋgoafihū mafondaro, ŋga muṅgu ai wori ranahambo aboedi saf-ane masei.

ra adūkari ŋgoafi Efesusūhi mahoamboyo nindou ranai muŋgumbo hoafi warapomayei. Raniyomo bidifiri ai Masedoniahündi Gaius asu Aristakusimbo kiafu hürripindimo ahei gugurihi nimarei rihündanambo mahomo. Nindou yimbu ra Por-babidi hahabodifani rinandeimbiyafani. ³⁰Raniyu Por ai nindou afindi ahei mbusūmo ŋga mehuamboemo asu sünggururū-rundeimbi bidifiri ai ranambe hombo yowani mehomondo. ³¹Porindi ŋgunindi Esia hifihündi, gafman bogori ai-amboani hoafiyomo koarihoemondūhi yahomoya, “Ambe, se gugurife wataporiyorambo ranambe hopoani,” mehomoni.

³²Nindou afindi ai mamikari hohoanimoyeihi ninūŋgu-yefūhiyefi masei. Bidifiri ai ŋgorū-moatükuni hoafiyeyane, asu bidifiri ai ŋgorū-moatükunimbo hoafimayei. Ŋga nindou afindi nimboeyei muŋgu mafandihindi ra ai moai fifirihindi. ³³Raniyomo Sudahündi bidifiri ai Areksandambo ahei himboahū ninendihori hei hiniŋgimarihora manūŋgu. Raniyo nindou bidifiri ai hoeirūwurū houmbo moaruwai hohoanimo nimindihūmbai mehomoni. Raniyu Sudambo fehendürimbo hūnda ai wari nimoamo-mareandi hoafi kikimbirihūmūndia yahu haya. ³⁴Ŋga ai Sudahündi-mayuwa ahambo fifirihori raniyei pukūna yimbu awa mami afindi hoafiyeyi seiya, “Efesus-yafe Atemis ana adūkar-ane,” masei.

³⁵Raniyu asu Efesus-yafe kuskus ai ahei hoafi gobadihendürūhi yahuya, “Efesusihündi se himboriyei. Muŋguambo ai fifirihindi nimoei sisami Atemis sūnambeahindi piyo haya makoso asu ahandi hoafiyorambo wori Efesus ŋgoafi ra ai hifandarandi. ³⁶Nindou mami ai-amboani ŋgiri hoafi ndanahambo tikai-ane mbūsu. Ŋga ranimbo-hūndambo-animbo se sihei hoafi ra kikindihūmūndi. Ŋga se awi ranahambo hohoanimokoate-yirūnimbo randihimboyei. ³⁷Asu se nindou yimbu ndanahafanimbo sahūpūrimūndi masūhūsi. Ŋga asu ai moai nini-moatükuni sisami godindi worambeahi hūmbuhūniyafani asu wori moaruwaimbo-rineandi. Asu moai ai nimorehi god sihefi ranahambo tirifoefe hoafi, hoafiyafani. ³⁸Ŋga asu Demitrius ai ahandi mami ratūpuriyomo-rundeimbi babidimbo ahamundi hoafi ŋgoro ranana awi ŋgorū-simboani ranipoanimbo animbo fifirifemboane. Asu bogori gafman ai nimarimo-mboanemo, ŋga ai animbo hoafi ranahambo fifirindumboemo. ³⁹Ŋga sihamundi hoafi ra yagodowani ana, mami wataporambe animbo ranahambo anihondū wataporimbo-mboane. ⁴⁰Haponda sihiri hoafi afindi ndahumi-ndemboeyefi, nimboe sihiri ndani sihi simbori hoafimayefi ranimbohūnda. Ranahandi nimindihündi ana moai hoafi yaŋgoro, ŋga moaniyefi simbori hoafimayefi. Ŋga sihefi gugurife moaruwai ranahambo düduwehimuni ana, asu anikiri simbori hoafimandefi,” mehu. ⁴¹Ai yare hoafiyundūri mburamboyo asu koamariheira bukürūmehindi.

Por ai Masedonia asu Grik hifina mahu

20 ¹Sūngunambo hoafi afindi-afindimayei ranai ho sisihi-mareandamboyu, Por ai Sisasimbo anihondūmbo-rihindeimbi gugureandūri haya ŋgusūfoambe ŋginiramindūri mbura asūrahini-mareandūri. Raniyu asu ai yare hiniŋgirearūi haya Masedonia hifina mahu. ²⁻³Raniyu ai rani hifambe huhū Sisasimbo sūngurihindeimbi afindi ranaheimbo ŋgusūfoambe ŋginindi kūrīhi hohoanimo-mbeyeia yahuhaya hoafimeindūri. Raniyu asu Masedonia hifi hiniŋgire haya Grik hifihū tūkūfi ŋgimi amoamo manūŋgu. Raniyu sūngunambo ai Siria hifina sipambe hombo hohoanimo-mayuwamboemo, Suda ai ahambo hifokeofimbo yahomo houmbo hoafi fimarūndūmo. Ranimboyu asu asūkai hihirife hefe Masedonianambo hombo hohoanimo-mayu. ⁴Asu Sopater, Pirasindi nimori, Beria ŋgoafihūndi ai Por-dibo mahūfu. Raniyo Tesaronaikahūndi Aristarkus Sekundus yafani, Gaius, Derbe-hūndiyu, Timotiyu asu Tikikus, Trofimus Esia hifihūndi-yafani ai muŋgu Por-babidi mahifomo. ⁵Muŋgu ai-boatei hifomo Troas ŋgoafihū nimarimo yihoeimbo himbomemo. ⁶Raniyefi Suda ai Bret yisikoate sesimbo si ranai muŋgumayowamboyo Firipai ŋgoafihūndi sipambe fariyahu hohu hondahūfeimbi siyefi mburihu hefi Troas ŋgoafihū ahamumbo sowahi tūkūmehūndi. Raniyefi Troas ŋgoafihū 7 si mamarefi.

Por ai Yutikusimbo yifihūndi botimariri

⁷Raniyefi asu Sande Adūkarindi sesi, sesimbohūnda gugurimehūndi. Raniyu Por ai sūmbo nafi himbowambo nindou afindi ranaheimbo gedūhi wataporiyu humbo nimbi mbusūmondūhi tūkūmefiyu. ⁸Wori ro nimarefi wataporiyefeimbi ranambe nimoamo yibadiwami ram afindi siyowohū hangifoani burimayo. ⁹Nindou hoarifi mami ahandi ndūri Yutikus ranai nafitambe karihoemo hiniŋgimarundi raniwami mamaru. Por ai hoafimayu hoanūgumamboyu Yutikus ai yapombo hoafinambo kūmeru. Raniwami yapombofi nimarūhūndamboyu fimaramūndu yangiri hanū ŋgimi yibadi ŋgasūnde haya hifini pimayu. Bidifiri ai hanimo sowarūndimondane, ai nimoko meŋguru. ¹⁰Raniyu Por ai hanū ahandi fi kameihi amofi hanūhūyu wagidirūmūndūhi hoafiyundūrihi yahuya, “Se awi ŋgusūfo kikiboadihindūhi afindi hohoanimo-ndeimboyei, ŋga nindou ndanana yangir-ani,” mehu. ¹¹Refi mburamboyu asūkaiyu nimoamo farifi hafu bret hifirire mbura masahūsi. Ai aheimbo gedūhi wataporimbo-randūri mbura sūngunambo siambe hūfihamindi masūfuwamboyu hiniŋgirearūi haya mahu. ¹²Yutikus ai yifihūndi yangirimefiyu-wamboyei asu ai ahambo ŋgoafina sahorimindei hei ŋgusūfoambe aboedi kūrīhi hehimbo mamarei.

Por Troas ŋgoafi hiniŋgire haya Miretusinambo mahu

¹³Ŋga ro-boatei sipambe fariyahu hohu Asos ŋgoafihū Porimbo fihimūndi hefe hombohūnda mahefi. Ai hifi nafi huhū hoafiyumunūhi

randafundi mehumunamboyefi ahambo nafini fihimindimbo mahefi. ¹⁴Raniyu asu Por ai yihoefimbo Asos ŋgoafihū sūfu mbureamuni haya, asu sipambe sahurimindexi hohu, Mitirini ŋgoafinambo mahefi. ¹⁵Raniyefi sipambe fariyahu hohu Mitirini ŋgoafihūndi hefimbo siambe Kios airanikimi tükümehundi. Apoeffi simayowamboyefi asu siambe Samos airan tüküyahu mburihu asūkai ŋgorū sihi Meretus ŋgoafihū tükümehundi. ¹⁶Por ai Efesus ŋgoafi ŋgasūndife hefe Esia hifihū gedūhi hifo niŋgombo moei yahuhayamboyu hohoanimomayu. Ai nimehūnou Serusareminambo hifo ahei hihifi-hihifimbo si Pendikos tükūfemboayo ra hoeifemboyu hohoanimomayu.

**Por ai nindou bogori Efesusihūndi ahamumbo
asūrahinire hiniŋgimareapuri**

¹⁷Por ai Miretus ŋgoafihū tükūfi nimarūmboyu Efesus ŋgoafinambo hoafi koamarihendi Kraisindi nendimbo hifandu-rundeimbimbo ai sifomonda hoeindiheapuri yahuhaya. ¹⁸Ai sifomo tükūmefundamboyu hoafiyupurūhi yahuya, “Ro boatei tükūyahe Esia hifihū nimboambo asu muŋguambo si se-babidi animboahi nini-moatükuniyo ramariheandi ra sihamundihoari se fifirumboanemo. ¹⁹Rani-simboani Suda ai wambo moaruwaimbo-fendirimbo hoafi fimarindūmonda, raniyo asu afindi hohoanimoyahūhi aranimbo yaŋgirimayahi. Ro wandi fi hifinambo-riheandūhi Adūkarindi ratūpuri rani yaŋgiri sahamindi manimboahi. ²⁰Se fifirundi ro sihamumbo farihefepurimbo aboedi hoafi bokarihefembo moai awi sahi, ŋga nindou afindi himboahū asu sihamundi mamami worambe yamundiheapuri marihand-ane. ²¹Ro Suda, Grik yiboboambo ahini hoafiyahindurūhi sahiya, ‘Se sihei hohoanimomoaruwai hiniŋgindihi hehi Godimbo hohoanimondei asu Sisas sihefi Adūkari ranahambo anihondūmbo-ndihori,’ sa marihandi. ²²Ŋga hapoana Yifiafi Aboedi ranai wambo koamarihendira Serusareminambo ahūhi, ŋga ro ranihū ŋgūhani nini-moatükuni wambo tükūfemboayo ra ro moai fifiriheandi. ²³Ŋga ro rarihe fifiriheandi, Yifiafi Aboedi ai mamami ŋgoafihū tükūyaheandani wambo hoafiyondirihū yahoya, ‘Se hibadambo ŋgafi, ŋga karabusindafo nimbori afindi ndowandifi ndamboyafi,’ yaho arandi. ²⁴Ŋga ro moai wandi fimbo adūkari moatükun-ane sahi. Ŋga Adūkari Sisas ai wambo ratūpuri asendi ra tiŋirifofo ho moendifembo saheheamboanahi hohoanimoyahi. Wandi ratūpur-ane nda, God ai nindou moani hipoamboreandūri arandi raninambo aboedi hoafi ranahambo anihondūmbo hoafindamboyahi.

²⁵Horombo ro sihamundi mbusūmo hahabodūhi God ŋginindi hifandarandi ranahambo hoafiya marihandi. Ŋga haponda ro fifiriheandi sūngunambo ana se muŋguambo ŋgiri wandi ŋgusūmboari asūkaindimbo hoeindundi. ²⁶Ranimboanahi haponda ro sihamumbo anihondūmbo

hoafehapuri. Sihamundi mbusūmo nindou mami ai awararihoayu ana, ro hūtirūhūnipoani. ²⁷Ro moai Godindi hohoanimo muṅguambo sihamumbo ranahambo hoafimbohūnda mbosiyahi. ²⁸Se sihamundihoari asu muṅguambo Godindi nendi amboa wudipoapondou hibadūndūri. Yifiafi Aboedi ai aheimbo hibadiyondūrirambo kafoare hiniṅgimareapuri. Se Godindi nendi hibadūndūri sipsip hifandira-randeimbi nou. Ŋga aheimbo ahandi horina pemiyu haya masemūndūndūri. ²⁹Ro fifiriheamboanahi, sihamumbo hiniṅgi-riheapuri hehea ahahi ana, wosihoafi hoafeimbi nendi ai nimambeahindi yafori nahurai tūkūndahi sihamundi mbusūmo nimboeimbo sipsip ra moaruwaimbo-ndihindūrimboyei. ³⁰Asu nindou bodimondi siheiambeahindi animbo bogorimbondafu niṅgomboemo. Ai animbo Sisasindi sūngurihi-ndeimbimbo ahamundi sūngu hombohūnda tikai hoafi yamundūndūra asu ai ahamundi sūngu ŋgeimboyei. ³¹Ranimbo-hūndambo animbo se hibadūmbo niṅgomo! Ŋga se ranimbo ndondu fifirindundi. Ŋgimi himbani maho ra nimbi-nimbisi ro arani kapehū moai mamami sihamumbo ahini hoafimbo mbosiyahi. ³²Asu haponda ro sihamumbo Godindi wariwami hiniṅgariheapuri asu se ahandi hipoambofoe hoafi ranahambo hohoanimondimo. Hoafi rananimbo sihamumbo ŋginindamindi-purimboe asu muṅguambo aboedi-moatūkuni God ai nindou wandanei mehu ranaheimbo dagadūrūmbui.

³³Ro-ana moai nindou ŋgorūndi gor, kaki, hoeari napo ranimbo hohoanirihe rihandi. ³⁴Se sihamundihoari yaru fifirundi, ro wandihoari wandi warinambo ratūpurimayahi ra nine-moatūkuni ro mbonimbo-rihamindihūhi wandi fi farihehe-rihandihūmbo asu nindou ro-dibo niṅgomondeimbi ranahamumbo fariheheapuri marihandi. ³⁵Ro rarani ratūpuri, ratūpuriyahūhi sihamumbo rarihe nafuimehapuri nindou dūdi ai fi ŋginindikoate ranaheimbo fandihe-hurimboane. Adūkari Sisas ai yare hoafiyuhū yahuya, ‘Nindou ai ŋgorūmbo rarani napo segodombo hihifi-hihifayu ana, asu nindou ai napo semindimbo hihifi-hihifi ŋgasūndeamboane,’ mehu ranahambo sihiri ndondihu fifirindihumboane,” Por ra mehu.

³⁶Por ai ahamumbo rani hoafi ra hoafiyupuri mburamboyu, asu nindou bogori-memo rani-babidimbo yimindiho pusire nimarūmbo Godimbo didibafimefiyu. ³⁷Raniyomo asu ai muṅguambo arasirani-yomondūhi-yomo Porimbo mburūndūmo houmbo wakikihimarūwuri. ³⁸Raniyu Por ai hoafiyupurūhi yahuya, “Hapondani ana se ŋgiri kaindimbo wandi ŋgusūmboari hoeindundi,” mehuamboyo, asu ai ranimbo ŋgusūfo afindi kūrūndūhi hipoambo-marūwuri. Raniyomo asu ai ahambo sip sowanambo koakomarūri hanimo.

Por ai Serusareminambo mahu

21 ¹Ranihū Efesusihūndi hifandi-rundeimbi hiniṅgiriḥupuri mburihu sipambe fariyahu hohu refe ho refe ho rakoate

Kos airanina mahefi. Ranihūnda simayowa Rodes airanina hefi mburihu asūkai hefi adūkari ŋgoafi Patarahū tükūmehundi. ²Ranihū tükūyahundane, sip mami ranai Finisia hifina hombo yahohaya ramefeyo-wamboyeŋfi hoeirihi hohu ranambe fariyahu hohu mahefi. ³Mami hefi Saiprus airan hoeirihi hohu wari kadūdani hefi hohu Siria hifinambo mahefi. Raniyeŋfi asu hefi Tair ŋgoafihū tükūmehundi sip ai ranihū napo mbahibadi-foefembomayowa. ⁴Ranihū hefi nindou Adūkarimbo süngurihindeimbi mamareia hoeirihuri hohu asu ai-babidi 7 si manimboeŋfi. Yifiafi Aboedi ranai aheimbo ŋgusūfoambe botimareandūra Porimbo hoafiyeihi seiya, “Se yowani Serusareminambo hifopoani,” masahūndo. ⁵Ndeara ranihū nimboeŋfi mburimumboyeŋfi asu ranihūnda botiyahu hohu mahefi. Raniyomo asu Adūkarimbo süngurureimbi ai ahamundi nimorehi nimoakidibou-babidi adūkari ŋgoafi tebūnani sahūmündihūmuni hei gudihī tükūyahu yiri yimbu pupusirihi nimarefimbo ai-babidi Godimbo didibafimeŋfi. ⁶Raniyeŋfi simbori hihifūriyeŋfi mburihu asu ro sipambe fariyahu hohu mahefa ai asūkai hihiriyahi ŋgoafina mahūsi.

**Sisaria ŋgoafihū Godindi hoafi hoafiyo randeimbi
nindou Agabus ai Porimbo hoafi masagado**

⁷Sipambe fariyahu hohu hefi Tair ŋgoafi hiniŋgirihi hohu hefi Toremes ŋgoafihū tükūmehundi. Raniyeŋfi ranihū anihondūmbo-rihindeimbi wandafi mami aheimbo hoeirihundūri hohu asu ranihū mami si mamareŋfi. ⁸Asūkai ŋgorū sihi Toremes ŋgoafi hiniŋgirihi hohu hefi Sisaria ŋgoafihū tükūmehundi. Asu nindou mami Firip aboedi hoafi hoafiyo-randeimbindi worambe fariyahu mapoeŋfi. Nindou ranai ana farihoundūri rundeimbi 7 ranambeahindi mbusūmonindiyu hayamboyu. ⁹Nindou ranai ana nimorehi nimori yimbuyimbu anamindihū-fekoate Godindi hoafi hoafiyei rihūndeimbi-yei afindiyu. ¹⁰Ro Sisaria ŋgoafihū yahunūmbi nimbi nimarefaniyo asu Godindi hoafi hoafiyo-randeimbi mami ahandi ndūri Agabus ai Sudia hifi hiniŋgire haya Sisaria ŋgoafinambo makusu. ¹¹Raniyu ai yihoefimbo sowahi kusū tükūfi haya Porindi-mayo hoeari kikihirihefembo ret ra semūndū haya ahandi yitāŋari watāŋari ra ahandihoari hūputūpo-marihoayu. Ai hoafiyuhū yahuya “Yifiafi Aboedi ai yare hoafimayo, ‘Ndahurai nindou Sudahūndi Serusaremihi mamarimo ranai ana hoeari kikihirihefembo aharambūri ndanahambo hūputūpugawuri mbundu Suda-yafe ndifombo dabupurimboemo ahambo moaruwaimbo-fimbohūnda,’ mehu,” mehu.

¹²Nimorehi nindouwenihī rani ŋgoafihūndi-babidi rani hoafi ra himboriyeŋfi hohumboyeŋfi asu Porimbo Serusarem ŋgoafina se hafopoani sefi hohu kikifoefimbi hoafi hoafimehundo. ¹³Raniyu asu Por ai simbori hoafiyuhū yahuya, “Se nimboe arani-araniyeihi wandi hohoanimo

moaruwaimbo-arihinda? Ro moai karabusimbo yangiri hohoanimoyahi, ŋga ro Serusarem ŋgoafihū Adūkari Sisasindi sūngu yifimbo wanjei samboanahi hohoanimoayahi,” mehu. ¹⁴Ŋga ro ŋgiri Porindi hohoanimo ŋgorū-sūngundihundi sefi hohumboyefi asu hoafi ranahambo ambe masefi. Raniyefi hoafiyefūhi sefiya, “Adūkarindi hohoanimonambo yangir-animbo rani moatūkuni ra tūkūmbifeyo-wamboane,” masefi.

Por ai Serusarem ŋgoafihū hafu tūkūmefiyu

¹⁵Yahunūmbi nimbiyefi mburihu asūkai yihoefi napo fufurihumindexi hohu Serusareminambo mahahifi. ¹⁶Raniyei asu sūngurihindeimbi nindou Sisariahūndi ai ro-babidi mahūsi. Ai yihoefimbo nindou mami Saiprusihūndi horombo ai boatei Sisasimbo sūngurireimbi ahandi ndūri Nason ahandi worinambo sowandūmuni houmbo mahefi ahandi worambe niŋgombohūnda. ¹⁷Hefi Serusarem ŋgoafihū tūkūmehu-ndamboyei sūngurihindeimbi ai yihoefimbo hoeirihimuni hehi hihifi-hihifimayei. ¹⁸Ŋgorū sihi Por ai ro-babidi Semsimbo hoeifimbohūnda hefane, asu hifandi-rundeimbi muŋgu ranihū mamarimo. ¹⁹Por ai ahamumbo hihifirapuri mbura muŋgua-moatūkuni God ai ahandi wari sūngu Suda-yafe ndifoyei mbusūmo ramareandi ranahambo ndore wataporimbo-marandi.

²⁰Raniyomo ai hoafi ra himboriyomo hou Godimbo aboed-ani mehomo. Asu ai ahambo hoafiyomondowohū yahomoya, “Wandafi, se fifirowandi. Sudahūndi nindou afindi tausen ai Sisasimbo anihondūmbo-rihorimboanei. Ŋga muŋgua anihondūmbo-rihindeimbi ranai Mosesindi ahinūmbi hohoanimo ra sūngufembohūnda titaboaraye. ²¹Ŋga nindou bidifiri ai sihambohūnda hoafiyahūndūruhi seiya, ‘Por ai Suda bidifiri Griki-yomondi hifihū anihoadei aheimbo hoafiyundūruhū yahuya, “Mosesindi hohoanimo ra se sūngundihindūhi asu nimoakidibou-yomondi hoeari kandihū tirindihehimboyei. Yaboateihūndi hohoanimo ranana se sūngundūhūmboyei,” mehu, masei. ²²Se sūhūfimboanafi hoafi ra ai himbori-ndeimboyei. Ŋga sihambo moaruwaimbofembo hohoanimo-ndeiyeiya, asu sihiri nūngumanda-hunda? ²³Ŋga ro sihambo mami hoafi hoafindahuninani animbo asu se rani-sūngundiwandi. Yihoefi-memo nindou yimbuyimbu Godimbo mami moatūkuni refemboane yahomo houmbo-anemo aniŋgomo. ²⁴Se ai-babidi ŋgafūhi animbo asu ahamundi fi Godindi himboahū aboedi tūkūfembo hohoanimo ra randundi. Asu ahamumbohūnda kaki dabapura ai ahamundi mbirinaŋi ra kikimbiru-ndamboane. Ai randundani rananimbo asu Suda ai sihambo nine hoafimemo ra nindou-yei himboahū tikai nahurai himbondimboe. Rananimbo ai-amboaniya awi Por amboani ahinūmbi hohoanimo ranahambo sūngureandeimb-ani mbiseimboyei. ²⁵Suda-yafe ndifo anihondūmbo-rihindeimbi ranaheimbo pas sūrū papirihu

koarihehundūhi hoafimayefi sapo horombo ro Mosesindi ahinūmbi hohoanimo ranahambo masihehundi ranimbohūnda. Pas ranambe se sisami godimbo sesi didibafife sihefeimbi sesipoani, se hori sesipoani, se ninihondi amindawofifeimbi sesipoani asu se nimorehi sisihimoyo nindouwenihi birabiri-yorapoani, masefi,” mehomo. ²⁶Raniyu Por ai ŋgorū sihi nindou ranahamumbo sepurimūndū haya hanū fi aboedi tūkūfembo moatūkuni ra ai-babidi ramareandi. Raniyu ai Godindi worambe kamefuendi. Rani si fi aboedi tūkūfembo hohoanimo ra moendindowani animbo asu mamami Godimbo sesi segodimbo ranahambo Por ai sesi sihou-rundeimbimbo hoafimepuri.

Godindi worambe Porimbo Suda ai kikihi-marūndūmo

²⁷Fi aboedi tūkūfembo moatūkuni moendimayowamboyo 7 si ra muṅgumbo yaṅgiri-yoambeyahi Suda bidifiri ai Esia hifihūndi Porimbo Godindi worambe hoeimarūwuri. Raniyomo asu ai nindou afindi ranahamumbo ŋgusūfoambe botimaripura Porimbo kikihimarūndūmo. ²⁸Ai pukūna hoafiyomondūhi yahomoya, “Israerihūndi nindou, se farihaumuni! Nindou ndan-ani muṅguambo hifi ra hoahoanṅuhū nindou muṅguambo sihiri Israerihūndi asu sihefi ahinūmbi hohoanimo asu Godindi wori ndanahambo hifinambore arandi. Rani yaṅgiriyoapoani, ŋga haponda ai nindou Grikihūndi sihefi Godindi wori ndanambe sepurimūndū kefue raraorandūhi wori nda moaruwaimbo-reamboani,” mehomo. ²⁹Grik hifihūndi Efesus ŋgoafihūndi Trofimus ai Por-dibo Serusarem ŋgoafihū manūṅguwa hoeirūwuri houmboemo ai yaru hoafiyomondūhi yahomoya, “Nindou yihoefi ndifohūndi ndanana Por ai Godindi wori ranambe serimūndū kambeifuai,” yahomo houmbo hoafimemo. ³⁰Raniyo hoafi ra Serusarem ŋgoafihū mahowa himboriyomo houmbo muṅgu fandu mburu pipina mahomo. Raniyomo asu ai Porimbo kikihirūndūmo houmbo Godindi worambeahindi weindana kiafu hūrūndūmondūhi nimai wori yipuri ra pamarundi.

³¹Raniyei nindou afindi ranai Por hifokoeffimbo sei hehimbo hohoanimomayei. Raniyo hoafi afindi afindimayeiya, Rom ami bogori hondū Serusaremihū amaru ranai tiṅirifo tūkefeyo yahu fifirimareandi. ³²Raniyo asu nimehūnou ami bogori hondū ai ahandi ratūpuriyomorundeimbi bogori-yomo asu ami bidifiri-yomo ahamumbo sepurimūndū haya ahamumbo sowana pipimemo hanimo. Nindou afindi ranai ami bogori asu ami hoeirūpuri houmboemo Porimbo bubumarūwuri hūndi kikihimarūndūmo. ³³Raniyu ami bogori ai Por sowana hūfu kikihirūmūndi mbura hoafiyuhū sen yimbunambo hūputūpugawuri mehu. Raniyu ai dūdufihū yahuya, “Nindou nda dūdia? Asu ai nini-moatūkuni moaruwai rareanda?” mehuamboyo. ³⁴Raniyomo asu bidifiri ai ŋgorū hoafi hoafiyomo asu bidifiri ai ŋgorū-moatūkuni hoafiyomondūhi hoafi

afindi afindimemo. Ai mamipo hoafikoate ŋgorū kiafu ŋgorū kiafu raraomarundamboyu ami bogori ai fifirifekoateyuhū ahandi amimbo yahuya, “Ndowarūndūmo ami worina gafomo keboundi,” mehupuri. ³⁵Por ai yipiŋi saboagoambe tūkūfiyuane, nindou afindi ranai ahambo bubumbo mehomonda ami ai hoeiru houmbo warihū-warihūru sowarūndūmo mahafomo. ³⁶Raniyomo asu nindou afindi Porindi sūŋgu mahomo ranai pukūna hoafiyomondūhi yahomoya, “Ahambo hifokoarūwuri,” mehomomo homo.

Por ai Sudambo ahandi anihondūmbofe ranahambo hoafimendūri

³⁷Ami ai ndeara Porimbo ahamundi wori safanambo sowarūndūmo hafomo kefoefembo yaŋgiri-memondamboyu asu Por ai ami bogori hondūmbo hoafiyundowohū yahuya, “Ro awi sihambo mami hoafi hoafindahanini samboanahi,” mehuamboyu. Asu ami bogori ai dūdūfindowohū yahuya, “Se Grik hoafiyafi-randūhiyafi?” ³⁸Hamanda Isipihūndi mami ai gafman-babidi yifiari botimareandi. Ai 4,000 yifiariyomo-rundeimbi sepurimūndū nimi wohi furikoate-reandūhi mahu. Se-mbayafinawe masahi, ŋga wani. Nimboe se Grik hoafi fifirowandi,” mehundowamboyu. ³⁹Asu Por ai simbori hoafiyundūhi yahuya, “Ro-ana Sudahūnd-anahi. Ro-ana Tarsus ŋgoafi Sirisia hifihūnd-anahi. Ŋga wandi ŋgoafi ana ndūri adūkari yaŋgorūmb-ane. Ŋga karihasi awi ro nindou ndanaheimbo hoafinda samboanahi,” mehuamboyu. ⁴⁰Asu ami-yomondi bogori ai hoafiyafipuri mehuamboyu Por ai yipiŋiwami botifi nūŋgumbo nindou ranahamumbo warina pakamafoareapuri. Muŋgu ai hoafi kibodiri-marūndūmo-ndamboyu Por ai Hibru ahamundi hoafinambo hoafimepuri.

22 ¹Por ai yahuya, “Wandi wandafimami, asu apemami se himboriyomo ro wandi fimbo hoafi hoafombo samboanahi,” mehu. ²Por ai Hiburu ahamundi hoafinambo watapori-mayuamboemo asu ai hoafi kibodirūndūmo houmbo manīŋgomo-ndamboyu asu ai ahamumbo hoafiyupurūhi yahuya, ³“Ro-ana Sudahūndi asu Tarsus ŋgoafihū Sirisia hifambe tūkūmeheandi, ŋga asu Serusarem ŋgoafi ndanihū adūkarimayahi. Raniyahi ro Gamerier-dibo nimboambo ai wambo sihefi boagiri-yomondi ahinūmbi hohoanimo ra yamundi-mareandira ro wudipoaporihe fifirimariheandi. Raniyahi ro Godindi hohoanimo sūŋgufembo tiŋjirifomayahi haponda se tiŋjirifoaye nou. ⁴Nindou bidifiri Adūkarindi Nafi sūŋgurihindeimbi aheimbo ro moaruwaimbo-mariheandūra bidifiri ai yifimayei. Ro bidifiri aheimbo seninambo hūputūpurihēhearū mburiha karabusina sahamindiharū mahahi. ⁵Sesi sihai-randeimbi adūkari bogoriyu asu kansir muŋgu ai ro nindou moaruwaimbo-mariheandi hoafi ra anihond-ane mbisimo hoafindimboemo. Sudahūndi Damaskus ŋgoafihū amarei ra aheimbo

ai pas sūrū papīru koamari-hoemonda sahamindi Damaskusinambo mahahi. Raniyahi ro nindou Sisasiṁbo anihondūmbo-rihindeimbi ranihū amarei ranaheimbo hūputūpurihefendūri semūndindūri Serusaremina ho karabusi-fendūrimbohūnda mahahi.

⁶Ro ha ndeara Damaskus ŋgoafikimi hūfinimbo tūkūyaheandane nimehūnou sūnambeahindi si adūkari ranai kosi wambo boakimafoareandiri. ⁷Raniyahi ro hifini piya yaŋgora himboriyahane hoafi mami ranai hoafiyohū yahoya ‘Sor, Sor, se nimboe wambo moaruwai-mborowandiri aranda?’ mehondiri. ⁸Asu ro dūdūyaheandūhi sahiya, ‘Adūkari, se didiyafa?’ ‘Ro Sisas Nasaretihūd-anahi, ŋga asu se wambo sūngurūhi-ndeimbimbo moaruwaimbo-ariwandūri ana, wambo amboa moaruwaimbo rowandirūh-anafi,’ mehundiri. ⁹Raniyomo asu wandi wandafi mami ai si ra hoeimarundi, ŋga asu ai nindou dūdi wambo hoafimayundiri ranahandi hoafi moai himboriyomo. ¹⁰Asu ro dūdūyaheandūhi sahiya, ‘Adūkari, ro nūngumandahea?’ masahamboyu. Asu ai hoafiyundirūhi yahuya, ‘Se botindafo hawa Damaskusinambo ŋgafi, ŋga ranihū animbo God ai sihambo muŋgu-moatūkuni ratūpurindafi mehu ra nindou ranihū amaru ranai hoafindūninimbui,’ mehundiri. ¹¹Si ranai ŋginindi hamindiyo haya himboamupui-randūhi muŋgu-moatūkuni hoeifekoate-mehamboemo nindou ro-dībo masinimo ranai wambo warihū kikihi-rundūmondiri houmbo Damaskusinambo mahefi.

¹²Ranihū nindou mami ahandi ndūri Ananias Suda sihefi Godimbo ahinirūrihū Mosesindi ahinūmbi hohoanimo ra ndore sūngureandeimbi manūngu. Nindou ranahambo Sudahūndi Damaskusihū animboei ranai aboed-ani masei. ¹³Nindou ranai wandi fikimi sūfu nūngumbo hoafiyundirūhi yahuya, ‘Wandafi Sor, se asūkaindafi ndondo himboarindafi!’ mehundiri. Asu hoafi ra niŋgowambe asūkaiya aboedi himboariyahūhi ahambo hoeimarihini. ¹⁴Raniyu asu Ananias ai yahuya, ‘Sihefi amoaoyafe God ai sihambo, ahandi yifiri sūngufembo horombo hondū kafaore hiniŋgimareanini. Nindou mbumundi hamindi Sisas ranahambo hoeifihi asu nine hoafi ahandi yahamonindi tūkefeyo ra himborimbohūnda kafaore hiniŋgimareanini. ¹⁵Seanimbo muŋguambo nindou ranaheimbo Adūkarimbohūnda weindahi hoafindafindūri nine-moatūkuni se hoeiro asu himboriyafi marandi ranahambo. ¹⁶Asu se haponda nimboe gedūhi hifandaranda? Botiyafo hawa hundūrūndafūhi asu ahandi ndūrinambo hoafinda-findoani sihafi moaruwai hohoanimo ra popoaimbihenda-mboane,’ ” mehu.

God ai Porimbo koamariheira Suda-yafe ndifo sowana mahu

¹⁷⁻¹⁸Por ai hoafiyuhū yahuya, “Asūkaiya ro Serusareminambo ha ranihū Godindi wori ranambe didibafi-yaheandūhi nimboahani

yafogoadinambo nahurai ranambe Sisasimbo hoeimarihini. Raniyo ai wambo yare hoafiyundirūhi yahuya, ‘Nimai se Serusarem ŋgoafi hiniŋgiro hawa hafi, ŋga nindou ndani ŋgoafihūndi ranai ana se wambohūnda hoafayafi ra ŋgiri himborindei,’ mehundiri. ¹⁹Asu ro simbori hoafiyahūhi sahiya, ‘Adūkari, horombo ro Suda-yafe rotu wori afindi mafeburo ranambe kefoehe hūhūhi nindou sihambo anihondūmbo-rihininei-mbimbo karabusi-riherū hehea hariyahandūri marihandi ra ai fifirihindi,’ masahi. ²⁰Sihambo wataporimbora randeimbī Stifen hifokoarūwuri simboani ro fikimi nimboambo wandi ŋgusūfoambe aboed-ane masahi. Raniyahi asu nindou ahambo hifokoamarūwuri ranahamundi hoandari hoear ra sahamindi manimboahi. ²¹Raniyo asu adūkari ai hoafiyundirūhi yahuya, ‘Hafisi, ŋga ro sihambo aŋguni Suda-yafe ndifo sowana koandihe-heanina ŋgamboyafi,’ mehu.

Rom ami-yomondi bogori Porimbo mafariherū

²²Nindou afindi ranai ahandi hoafi hihimboriyei heimbo asu ‘Suda-yafe ndifo’ ra hoafimayu-wamboyei pukūna hoafiyehū seiya, “E, ahambo hifokoefimboani, ŋga nindou ndahurai ana ŋgiri yaŋgiri nūŋgu!” masei. ²³Raniyei ai pukūna hoafi karihehindūhi ahei hoeari-mayo ra wurakamo-rihūndūhi hifi hasūfi nimoamo karūhūmūndi pimarihindi. ²⁴Ranimboyu asu ami bogori ai amimbo hoafiyupurūhi yahuya, “Por ndowarūndūmo gafomo sihamundi worambe koaboarūwuri. Suda ai ahambo pukūna hoafimemondo nimindi ra fifirifembohūnda ahambo bubundūrihū dūdūdafundo,” mehu. ²⁵Ŋga asu ai ahambo bubumbohūnda kikihirurūndūmo mburumbo hūputūpo-marihawu-ramboyu asu Por ai ami bogori ŋgorū akimi manūŋgu ranahambo hoafiyundūhi yahuya, “Romihūndi mami ahandi hoafi diboarūfekoate-ayambe ahambo bubumbo ra ahinūmbi hohoanimo yaŋgoroai waniyo?” mehuamboyo.

²⁶Asu ami bogori ai hoafi ra himboriyu haya hu ahamundi bogori hondū hifanda randeimbī ranahambo hoafiyundūhi yahuya, “Se ŋgiri rasūŋgūndiwori. Nindou ndanana Romihūnd-ani,” mehu. ²⁷Raniyu asu ami bogori hondū ai Porimbo hūfu hoafiyundūhi yahuya, “Se wambo hoafiyafindiri, se Romihūndi hondūyafi?” mehuamboyu. Asu Por ai simbori hoafiyundūhi yahuya, “Yini, ro rananahi,” mehundo. ²⁸Raniyu asu ami bogori hondū ai hoafiyuhū yahuya, “Ro kaki afindi piriheandūhiyahi asu Romi-hūndimboyahe tūkūmeheandi,” mehu. Asu Por ai yahuya, “Ŋga wambo wandi me ai wakimaramindi-ndiramboyahi ro Romi-hūndimboyahe manimboahi,” mehu. ²⁹Raniyomo asu nindou bidifiri ahambo dūdūfihī bubumbo yaŋgiri-memo ai hoafi ra himboriyomo houmbo nimai hinŋgirūwuri sūsūhūmefundi. Raniyu asu ami bogori hondū ai ahambo hoerira mayowa nindou ranai Romihūndi-

mayuwa ai senina hüputipo-marihawuri ranahambo ai-amboani yihimbo-mayu.

³⁰Porimbo Suda ai papi-hoafimarūri nimindi ra ami-yomondi bogori hondū ai wudipoapondihe fifindihea mehu. Ranimboyu asu ai rasinambo Porimbo seninambo hüputüpu-marihawuri ra fufuriherū haya Godimbo sesi sihou-rundeimbi bogori-yomo asu Suda-yafe kansir-yomo ai babidi gugurife wataporimbo hoafimepuri. Raniyu asu ai Porimbo ahamundi himboahū niᅅgombohūnda serūmündü mahu.

Por ai Suda-yomondi kansirimbo hoafimepuri

23 ¹Por ai kansirimbo hübudureapurūhi yahuya, “Wandi wandafi mami, ro Godindi himboahū moai nini moaruwai yariheandi. Ro nine wandi ᅅgusūfoambe aboed-ane masahi raniyo yarihe marihandi,” mehu. ²Ai hoafimayuwamboyu asu sesi sihai-randeimbi adūkari bogori Ananias ai nindou Porindi fikimi manᅅgomo ahamumbo Porimbo yafambe hoarūhi harimbo hoafimepuri. ³Asu Por ai ahambo hoafiyundūhi yahuya, “Se-ana yimbu hohoanimoeimb-anafi. ᅅga asu God ai harindününimbui. Se ndanihū amarifi ra ahinūmbi hohoanimo süᅅgufehū wambo hoafi diboadofembo safimboanafi, ᅅga se-ana ahinūmbi hohoanimo ra sowandifi pirowandūhi wambo harimbo hoafimefipuri,” mehuamboyu.

⁴Nindou Porindi fikimi manᅅgomo ranai hoafiyomondowohū yahomoya, “Awi se-ana Godimbo sihai-randeimbi adūkari bogori ranahambo moaruwai hoafiyafindowohanafi,” mehomondo. ⁵Asu simbori ai yahuya, “Wandi wandafi mami, nindou ranai Godimbo sihai-randeimbi adūkari bogori-mayu ra ro moai fifirihini. Godindi Buk ai hoafiyowohū yahoya, ‘Nindou sihei bogori ranahambo se moaruwai hoafindamboyafi,’ meho ra fifiriheandi,” mehu. ⁶Por ai fifireandi kansir bidifiri ai Sadyusi-yomo asu bidifiri ai Farisi-yomo. Ranimboyu ai ahamumbo pukūna hoafiyupurūhi yahuya, “Wandi wandafi mami, ro-ana Farisi ambeahind-anahi asu wandi ape-amboani Farisi-ambeahind-ani. Ro anihondūmbo fifiriheamboanahi nindou yifiyeimbihūndi ranai ana asūkaindei botindahi-mboyei rani hoaf-ane nda hoafayahi. Ranimbo-hündamboane wambo hoafi eᅅgoro,” mehu.

⁷Raniyo Por ai rani hoafi ra hoafimayuwambo Sadyusi Farisi ai ahamundihoari simbori hoafiyomo-ndūhiyomo yibobomarundi. ⁸ᅅga Sadyusi ai hoafiyomondūhi yahomoya nindou yifihūndi botife asu sūnambeahindi nendi ai yifiafikoate-anei yahomo marundi. ᅅga Farisi ai muᅅguambo hoafi ranahambo anihondūmboru marundi. ⁹Raniyo asu Sudahūndi ranai pukūnambo hoafiyomo wakimarundi. Asu Farisi-ambeahindi ahinūmbi hohoanimo yamundu-rundeimbi ai botiyafu niᅅgomombo pukūna simbori hoafiyomondūhi yahomoya, “Nindou

ndanahambo ana ro hoeirihurani moai ahandi nini hoafi yangoro. Ao, yifiafi mamimbayo asu sūnambeahindi nendimbayo ahambo hoafimendo ra anihondüyohüpo,” mehomō. ¹⁰Simbori hoafi ranai moani afindi hamindi tüküme Feyo-wamboyu asu ami bogori hondü ranai Porimboya hifokoandüwuri-mboemo yahuhaya yihimbomayu. Raniyu asu ai ahandi animbo se hanimo Porimbo ahamundi warambeahindi hüründümo houmbo sihamundi worina hafomo mehu.

¹¹Ŋgorü nimbokoani Adükari ai Porimbo sowahi tüküfi nüngumbo hoafiyundowohü yahuya, “Se ŋginindi nimbafi! Serusarem ŋgoafihü ndanihü se wambohünda anihondümbō hoafimayafi, ŋga asu Rom ŋgoafihü amboani rahurai animbo hoafindafi,” mehu.

Suda ai Porimbo hifokoefimbo hoafi fimaründümo

¹²Raniyomo asu siambe Suda bidifiri ai guguriyafu hoafi fimaründümo. Raniyomo ai dabariyafundühi yahomoya, ŋgiri sesi dagudifi hoe ndimindefi ndihundi, ŋga Porimbo hifokoandihuri hohumbo animbo randihumboyefi mehomō. ¹³Nindou bodimondi 40 ŋgasünde-andeimbi-yomo hoafi ra firündümo masihoemo. ¹⁴Raniyomo ai Godimbo sihou-rundeimbi bogori asu Suda-yomondi bogori sowahi hafomo hoafiyomondühi yahomoya, “Ro-ana Porimbo hifokoandihuri hohumbo animbo sesi dagudimboyefi sefi anihondümbō dabarimehundi. ¹⁵Ranimbo-hündambo animbo se-anemo asu kansir-anemo se ami bogori hondü ranahambo sihamumbo sowana Porimbo semündü-kosimbohünda hoafi koandihōmo. Ranimboya kudüwani ahandi hoafi engoro ra wudipoapondihu fimirindihumboane mbisimo. Ŋga ro-ana muŋguambo moatükuni nafirihumindefo-mboanefi, ŋga ndühi tüküfekoate-yuwambe animbo nafini ahambo hifokoa-ndihurimboyefi,” mehomō.

¹⁶Ŋga Porindi amiŋgiri ai hoafi fimaründümo ra himboriyu haya ami-yomondi worambe farifi hu Porimbo rani hoafi ra hoafimeindo. ¹⁷Raniyu asu Por ai ami bogori ŋgorü hoafimeinduwa makusuwambo hoafiyundowohü yahuya, “Nindou hoarifi nda sowarindifi ami bogori hondü sowana hafi. Ai bidifiri moatükuni ahambo hoafendombo yahumboani,” mehundo. ¹⁸Raniyu asu ami-yomondi bogori ranai Porindi amiŋgiri serümündü haya hahüfani bogori hondü-mayu ranahambo sowahi tüküyafine hoafiyundühi yahundoya, “Sapo karabusihündi Por ranai wambo hoafiyu koamarihendira nindou hoarifi nda sihambo sowana sahümindü asihühi. Ai sihambo mami hoafi hoafiyonini-mbohünda,” mehundo.

¹⁹Raniyo asu ami bogori hondü ranai nindou ranahambo wamburümündü haya aipoanimbo hafani düdufindühi yahuya, “Nini hoafimboyafi hoafiyondirimbo masafa?” mehundo. ²⁰Asu Porindi amiŋgiri ai hoafiyundühi yahuya, “Suda ai sihambo tikandu houmbo

animboya sūmbu se Por kansirimbo sowana semündü hani ahamumbo sowahi ahandi hoafi engoro ra wudipoapofe fifirifembo hūnda mbisimboemo. ²¹Se hoafi ranahambo anihondūmbo-ndowamboyaifi, nga sapo nindou bodimondi 40 ngasūndeandeimbi nafini worarindu houmbo hibadūmboemo Porimbo hifokoe-fimbohūnda. Ai yahomoya awi ngiri sesi dagudifi hoe ndimindefi ndihundi, nga ahambo hifokoandihuri hohumbo animbo randihumboyefi mehomo. Ai-ana ndeara muṅgu-moatūkuni nafirundūmo houmbo-anemo asu sihamboane tūru hifandarundi se yini mbisafani animbo yahomo houmbo,” mehundowamboyu. ²²Raniyu asu ami-yomondi bogori hondū ranai hoafiyundūhi yahuya, “Se nindou ṅgorūmbo hoafindafūhiya wamboya ahambo rarihe hoafimehando mbisamboyaifi, nga yowani.” Rayahundo mburamboyu asu ai nindou hoarifi-mayu ranahambo koamariheira mahu.

Porimbo Feriks sowana koamarihawuri

²³Ami bogori hondū ai ahandi hoarehi bogori-mefani ahafanimbo hoafiyupirūhi yahuya, “Ami 200 pisao sowandūmondeimbi, asu 70 nindou hos wami nimarimondeimbi ṅgorū, 200 nindou yifiari sowandūmondeimbi ra gugurindineapuri mbundina mungu-moatūkuni nafindūndūmo digau houmbo animbo asu Sisaria ṅgoafina nimoakidibou boabofoefeambe gadimo. ²⁴Hos bidifiri Por ai raniwami hanimbohūnda kokoboadu hiniṅṅindu mbundūmbo animbo asu ahambo ndonduri Rom bogori nindou Feriks sowana hibadūri gadimo,” mehu. ²⁵Raniyu asu ami-yomondi bogori ranai pas ra ndare sūrū papirandūhiya.

²⁶Karihasi, Ro Krodius Risias-anahi gafmani-yomondi bogori adūkari Feriksimbo pas nda sūrū paparihandi: ²⁷Suda ai nindou ndanahambo mburundūmo houmbo ndeara akimi hifokoeffimbo yanggirimemo. Ṽga asu ro himborimayahi ananiya ai ana Romihūndi mayuwamboyaifi asu ro wandi ami-babidimbo ahambo ahamundi warambeahindi hūmarihhuri. ²⁸Ai nimboruri ahambo papi-hoafaruri saheheamboyaifi asu ro ahamundi kansir sowana sahūmindi mahanihi. ²⁹Ro hoeiriheandani ana ai ahamundi ahinūmbi hohoanimo ranimboyo moani hoṅgirūwuri houmbo papi-hoafimaruri. Ṽga moai nini hoafi ahambo hifokoeffi asu karabusifi rambo papi-hoafi ranambe tūkufeyo, nga wani. ³⁰Suda ai Porimbo hifokoeffimbo hoafi dibo masihoemo ra ro himborimayahi. Ranimboanahi asu sihambo sowana ro ahambo nimai koarihehina akusu. Nindou dūdi ahambo papi-hoafimaruri ranahamumbo sihambo sowahi tūkūyafu hoafi didiiboado-mbirundamboane sahehea hoafimehapuri.

³¹Raniyomo asu ami ai ahamundi ratūpuriwambo refembo yahomo houmbo Porimbo sowarundūmo rani nimbokoani Andipatris ṅgoafina mahanimbo. ³²Ṽgorū sihi ami hifinafi mahanimbo ranai ahamundi worina hihiriyafu Serusareminambo hafomondūhi-yomo asu hosiwami homo-

rundeimbi ahamumbo koamari-haupura Porimbo Sisaria ngoafinambo sowaründümo mahanimo. ³³ Ai sowaründümo hanimo Sisaria ngoafihü tüküyafu gafmani-yomondi nindou bogori Feriksimo pas sabudowohü asu Porimbo ahambo sowahi pamarüwuri. ³⁴⁻³⁵ Feriks ai pas ra hoeireandani mayowamboyu asu Porimbo se nini hifihündiyafi yahu haya düdumefindo. Por ai Sirisia hifihündi-mayu ranimbo ai fifire hayamboyu asu ai hoafiyuhü yahuya, “Awi ro sihafi hoafi himbori-ndamboyahü nindou sihambo papi-hoafimaranini ranai kodimondani,” mehu. Raniyu asu Herotindi wori adükari ranambe Porimbo koafoefi mburumbo hifandumbo hoafimayu.

Suda ai Porimbo papi-hoafimarüri

24 ¹ Hondahüfeimbi si mungumayowa asu Godimbo sihai-randeimbi bogori adükari ahandi ndüri Ananias ai nindou bogorimbo yafundeimbi-yomo asu Terturus Romi-yafe ahinümbi hohoanimo fifireandeimbi nindou ra-babidi Sisaria ngoafina mahanimo. Raniyomo asu ai tüküyafu gafman bogori hondü Feriks ahandi himboahü Porimbo papi-hoafimaruri. ² Raniyo Porimbo mborai yahundowani süfu tükümeñiyuwa asu Terturus ai ahambo papi-hoafirürühi yahuya, “Feriks nindou adükari, se hifandamunambe ana, ro moai yifari-yifariyefi rihundi, nga aboedi hamindi manimboefi. Raniyo asu sihafi-mayo hohoanimo aboedi ranambo ndani hifihü ro simbori hohoanimo süngurihu marihundi. ³ Ranimbo-hündamboane munguambo ngoafi munguambo si yihoeñi ngusüfoambe aboedi fufurifoare-amunühi asu sihambo hihifarihunini.

⁴ Awi ro sihambo gedühi kikihemindimbo moeisahi, nga yihoeñimbo hipoambo-ndowamunühi yihoeñi hoafi akidou nda himborindafi sefomboanefi. ⁵ Ro hoeirihurani nindou ndanana afindimbo moaruwai hohoanimoyu randeimb-ani asu munguambo hifi Suda-yomondi mbusümo ai hari hoafi botire-arandi. Por ai nindou bidifiri aipoanimbo hohoanimoyei rihündeimbi Sisas Nasaretihündi süngurihuri-rihundeimb-aneñi sei arihündi ahei bogoriyu. ⁶⁻⁷ Raniyu asu Godindi wori ranamboani moaruwaimbo-ndiheyahü yahuhaya hohoanimo-mayuwa asu ro ahambo kikihimari-hurimindeñi. Ro ahambo yihoeñi ahinümbi hohoanimo ranambo yibobofembo maseñi, nga ami bogori hondü Risias ai kusü ahandi nginindi-nambo yihoeñi warambeahindi hümarümündu. ⁸ Raniyu Risias ai hoafiyuhü yahuya, ‘Ahambo papi-hoafimbo nindou ranai sihafi himboahü tükümbiyafu-ndamboane,’ mehu. Asu nindou ranahambo düduariwori ana, se sihafihoari mungu-moatükuni ro ahambo papi-hoafimarihuri ra anihondumbo fifirindowamboyafi,” mehu. ⁹ Munguambo Suda ai Terturus-babidi Porimbo papi-hoafirürühi yahomoya, “Rani-moatükuni ra e, anihond-ane,” mehomo.

Por ai Feriksindi himboahū hoafimayu

¹⁰Raniyu asu Feriks ai Porimbo hoafiyafi yahumbo warinambo yangiri koamarisherū. Raniyu asu Por ai hoafiyuhū yahuya, “Se afindi himbani ndani hifihū yiboboro-randeimbi manimbafi ra ro fifirihē-amboanahi. Ranimboanahi ro ahamumbo simbori hoafombohūnda moai yihimboyahi. ¹¹Se düdu-düduayafi ana, fifirindowamboayafi, nga 12 si maho ra ro Godimbo hohoanimombohūnda Serusareminambo hahūhane. ¹²Ro-ana moai nindou ngorū-dibo Godindi worambe simbori hoafiyahi. Asu ro moai Suda-yafe rotu worambe adükari ngoafihū amboani hari hohoanimo botiriheandi. Ro raweheanda asu Suda ai moai hoeirundiri, nga wani. ¹³Haponda ai wambo papi-hoafarundiri ra ngiri aboedi hoafindomondani fifirindowandūhi anihond-ane mbisafi.

¹⁴Ŋga ro nda anihond-ane asahi. Ro yihoe fi amoao-yafe Godimbo hohoanimoyahando arihandi nafi ra Suda ai ngorūpoanimoane asei. Asu munguambo hoafi ahinūmbi hohoanimoambe engoro ranane asu Godindi hoafi hoafiyomo-rundeimbi sürü papimarūndi anihondūmbo-ariheandi. ¹⁵Rananahi asu ro anihondūmbo-riheandūhi God ai moaruwai asu aboedi hohoanimoyeimbi yifimayei munguambo botifendū-rimboayu rani si ranahambo hifandarihandi nindou ranai hifandarūndi nou. ¹⁶Ranimboanahi asu ro munguambo si wandi ngusūfoambe aboedi hohoanimo God asu nindou-yafe himboahū aboedi mbimarowa sahehea tiñirifoayahi.

¹⁷Ro afindi himbani maho ra habodimboyahi asu süngunambo wandi sirambeahindi Suda aheimbo saiwani Godimbo saimbohūndambo Serusaremina mahahūhi. ¹⁸Ro rarihe hehea wandi fi aboedi tüküme Feyowa Godindi worambe Godimbo siheheandane, Suda ai wambo hoeimarundiri. Ŋga asu rani-simboani ranihū nindou afindi moai ro-dibo niŋgombo hoafi gobadirundi, nga wani. ¹⁹Ŋga asu Esia hifihūndi Suda bidifiri ai maningomo. Ai-boatei wambo papi-hoafimarundiri. Ŋga nindou ranai ahamumbo sowahi wandi hoafi engoro-ana, ai sihambo sowahi ndūhi sifomo wambo papi-hoafi-mbirūndiramboane. ²⁰Ai refekoate-ayomo ana, asu nindou ndanai ro Suda-yomondi kansir ahamundi himboahū nimboambo nine moaruwai ramariheandi ra hoeiarundiri ana, asu ai ndūhi tükündafu sihafi himboahū hoafindi-ninimboemosi. ²¹Mami hoafi yangiri mbengorimbai? Horombo ro kansir ahamundi mbusūmo nimboambo rarihe pukūna hoafiyahūhi sahiya, ‘Yifiyeimbi aiana botindahimboyei sa anihondūmbo-ariheandi masahi ranimboanemo ai sihafi himboahū hoafemo ranana?’ masahi,” mehu.

²²Feriks ai Adükarimbo anihondūmbo-rihoreimbi-yafe hohoanimo ra aboedi fifireandi, nga ranimboyu asu Sudambo awi hibadu niŋgomo mehupuri. Asu ai Suda ahamumbo hoafiyupurūhi yahuya, “Awi ami

bogori hondū Risias ai kudūwani animbo asu ro sihamundi hoafi ra didiboado-ndiheamboyahī,” mehupuri. ²³Raniyu asu ami bogorimbo hoafiyundūhi yahuya, “Se ahambo hibadirihū awi hiniŋgirou-hiniŋgiroundiri. Asu Porindi ŋgunindi ai ahambo nine akidou moatūkuni farihefimbo ra se yowani mbisamboyahī,” mehu.

**Feriks ai Porimbo yimbu himbani karabusi-
fimbohūnda hūputūpo-mariherū**

²⁴Yahunūmbi nimbiyo hayamboyawane, Feriks ai ahandi nimorehi Drusira-dibo makosafe. Ahandi nimorehi ranai ana Suda srambeahindiyo. Raniyu asu Feriks ai Porimbo mborai yahundo hūrūherū haya Porindi Sisas Kraismbo anihondūmbofo hoafi himbori-mayundo. ²⁵Raniyu Por ai mbumundi hohoanimō, nindou ai ahandi hohoanimō ra ndonde hibadandi hoafi, asu God ai sūngunambo sihefimbo yibobonde-amunūmbui hoafi ra hoafimayuwa asu Feriks ai hoafi ranahambo yihimbomayu. Raniyu asu Feriks ai hoafiyundūhi yahuya, “Andai ŋgafi, ŋga awi sūngunambo ranipoanimbo ambe-yaŋgirūhi sihambo mborai mbisahanimboyahī,” mehundo. ²⁶Ŋga asu Feriks ai mami moatūkunimbo kameihiyu himboyu marandi. Ai ndanananiya Por ai kaki ndembui yahuhayamboyu asu afindimbo ahambo mborai yahundo haya wataporimborūri marandi. ²⁷Sūngunambo yimbu himbani ranai howane, asu nindou mami ahandi ndūri Posius Festus ai Feriksindi fondi masemūndu. Raniyu asu Feriks ai Sudambo hoafi nafireapurūhi Por karabusambe hiniŋgimariri.

Por ai Rom adūkari bogori Sisar papi-hoafi himborimbo hoafimayu

25 ¹Festus ai Sudia-yafe adūkari bogorimbofi haya hu ranihū tūkūmefiyu. Asu ŋgimi nimbi howane, rani-simboani Festus ai Sisaria ŋgoafi hiniŋgire haya hafu Serusarem ŋgoafihū tūkūfi manūngu. ²Raniyo ranihū Godimbo sihou-rundeimbi bogori-yomo asu Suda bogori bidifiri-yomo ranai ahambo sowana Porimbo papi-hoafiyumbo hoafi sowandūmo mahomo. ³Ai Festusimbo dūdu-dūduyomo-ndūhi yahomoya, “Se yihoefimbo fandihawamuni hawambo animbo Porimbo koandihaworani Serusareminambo mbisūfu-wamboane,” mehomo. Ai ramehomo ra nafini worarife nīmarihefe Porimbo hifokoeffimbo yahomo houmboemo. ⁴Raniyu asu Festus ai ahamumbo simbori hoafiyupurūhi yahuya, “Por ana Sisaria ŋgoafihū karabusambe mbanūngu. Ŋga ro-amboani ŋgiri amitata Sisaria ŋgoafinambo hihirindahe gadihī. ⁵Ranimbo asu sihamundi bogori nindou bidifiri ranai ro-babidi mbihanimo-ndamboane. Asu nindou ranai moaruwai hohoanimonduanī ana, ai ahambo ranihū papi-hoafimbīru-ramboanesi,” mehu.

⁶Festus ai, ai-babidi 8 simbaiyo asu 10 simbaiyo nīmarū mbura asūkaiyu Sisaria ŋgoafinambo hihirifi mahanu. Raniyu asu rani sinambo

papi-hoafi didiboadofoe wori ranambe nimarūmbo Porimbo papi-hoafimbohūnda ndowarūndūmo tūkūndafundi mehu. ⁷Raniyo asu Por ai ahambo sowahi tūkūmefiyu-wamboemo Suda Serusarem ŋgoafi hiniŋguru houmbo makosomo ranai botiyafu ahandi fikimi wakiru niŋgomombo ahambo papi-hoafimaruri. Ai moaruwai moatūkuni ramareandi yahomo houmbo hoafi ranahambo anihond-ane yahombo moai nini Festusimbo nafuiyomo, ŋga wani. ⁸Raniyo asu Por ai simbori ahamumbo güre-güererapurūhi yahuya, “Ro moai nini moaruwai moatūkuni nünūŋguriheandi. Suda-yomondi ahinūmbi hohoanimo, Godindi adūkari wori asu Romi-yafe bogori adūkari Sisarimbo amboani muŋguambo ro moai nini moaruwai nünūŋguriheandi, ŋga wani,” mehuamboyu. ⁹Raniyo asu Festus ai Suda-memo hihif-hihifi-yopurimbohūnda Porimbo düdufindowohü yahuya, “Awi se Serusareminambo hafombo safomboyafi? Refe-anasi ro sihafi papi-hoafi engoro ra gagü Serusarem ŋgoafihü fifirindiheamboane,” mehunduamboyu. ¹⁰Ŋga asu Por ai hoafiyuhü yahuya, “Haponda hoafi didiboadofoe wori ndanambe animboahi nda ai Romi-yafe bogor adūkari Sisarindi wor-ane. Wori ndanambe animbo wandi hoafi nda ndanihü didiboadofemboane. Ŋga se wudipoaporo fifirowandai ro moai Suda ahamumbo nini-moaruwai nünūŋguriheapuri. ¹¹Asu ro ahinūmbi hohoanimo ra hifinambo-riheandühi nini-moatūkuni rawariheandi ana, ai wambo hifokoandundira yifimbo aboed-ane anasi. Ŋga ro moai fefoefembo hoafiyahi. Ŋga asu ai wambo papi-hoafarundiri rani-moatūkuni ai tikai yanggirayo ana, asu didai wambo ahamundi warihūndeandiri, ŋga wani. Ŋga awi ro Sisarimbo hoafindahani animbo ai wandi hoafi nda himborimbiyu-wamboane,” mehu. ¹²Asu Festus ai kansir-babidi watapori-yomo mburu hoafiyuhü yahuya, “Se Sisarimbo ai sihafi hoafi ra himborimbiyu-wamboane masafi ranimbohūnda se ahambo sowana ŋgafi,” mehundo.

Festus ai Agripambo Porindi hoafimbo düdumefiyu

¹³Raniyo asu yahunūmbi nimbi howane, Suda-yafe adūkari bogori ahandi ndüri Agripa ai ahandi rehi Bernaisi-dibo Sisarianambo makosafe Festusimbo wakifoefimbohūnda. ¹⁴Afindi si Agripa ahoro ho ai rani ŋgoafihü nimbafe hafembo mefeyamboyu asu Festus ai adūkari bogori Agripambo Porindi hoafi ranahambo hoafiyundühi yahuya, “Nindou mamī ndanihü mbanūngu horombo Feriks ai karabusambe hiniŋgimariri. ¹⁵Horombo ro Serusarem ŋgoafihü tüküyahe nimarihane, Godimbo sihou-rundeimbi bogori asu Suda-yafe bogori ai Porimbo papi-hoafirurūhi-yomo asu ai wamboya se ahambo wagiriyafisi, ŋga karabusi-ndafoandi mbisafindo mehomondiri. ¹⁶Raniyahi asu ro ahamumbo hoafiyahapurūhi sahiya, ‘Rom-yafe hohoanimo süngu

ro-ana moai moaruwai hohoanimo ratūpuri ra nindou ŋgorūmbo moani-hoanḡirihu hohu nimbori sehu rihundi. Nindou ranai ahambo hoafi ŋgoro ana, ai sapo dūdi nimori ai ahambo papi-hoafimarūri ahamundi himboahū nūnguani animbo asu ahambo nafi sihefendowani ai nini-moatūkunimboyo hoafi-memondo ranahambo ahandihoari ḡüre-ḡüerandūhimbo fifire hoafimbiyu-wamboane,' masahi.

¹⁷Ranimboanahi asu ai tüküme funda ro moai afuri hihiniḡi-riheandi. Ŋga rasinambo siambe hoafi didiboadofe wori ranambe nimarimboyahi nindou ranahambo sowarūdūmo sifomo masahapuri. ¹⁸Ŋga asu nindou sapo ai ahambo papi-hoafiyumbo-memo ranai botiyafu manḡgomo, ḡga asu ai moai ahambo moaruwai moatūkunimbo papi-hoafiruri. Asu ro ahambo rani-moatūkuni ranimbo randūwurimboemo masahi, ḡga wani. ¹⁹Ŋga ai-ana Porimbo hoafinambo yanḡiriyo ahamundi Godimbo süḡgufi asu nindou mami ahandi ndūri Sisas yifimayu ranahambohūnda raraomaruri. Ŋga Por ai yahuya, Sisas ai moai yifiyu, ḡga yanḡiri mbanūḡu mehu. ²⁰Ro hoafi ranahandi nimindhūdi ra fifirindihe türūboadihea saheheamboyahisi, ḡga asu wambo hohoanimo ranai mamikar-andirūhiyo ro moai fifiriheandi. Ranimboyahi asu ro Porimbo Serusareminambo ḡaḡufani animbo ranihū sihafī hoafi ra yibobo-mbirundamboane sahehea dūdumeheando. ²¹Raniyu asu Por ai hoafiyuhū yahuya, 'Ro-ana moeisahi, ḡga awi moani ratūpurindahihū nimboahani Sisar ai animbo hoafi wandi ra didiboado-mbireand-amboane,' mehu. Ranimboane ahambo awi karabusambe kikihirūmūdi mbura süḡguna Sisar sowana Rominambo koandiheira mbūhuwa samboanahi," mehu. ²²Agripa ai Festusimbo yahuya, "Ro wandihoari Porindi hoafi ra himbori-ndahando samboanahi," mehindowamboyu. Asu simbori Festus ai hoafiyundūhi yahuya, "Refe-anasi, sūmbu animbo hoafi ra himborindafindo," mehundo.

²³Raniyu asu siambe Agripa ai Bernaisi-dibo yihuru sahari-sahariyafe hena mahūfe. Raniyafe ai ami-yomondi bogori-yomo asu nindou rani ḡgoafihūdi bogorimbo-yafundeimbi-babidi hoafi didiboadofe wori ranambe kefoehi mahūsi. Raniyu asu Festus ai hoafimayuwa Porimbo sowarūdūmo mahifomo. ²⁴Raniyu asu Festus ai hoafiyuhū yahuya, "Adūkari bogori Agripa-ani asu nindou se muḡu ro-babidi aniḡgomo ran-anemo se muḡuambo nindou ndanahambo hoeirūwuri. Nindou ranahambo afindi Sudahūdi ai ana Serusaremihū asu ndanihū amboani wandi himboahū ahambo papi-hoafirihorūhi pukūna hoafiyeyihi seiya, 'Ahambo hifokoandiwori, ḡga ai-ana ḡgiri asūkaindu yanḡiri nūḡu!' masei. ²⁵Asu ro hoeiri-heandani ana ai moai nini-moatūkuni moaruwai ratūpuriyuwani wambo ahambo hifokoa-mandūwuri-yopoani. Ŋga ahandihoari Rom adūkari bogori hondū Sisarimbo yahuya, ai animbo wandi hoafi nda didiboado-mbireand-amboane, mehu. Ranimboanahi ro

ahambo koarihefiyuwani hombo hoafi nda didiboadorihe asiheheandi.
²⁶Ŋga ro hoeriheandani moai ahandi hoafi ra aboedi fifiriheandi, ranimbo-hündambo animbo asu ro sihefi bogori adükarimbo sowana pas nda sürü papindihi koandiheheamboyah. Bogori Agripa, ranimboanahi se-anafi asu nindou muᅅguamboanei siheimbo sowana nindou nda sahümindu koarihehina asünu. Sihiri ahandi hoafi bidifiri ndondihu himborindefi mbundihumbo animbo asu ro bidifiri papi-hoafi pasambe Sisar sowanambo sürü papindihamboane. ²⁷Asu ro nindou karabusihündi koarihehinühi nine hoafi nindou ranahambo papi-hoafarihori ra pasambe pefe koehefekoate-ayahi ana, wandi himboahü aboedi hamindiyopani,” mehu.

Por ai Agripandi himboahü hoafimayu

26 ¹Raniyu asu Agripa ai Porimbo hoafiyundühi yahuya, “Hapoanani se sihafi fimbo hoafi ra hoafiyafisi,” mehuwamboyu. Raniyu asu Por ai ahandi wari nimoamoreandühi ahandi fimbo yare hoafiyuhü yahuya, ²“Bogori adükari Agripa, ro hohoanimoyahani aboedi saf-ane sihafi himboahü Suda ai wambo papi-hoafi-maründiri ranahambo weindahi hoafindamboyah. ³Ndanana awi anihond-ane, rani-moatükuni ra nimboe se Suda yihoefi Godimbo hohoanimo simbori hoafiyefi arihundi ra wudipoaporo fifirowandi. Ranimbo animbo asu se wandi hoafi nda afurindo nimandifi himborindafi.

⁴Horombo ro akidouyahambe peya hehea hahambo haponda ndani simboani tükeheandi ra Suda ai ro hohoanimo sünguariheandi ra fifirundi. Horombo ro wandi hifihüyo asu Serusarem ᅅgoafihü nimboahambe peyomo houmbo ai wandi hohoanimo fifirundi. ⁵Farisi-yafe hohoanimo ranana ai tünjümbi safiyo hayamboyo asu Suda yihoefi hohoanimo ranahambo ᅅgasünde-andeimbiyo. Ro rani hohoanimo süngumarihandi. Ai fifirundiri-mboanemo, ᅅga asu ai hoafindimondühi ana, ra anihond-ane mbeyahomo-ndamboane. ⁶Ŋga haponda ro ndanihü manimboaha ai wambo papi-hoafaründiri. Ndanahandi nimindi nda yahurai-ane: God ai yihoefi amoao mami ranaheimboya siheimbo aboedi-aboedi ndiheandüri-mboyah mehu ranimbo anihondümborihe heheamboanahi hifandihi animboahi. ⁷Yihoefi 12 siri ranai Godimbo nimboambo sürühi didibafiyahindo rihündühi rani-moatükuni ranahambo yangiriyei ai anihondümborihi hehi hifandimarihündi. Ŋga Bogori, ro-amboani hoafi ranahamboane anihondümborihe hehea hifandarihandi. Ŋga ranahandi nimindihündiyo Suda ai wambo papimaründiri. ⁸Nimboe bidifiri se ᅅgiri ro-ana God ai yiŋiyeimbi nendi botareandüri ranahambo anihondümbu-ndihundi aseia? God ai aboedi-aboedi-ndemünühi yiŋihündi botinde-amunimbui.

⁹Horombo ro wandihoari rarihe hohoanimoyahühi sahiya awi ro Sisas Nasaretihündi ahandi ndüri hifinambofimbo afindi ratūpuri

ratūpurinda masahiyosi. ¹⁰Raniyo asu rani-moatūkuni ra Serusarem ŋgoafihū ramariheandi. Raniyahi ro Godimbo sihou-rundeimbi bogori-yomondi ŋginindi sahamindi hehea asu Godindi nendi aheimbo karabusi-mariheandūri. Raniyahi asu ro nindou bidifiri-babidiyaha hehea aheimbo hifokofendūrimbo sahehea refemboane masahi. ¹¹Asu ro aheimbo afindimbo Suda-yafe rotu wori muŋguambo ranambe tiŋirifo afindi sahandūri marihandi. Ro aheimbo ramariheandūri ra Adūkarimbo moaruwai-moaruwaimbofe hoafi, hoafimbeyahūndowa saheheamboyahī ramariheandūri. Ro ŋgusūfoambe ŋginindi-rihandūrūhi aheimbo ŋgoafi adūkari ŋguni manango ranihū amboani ha kokofoa-riheandūri marihandi.”

Por ai Sisasiṁbo anihondūmbo-mariri ranahambo hoafimayu

¹²“Raniyo Godimbo sihou-rundeimbi bogori ai wambo yini yahomo houmbo ŋginindi masaundira Damaskus adūkari ŋgoafinambo mahahi. ¹³Nindou Bogori Adūkari, ro hūfinimbo nafi mbusūmo hahūhi si mami sūnambeahindi makosowa hoeimariheandi. Si ranai ana hūfihamindi siayu ranahambo ŋgasūnde-andeimbiyo. Raniyo asu si ranai nindou ro-babidi nafisūngu mahefi yihoefimbo kosi boakima-foareamuni. ¹⁴Raniyefi asu ro muŋguambo hifini pūtapiyefi koriyefimbo ro himboriyahane, hoafi mami ai yare hoafiyowohū Hībru-yafe hoafinambo yahoya, ‘Sor! Sor! Nimboe se wambo moaruwai-mboarowandira? Se ana yihimindi moatūkunimbo yitarowandi ranimboane asu sihafihōari asūbusimboayafi,’ mehoamboyahī. ¹⁵Asu ro duduyaheandūhi sahiya, ‘Adūkari, se didiyafa?’ masahamboyu. Asu simbori Adūkari ai hoafiyundirūhi yahuya, ‘Ro Sisasanahi, ŋga asu se-ana wamboane moaruwaimbo-arowandiri. ¹⁶Se botiyafo nimbafi. Ro tūkūmeheandi nda sihambo wandi ratūpuri-mbohūnda kafoefe hiniŋgifeninani wandi ratūpuri semindimboyahī. Ro sihambo nine-moatūkuni haponda nafuimehanini, asu sūngunambo nafuindahanimboyahī rani-moatūkuni ranahambo nindou bidifirambo anihond-ane mbisafi. ¹⁷Ro ŋgiri hiniŋgi-ndiheaninani, sihafī nendi Suda anei asu ahei ndifo anei ranai moaruwaimbo-ndihinini. Ŋga ro aheimbo sowanamboanahi koarari-heheanini. ¹⁸Ranimbo se ahei himboari biridihawandūra nimbī ra hiniŋgirihi hehi si rani-sowana mbeyahindamboane. Asu Satanindi ŋginindi ra hiniŋgirihi hehi God sowana mbeyahindamboane. Ranimbo asu wambo anihondūmbo-ndihindirani ahei moaruwai hohoanimo ra amboawi mbisahani asu nindou God ai wand-anei mehundūri rani-babidimbo nimandeimboyei,’ Adūkari ai ramehundiri,” mehu.

Por ai ahandi ratūpurimbo hoafimayu

¹⁹Por ai asūkai hoafiyuhū yahuya, “Bogori Agripa, ro sūnambeahindi moatūkuni tūkūmefeyo ra hoeirihe heheambowambo asu ro ŋgiri

hoafi himborinda hiniŋgi-ndiheandi. ²⁰Ŋga Damaskus ŋgoafihū boatei hoafiyahandūri heheamboyahī asu Serusarem ŋgoafihū, Sudia-yafe hifambe, Suda-yafe ndifo aheimbo amboani hoafimehandūri. Ro sahiya, ‘Se sihei moaruwai hohoanimo hiniŋgindihi hehi God sowana ŋgei. Asu se sihei moaruwai hohoanimo hiniŋgifembo nafuimbohūnda aboedi hohoanimo sūŋgundihindi,’ masahi. ²¹Ranimbo-hūndamboyo Suda ai wambo Godindi worambe kikihirūndūmōndiri mburu hifokoe-fendirimbo mehomo. ²²Ŋga God ai mafarihendira aboedi nimboambo nindou moanind-anei asu bogorimbo-yafundeimb-anemo mamami siheimbo hoafi nda hoafehandūri. Ro ŋgorūpoanimbo hoafirihandipoani hoafayahi, ŋga Godindi hoafi, hoafiyomo-rundeimbi asu Moses ai hoafimemo ranahanda-mbohūnd-ane hoafayahi. ²³Ai yaru hoafiyomōndūhi yahomoya, ‘Krais ranai yifindu mbunda asu muŋguambo nindou ai botifekoate-yeiambe ai-boatei botindūfimbui. Ranimbo Suda anei asu ahei ndifo ran-anei aheimbo aboedi hoafi ra wataporimbo-ndandūrūmbui,’ mehomo,” mehu.

Por ai Agripambo anihondūmbo-ndowandi mehu

²⁴Por ai rani hoafi ra ahandi fimbo güre-gürerandūhi hoafimayu huwamboyu asu Festus ai ahambo hoafiyundūhi yahuya, “Por, se-ana mamikari hohoanimoayafi. Se sihafi fifirife afindi yamundimara hafi, raninamboane sihambo mamikari hohoanimoaranini,” mehuamboyu. ²⁵Asu Por ai simbori hoafiyundūhi yahuya, “Adūkari Festus, ro-ana moai mamikari hohoanimoyahi. Ro wudipoaporihe fifirihe heheamboanahi anihondūmbo hoafayahi. ²⁶Bogori Adūkari Agripa ai ndani-moatūkuni ra muŋgu fifireamboani, ŋga ahambo yihimbokote-nimboambo hoafayahando. Ro fifiriheandi ai moai rani-moatūkuni ra mamamboani bodifoareandi, ŋga nini-moatūkuni Sisasimbo tükūmefeyo ra moai dibo tükūfeyo. ²⁷Bogori Adūkari Agripa, se Godindi hoafi, hoafiyomo-rundeimbi yomondi hoafi anihondūmbo-rowandai? Awi ro fifiriheamboanahi, se-ana rambefoandi!” mehuamboyu.

²⁸Asu Agripa ai Porimbo hoafiyundūhi yahuya, “E, nimboea, hapondani yaŋgiri hamindi se wambo rando hoafindafindira Sisasimbo anihondūmbo-riheandeimbi tükūmandaheyo?” mehu. ²⁹Raniyu asu Por ai simbori hoafiyuhū yahuya, “Bodifohūyo asu hoandarūhiyo ranambo aboed-ane. Ŋga ro yarihe Godimbo didibafeheandi. Se-anafi asu nindou muŋgu dūdi ai haponda wandi hoafi hihimborayei muŋguambo se ro nahurai tükūndahindi samboanahi. Ŋga asu siheimbo seninambo nahurai himondi-hefendūra se karabusambe nimarimbo ro moei asahi,” mehuamboemo.

³⁰⁻³¹Asu raniyomo bogori adūkari Agripa, gafmani-yomondi bogori Festus, Bernaisi asu nindou bidifiri ai-babidi mamarei ranai bobotiyahi

hehimbo ŋgorū-goanini heihū ai rarihi hoafiyeihi seiya, “Nindou ndanai ana moai nini moaruwai ratūpuri mamamboa rareandi, ŋga ranimboane ai ŋgiri yifindu asu karabusindūfiyu,” masei. ³² Raniyu asu Agripa ai Festusimbo hoafiyundūhi yahuya, “Nindou ndanai Sisarimbo hoafiyowani ahandi papi-hoafi himborikoate-yumbonana se ahambo moani koarihawurani hu,” mehu.

Porimbo Rominambo hombohūnda sipambe hiniŋgimarūwuri

27 ¹ Ro Itari hifinambo sipambe hombo hoafi ra fimarindūmo. Raniyo Romihūndi ami-yomondi bogori Surlus ai Por asu karabus nindou bidifiri ahamumbo Itarinambo hifandimarapuri hu. Surlus ai Romi-yomondi bogori adūkarindi ami bidifir-ambeahindani. ² Ro sip mami Adramitium ŋgoafihūndi-mayo ranai ndeara Esia hifambe himbomayo ranambe kefohu hohu mahefi. Nindou mami ahandi ndūri Aristarkus Tesaronaikahūndi Masedonia hifambeahindi ranai-amboani ro-babidimbo mahu. ³ Siambe hefi Saidon ŋgoafihū tūkūmehundi. Raniyo asu ranihū Surlus ai Porimbo aboedi ndore hohoanimo-yundowohū yahuya, “Se ŋgafi sihafi ŋgunindi sihambo fehefeninimbo hoeindowapuri,” mehundo. ⁴ Asu ranihūnda botiyahu hohu sipambe hefane werinambo semindimuni koamarihemuna Saiprus airanikimi mahefi. ⁵ Asu ro Sirisia hifi asu Pamfria hifikimi siriwara haŋgifo sūŋgu hefi Risia hifambe Maira ŋgoafihū tūkūmehundi. ⁶ Ranihū ami-yomondi bogori ranai ŋgorū sipi Areksandriahūndi Itari hifinambo himbomayo ra fifire hayamboyu asu ai yihoeimbo sip ranambe koamarihemuni. ⁷ Asu sip ranai weri afindiwambo moani hiniŋgirou mahowa ranambe yahunūmbi siyefi hohu, moani afindi tiŋirifombū hiniŋgirou safi Nidus ŋgoafikimi tūkūmehundi. Ŋga ranafi hombo weri ranai gūmareamunambo tiŋirifoyefūhi asu Krit airan Sarmone bidifirani raguani hundūni wakimehundi. ⁸ Asu ro siriwara himbori sūŋgu moani hūrūtūmbo hefi hohoe mami ahandi ndūri Hohoe Aboedi sei arihūndi Rasea ŋgoafikimi ranihū tūkūmehundi.

⁹ Ro moani gedūhi nimatefi hefi hefimbo asu Suda ai sesi wehimbo si ranai ho hayambo wambo siriwara ranai afindi-afindi mayowambo sipambe hombomayo ra moaruwai hamindiyo. Ranimboyu asu Por ai ahamumbo ahini hoafimayupuri. ¹⁰ Ai yahuya, “Wai, ro rarihe fifiriheandi sihiri moani haponda botiyahu ahefi ana, moaruwai hamindi tūkūndifemboe asu ŋgiri napo sip yangirindo, ŋga sihir-amboa kapeihū animbondemboyefi,” mehu. ¹¹ Ŋga asu ami-yomondi bogori ranai moai Porindi hoafi ranahambo anihondūmbo-reandi, ŋga sip semūndū-hurandeimbi nindou-mayu asu sip aharambūri ranahafandi hohoanimo sūŋgumareandi. ¹² Aboedi hohoe ranana ai weri afindiowambe ra aboediypoani sip ho paiari rambo. Raniyomo asu nindou afindi

sipambe mamarimo ranai ranihūnda botife hefe siriwara sūngu ho Finiks hohoeambe nimarimbo hohoanimo-memo. Finiks hohoe Krit airanihane apuiaro. Ranihū animbo ai weri afindambe aboedi nimandeimboyei.

Siriwara ambe hoeweri afindi tüküme feyo

¹³Refe hayamboyanane, sūngunambo weri akidou ranai hoarinafinipoedi werimayo. Raniyomo asu nindou ranai yaru hoafiyomondūhiya awi ndandifeyowani ana, aboedi safi ngemboye fi mehomo. Raniyomo ai sipimbo kikihiyimindi niŋgombo moatükuni ahandi ndūri aŋga ra hūrūdūmo foaru houmbo ai Krit airani himborikimi mahomo. ¹⁴Ŋga asu homondane, moai amitata ŋginindi hamindi weri ahandi ndūri ‘Ndihoanipoedi Werī’ ranai Krit airan ranafipoedi masino. ¹⁵Raniyo asu werambe sip semindi himbomayo ra ŋgirindimo. Ŋga ro moani rarihu hiniŋgirihundane, weri ai sip ra semindi maho. ¹⁶Raniyefi asu ro rebanafi airani akidou mami ahandi ndūri Kauda hundūni werikoate-yowani wakimehundi. Ranihū ro sapo bot akidou sipambeahindi makiaro ranahambo hūrūtūmbo tiŋirifoyefūhi kiau hūhimarihundi. ¹⁷Raniyomo asu bot akidou ranahambo sipambe hūrūdūmo nandu hūputūpumarūdūmo. Asu wofi ŋginindi bidifiri sip hoarehi safoaru hanimo mburu hūhiru hiniŋgimarundi. Sip ranai Ribia-yafe hifikimi gudi karihoeimbi rani sūngu ŋgomboe yahomo houmbo yihimbo-yomondūhi ser sipifihī makiaro ra hifinamaru hanimo. Sip ra werinambo yangiri funamindi mbiho yahomo houmbo. ¹⁸Moani afindi hamindi hoeweri ranai yare matiyaro-wamboemo, asu ŋgorū sinambo bidifiri napo sip ranambeahindi himoni fufumafoarundi. ¹⁹Asūkai ŋgorū sina ai sip ranahandi napo ra masafuarundi. ²⁰Afindi si maho ra moai ro akidou-amboani hūfihamindi mupui hoeirihundi. Ŋga weri ranai moani afindi ŋginindi hamindi tūmero ho. Raniyefi asu ro ŋgiri aboedambo-ndahundi sefi hohu hohoanimomefi.

²¹Nindou sipambe mamarimo ranai sesi, sesikoate-moani gedūhi heimbo sūngunambo Por ai botifi haŋgifoani nūngumbo hoafiyuhū yahuya, “Awi se wandi hoafi ra himborimbei-mbonana ŋgiri Krit airan ra hiniŋgirihi hei. Asu ranimbe-mbonana ŋgiri muŋguambo napo ra yare yahurai moaruwaimbo reandūhi yeimbirihundi, ŋga wani. ²²Ŋga asu ro haponda siheimbo nda hoafehandūri, awi hapoana ŋgusūfoambe afurindūhi kūndihindi! Nindou se-ana ŋgiri mami ai-amboani yifindu, ŋga sip ranai yangiri animbo awarindūhoemboe. ²³Ro Godindi nindouya hehea asu ahambo hohoanimoya rihandeimbi mayahambo nimbokoani ahandi sūnambeahindi nendi wambo-so tüküme fiyu. ²⁴Ai wambo hoafiyuhū yahuya, ‘Por, awi se yihimbo-ndamboyafi! Ŋga se Romi-yomondi bogori hondū Sisarindi himboahū mbinimbafamboane. God ai sihambo aboedi hohoanimo-yuninūhi nindou se-babidimbo sipambe ahei ranai ŋgiri moaruwaimbo-ndahindi,’

mehu. ²⁵Ranimbo-hündambo animbo awi nindou nda se ŋgusūfoambe afurindihi kündihindi! Ro Godimbo anihondumbo-rihinimboanahi, ŋga rani-moatükuni ra sünambeahindi nendi hoafimayundiri yahurai hamindi animbo tükündifemboe. ²⁶Ŋga awi sihiri hoe mbusūmondühi ŋgorü airani amaro rani himborikimi ŋgefi tirimondi-humboyefi,” mehu.

²⁷Ndeara 14 nimbīyefi hohu hoewer-ambeahindi Edriak Siriwara ambe mahefi. Nimbī mbusūmondühi nindou sip sowandümo homondeimbi-memo ranai yaru hohoanimo-yomondühüya, ndeara gudiani tüküyahu-ndühanefi mehomo. ²⁸Raniyomo asu ai wofi hoandari ranifihi nimboreimbi moatükuni paru himondi-marundümo ra himoni simoŋgoru hoeirundane, asu hoe hohoe ranai 40 mita simoŋgorifihi hani kaimayo. Asükaiyomo akidou sühiyafu homo mburumbo safoaru simoŋgorundane, 30 mita simoŋgorühü hani kaimayo. ²⁹Sip ranai nimoei yahafi himoni ninouayo ranifihi ŋgo pandarimboe yahomo houmbo yihimbo-yomondühi-yomo, asu ai sip kikihiyimindi moatükuni aŋga yimbuyimbu ra sipambeahindi daboadanipoedi safoarundühi simbeyowa yahomo houmbo didibafimemo. ³⁰Raniyomo asu nindou bidifiri sip sowandümo homo-rundeimbi-memo ranai sipambeahindi fefoefe hefe aboedambofembo yahomo houmbo nafi kokomarundi. Raniyomo ai boti akidou sipambe mafoero ra sowandümo houmbo sip hangifoani aŋga safoefe titanimemo. ³¹Ŋga asu Por ai amiyomondi bogori-mayu asu ami bidifiri ranahamumbo hoafiyupurühi yahuya, “Asu nindou ndanai sipambe refe nimarikoate-ayomo ana, asu se ŋgiri aboeda gudiani ŋgomo tükündafundi,” mehupuri. ³²Raniyomo asu ami ai wofi botifihi makiaro ra kikiमारुnda bot ranai himoni pimayo.

³³Ndeara simbo yangirimayo-wamboyu Por ai aheimbo sesi sahüsi yahuhaya hoafimendüri. Ai yare hoafiyundürühi yahuya, “Se 14 nimbi ra afindi hohoanimoyeihī hifandimarihü hei-ane. Asu ranambe se moai nini sesi akidou-amboani kikifoarihindi. ³⁴Haponda ro siheimbo hüti hoafehandüri, ŋga se yangiri ŋngombohünda sesi bidifiri dagüdi. Asu ŋgiri sihei akidou moatükun-amboa moaruwaindo, ŋga se moani aboedi niboadeimboyei.” ³⁵Por ai rani hoafi ra hoafiyu mbura sünguna bret bidifiri fufuramündü haya ahei himboahü Godimbo hihifirüri mbura karamündi haya masesu. ³⁶Raniyei asu muŋguambo nindou-mayeī ranai aheimbo ŋgusūfoambe aboedi ndore küreandürühi asu ai-amboani sesi ra sahümündi hehi masahüsi. ³⁷Nindou muŋguambo ro sip ranambe mamarefi ra 276 nindou-yefi. ³⁸Ndeara muŋguambo nindou ai sesi, sesi simogodühi sahüsi nafirihümündihī niboadeimbo sip ranai nimborkoate yimoembireandi yahomo houmbo wit bidifiri ra siriwara ambe fufumafoarundi.

Sip ra ho gudifihi pareandühi butaki-marihoayo

³⁹Ndeara sifoai peyoane, asu ai moai hifi gudikimi ra ndoru hoeirundühi fifirundi. Ŋga asu ai waföhe kare sihendani gudi

aboedi pimaramindo rani yangiri hoeiru houmbo awi sihiri ranambe animbo sip semindi homboane yahomo houmbo hohoanimomemo. ⁴⁰Raniyomo asu ai anga ranahandi wofi ra kibodiru mburu siriwara ambe fufumafoarundi. Rarundühi niŋgomomboemo asu ai maru wofi sapa sip nimindi kikihemindi horambomayo ranifihi himondimemindo ra fufurimarihoemo. Raniyomo asu ai seri hangifoani botimaru hafomo sipimbo semindi mbihowa yahomo houmbo. Raniyefi asu ro gudiani mahefi. ⁴¹Ŋga asu sip ranai gudiani hifo himoni gudiambe kikihiyo haya mamaro. Raniyo sip hangifoyowani ranai kikihiyowohü asu daboadani ranai weriyafuinambo butakimarihoayo. ⁴²Raniyomo asu ami ai karabus nindou ranahamumboya, hifokoandihupurani animbo mami ai-amboani boboriyo aboedambofekoate-mbeyomonda yahomo houmbo, hoafi fifirimarundi. ⁴³Ŋga asu ami-yomondi bogori ranai Porimbo aboedambofimbo yahuhaya hohoanimo-mayundo. Raniyu asu ai ami ranahamumbo refe hohoanimo ana yowani yahuhaya refepoani mehupuri. Ai ahamumbo hoafiyupuruhiya, nindou muŋguambo düdi ai boboriyurandeimbi ranai boatei sipambeahindi himoni horipindohoi pündu haya gudiani boborindu ŋgu tükündüfiyu,” mehupuri. ⁴⁴Rananimbo asu amuri ai nimi goesüri asu sip butaki-rihoeimbi-mayo ranifihi kikihi-ndündümo houmbo funi-funindu ŋgomo mehupuri. Ai rawoyafu houmboemo boboriyomo homo gudiani muŋgua aboedi tüküme fundi.

Por ai Marta airanihü manügu

28 ¹Asu ro aboeda gudiani tüküyahu hoeirihu-ndühiyefi awi nda Marta airani sei arihünd-ane, masefi. ²Nindou ranihündambo mayei ranai yihoefimbo aboedi-boedimarihimuni. Hoeyowohümo ŋgisihari-mayowamboyei, asu ai hai püpirihündühi yihoefimbo muŋguambo se mborai sühüsi haihehüyei, masei. ³Por ai hai didari fufuramündü hai-mayo raniwami daburifiyuwane, amoasiri ai ranambeahindi hai hüfinambo tüküme feyo. Raniyo ai Porindi warifihi ŋgamondamindi haya makiaro. ⁴Nindou ranihündambo-mayei ranai hoeirihindane, amoasiri ranai Porindi warihü ŋgamondamindi haya makiaro-wamboyei, ai aheihoari simbori ndüwuri-yahindühi seiya, “Awi nindou ndanai nindou hifokoare randeimb-ani. Ai siriwara ambe moai yifiyu, ŋga asu mbumundi hohoanimo ranai moai ahambo yangiri niŋgombo hohoanimoyo,” masei. ⁵Ŋga asu Por ai amoasiri ranahambo kikiharihoayuwa haiambe kikefoai pimayo, ŋga Porimbo moai nini-moatükuni akidou-amboani tüküfeyo. ⁶Ai ahambo watinari fimandiyo asu moani nimai yifi pimandiyo sei hehi hifandimarihori. Ai ahambo gedühi hifandühi heimboyeiani ahambo nini-moatükuni moaruwai tüküfendokoate-mayowa, asu sünguna ŋgorü süngurihi hohoanimoyeihi seiya, “Awi ai-ana god-ani,” masahündo.

⁷Asu nindou mami hifi ranihūnda bogori ahandi ndūri Pubrius ahandi hifi ra ŋgoafikimi manīŋgo. Raniyu nindou ranai yihoefimbo aboedi hamindi mborai-mboraiŋi semūndūmuni ahandi worini-mareamuna asu ro ahambo-so ŋgimi si manimboefi. ⁸Raniyo asu ranihū Pubriusindi afindi ranai furimboyuhū aŋgūnūmbo fondihū mapu. Ahandi fi ranai hūfi afindi tūkufe asu furimboyuhū ahandi fondani mapu. Raniyo asu Por ai kefuai hūfu wari ahandiwami nande mbura didibafifihi aŋgūnū ra aboedimariri. ⁹Por ai rani-moatūkuni ra ramareandambo asu muŋguambo aŋgūnūmbo nindou hifi ranihūndambo-mayei ranai masineia ahei aŋgūnū ra aboedimareandūri. ¹⁰Raniyei ro sipambe hombo masefa ai yihoefimbo bidifiri moatūkuni ro mbonimbo-marihumindeŋi ra fufumashūmuni.

Por ai Rominambo mahu

¹¹Asu ro ŋgimi amoamo ranihū nimboefimbo sūŋgunambo sip mami airani ranihū hoeweri afindimayowa mamaro ranambe kamefoehundi. Sip ranana Areksandria-yafe sipiyo. Asu sip haŋgifoŋwami Mboafu god sisami ra mapaiaro. Raniyefi ro sipambe kefoehu hohu rani hifi ra hiniŋgirihi hohu mahefi. ¹²Raniyo asu hefi hefimbo Sirakys ŋgoafihū tūkūyahu ranihū ŋgimi si mamarefi. ¹³Asūkai ranihūnda botiyahu hohu hefi hefimbo Regium ŋgoafihū tūkūmehundi. Mami ŋgorū si ranambo weri ranai hoarinipoedi werimayo asu yimbu siyefi mburihu hefi Puteori ŋgoafihū tūkūmehundi. ¹⁴Ranihū ro anihondūmbo-rihindeimbi manimboeia hoeimarihundūri. Raniyei ai yihoefimbo ai-babidimbo ranihū mami wik niŋgombo hoafimayeia manimboefi. Nimboefi mburihu asu sūŋguna Rom ŋgoafihū hefi tūkūmehundi. ¹⁵Romihūndi anihondūmbo-rihindeimbi ai ro rani ŋgoafihū tūkūyahumboanefi hoafi ra himboriyei hehimbo, asu ai Apiusindi Maket sowahi nindou aporambo wori ŋgimi fondarūhi sinei mbumarihimuni. Raniyu Por ai aheimbo hoeireandūri haya, Godimbo hihifirūrihi ŋgusūfoambe afure kūmareandi.

Por ai Romihū Godindi hoafi bokamarihendi

¹⁶Hifi Rom ŋgoafambe tūkūyahundane, ranihūnda gafman nindou ranai Porimboya se sihaf-amboani wori mami ranambe nimbafani ami mami ai sihambo hifandi-mbiraninamboane mehomondo. ¹⁷Ŋgimi si ra howane, asu Por ai Suda-yei bogori-memo ranahamumbo wataporimbohūnda mborai yahupuri haya hūmarihepuri. Ai muŋgu mafandunda, hoafiyupurūhi yahuya, “Wandafi mami. Ro moai nini akidou-amboani rariheandi sihefi nindou asu sihefi amoao mami-yomondi ahinūmbi hohoanimo ranahambo hifinambo-fembohūnda. Ŋga Suda ai moani wambo Serusaremihū kikihirūndūmondiri

mburu Romi-yomondi warihūmarundiri. ¹⁸Raniyomo Rom ai wandi papi-hoafi himbori-yomonda ro moai nini-moatūkuni rariheanda hoeirundi wambo hifokoefe-ndirimbohūnda. Raniyo ai wambo aboedambo koarihefe-ndirimbo mehomo. ¹⁹Ŋga asu Suda ai rani hoafi ra himborikoate-memonda asu ro hoafimbo moai ŋgorū nafi yaŋgoro. Raniyahi ro Rom adūkari bogori Sisar ai wandi hoafi ra awi himborimbiyu masahi. Rani-moatūkuni rameheandi ra ro moai akidou-amboani nindou ro-maye ranaheimbo papi-hoafirihandūri, ŋga moani hamindiyo rameheandi. ²⁰Rani hoafi ranimboyahi ro sihamumbo mborai-sa hūmariheheapuri hoeifepurūhi wataporimbo-yopurimbo sambo. Ro anihondūmborihē heheamboanahi himboayahī sapo nine-moatūkuni Israer munguambo himboayei ranahambo. Rani-moatūkuni ranahandi nimindihūnd-ane sen haponda wambo hūputūpu-rihendirimboayo,” mehupuri. ²¹Raniyomo asu ai ahambo simbori hoafiyomo-ndowohū yahomoya, “Ro moai Sudia-yafe-mayo pasi sihambohūnda akidou-amboani sahumindefi. Asu moai yihoefi wandafi mami Suda ai ranihūndambo sihambo hoafimbo hūndi hoafi sowandūmo sifomo. Asu moai sihambo moaruwai hoafiyoweimbi hūndi hoafi ra tūkūfe raraorandi, ŋga wani. ²²Ŋga awi ro sihafi hohoanimo ra hoafiyafani himborimbo sefomboanefi. Rani-moatūkuni ra nimboe sapo ro fifirihūndi munguambo nindou Sisas ai Godindi nimor-ani seimbi aipoanimbo-mehindi ranai se nimbafambeahindi ranahambo moaruwaimbofe hoafimayei,” mehomondo.

²³Raniyomo asu rani-simboani fandihumboane yahomo houmbo, nindou afindi ranai Por nimarūhi mafandundi. Raniyu Por ai God ŋginindi hifandarandi ranahambo wataporimbo-marandi. Raniyo nindou ranai Sisasimbo anihondūmbo-mbirūwuramboane yahu haya Mosesindi-mayo ahinūmbi hohoanimo asu Godindi hoafi hoafiyomorundeimbi yomondi-mayo hoafi sūrū pefe masihēfeyo ranahandi nimindi ra wataporimbo-marandi. Rani-moatūkuni ra moani hapoadūmbo siambe piyu haya wataporimbora hu-hu-humbo nimbokoani kikimaramūndu. ²⁴Raniyomo asu nindou-memo ranai bidifiri ahandi hoafi ra anihondūmborundi, ŋga asu bidifiri ai awi moai ranahambo anihondūmborundi. ²⁵Por ai mami hoafi ra hoafiyu hayamboyuwane, asu sūngunambo ai bobotiyafu houmbo ahamundihoari hoafi ranahambo simbori hoafiyomo houmbo bukūrūmefundi. Sapo Por ai yare hoafiyuhū yahuya, “Yifiafi Aboedi ranai Godindi hoafi hoafiyu-randeimbi Aisaia ranahandi yafambe sūngure haya asu sihamundi amoa mami ranahamumbo anihondū hoafimayu! ²⁶Aisaia ai yare hoafiyuhū yahuya, ‘Se ŋgafi nindou ndanaheimbo hoafindafindūri. Se himbori yaŋgiri hihimboripo-ndeimboyei, ŋga asu ŋgiri fifirindihi tūrūboadihindi.

Se himboapondei ŋgeimboyei,
 ŋga asu ŋgiri hoeindihindi.
 27 Nimboe sapo nindou ndanahei hohoanimo ranai
 tapihami-yondürühi
 ahei himboambe ra güre papireandüri
 asu ahei himboari ra dikireandüri raraora hayambo wambo.
 Refekoate-ndeiani, nindou rani-mayei ranai awi ahei
 himboarinambo hoeirihi,
 ahei himboambe ranambo himboriyei
 asu ahei hohoanimo ranai korifoareandürühi
 ai wambo sowana hehüpo ro aheimbo aboedi-aboedi fendürimbo-
 hündä,' *Aisaia 6:9-10*
 mehu," mehu.

28-29 Raniyu asu Por ai ndeara bidifirana hoafiyuhü yahuya, "Awi se rani-moatükuni ranahambo hohoanimo türüboadühi fifirindihindi. Sapo God ai nindou aboedambofembo hoafi ra Suda-yafe ndifo ranaheimbo-so maho-ane, ŋga asu ai-amboani hoafi ranahambo himbori-ndeimboyeisi!" mehu. 30 Por ai wori mami ahandi pemiya haya ranambe yimbu himbani manüŋgu. Raniyu asu ai nindou didiyei ahambo-so tüküyahindani mborai-mboraifi semündündüri didiboado-reandüri marandi. 31 Ai rarearühi God ŋginindi hifandarandi ranahambo aheimbo yihimbokoate-wataporimbo-randürühi Sisas Krai Adükari-mayu ranahambo yamundeandüri marandi, ŋga nindou mamambo moai yowani yahundo.